

近代中國史料叢刊續編第二十一輯  
沈雲龍主編

高梧軒詩全集

趙尊嶽著

文海出版社有限公司印行

高梧軒詩全集



趙叔雍先生遺像

# 曾序

叔雍既逝之三月余晤其女文漪于族人所叩其遺著則曰頃方董理擬爲刊布而以題序屬因告之若知若州學術之冠絕清代耶自來學者喜以地名其學若詩之稱西江是已至清而浙之詞闡之詩桐城之文章休甯之樸學率以二三人之精于是爲之倡人率以地稱之而聲稱滿天下焉然皆以一地名其學耳若常之爲州若儷體文若古文若詞若今文經學皆以一州而擅其勝以一地而名數學者惟常州爲獨絕非他州所敢望世變以還學雖稍落獲若翁之殿其後晚近所希有也其詞自桂派入其詩詞自同光諸老入雖不盡出于其鄉然擇善而從拓其先輩之域亦學者所有事也憶往以詩寄若翁若翁復書推許然必推其用心所從入擇術之所從捨探幽索微惟嚴惟謹於古大家不稍假焉然後知其用心之苦擇術之精故其成就卓卓如是斯豈若翁一人之力而已哉意者若鄉先輩治學之塗轍之不外是也序以歸之豈僅見若翁造詣之宏深而其鄉先輩教澤之被其後人者將永永無窮盡也太歲在旃蒙大荒落福州曾克端序

# 章孤桐先生前贈詩

夢魂頻到海南隈，曾記虞翻去未回。  
訪舊縱非齊鬼物，擘牋疇與角詩才。  
胸藏大略全無用，兵入奇裘豈易隳。  
吹劍了知同一映，滄波雖隔意終迴。

苦憶三年不見人，重來仍認履綦新。  
詩牋懶帶寒喧語，海角真成寂寞濱。  
世變討源身有胆，舊書刊誤筆生春。  
江湖平昔論心跡，不遇知交肯重陳。

兩世交期直到今，白頭愛吐少年音。  
子安序就爭先唱，容若詞成有內心。  
老遺才華歸渾穆，身經憂患入沉深。  
相如賤物吾親見，敢忘南陽舊惜陰。

君提皂帽走遼東，我似羈鷹戀舊籠。  
往返三年看孟子，遲回四賦比揚雄。  
未聞異國傳高第，頻見飛書說困窮。  
何日一歡相屬處，故人杯酒與從容。  
（甲辰夏）

## 輓詩

乾坤曰互各無成，五十年來過鳥輕。  
誰料衛賓珍小友，初與君相識君年十三化爲李白夢平生。

遺文在篋愁邊讀，憶語如鐘分外宏。  
懷舊到君真絕倒，憑風吹淚盪重瀛。

風流儒雅少年郎，江左名家衆所望。  
趙壹故應終揖客，接輿何事忽陽狂。  
過都一蹶

占无咎入海忘歸恨共長今日縱無纓可濯淚垂猶自越滄浪

嬾與疏兼老益墮因君眈擊長癡駉惠詩不和詩頻至寄簡無還簡遞來篤厚故人  
天上見飄蕭詞客笛中哀蕙風親炙彊村艾占斷江東獨步才

太平山下數朋遊幾輩馳驅幾輩留正憶杜陵蘆塞北忽驚淮海古藤秋人生聚散  
原如此吾道東南定有由怪底中郎才付女詩成幽憤更餘幽

謂文潛

靜宜夫人手寫高梧軒詩縮影

遠栽隄柳認新栽，一抹斜陽外

蒼巖撲面來

飛絮漫天卷，簾櫳撲座揮，之以詩

鳥足車鈴劇可哀，征袍繡染風埃

去，因交芳離人，泪遲，尔止頻，危逐，水來

墜，涸，飄，首，又一回也，教，激，澆，泛，香，杯

殘，青，天，氣，多，聊，軟，只，賸，禪，心，未，卷，灰

漸，移，明，鏡，羞，霜，鬢，及，遠，揚，花，撲

岸，中，誰，候，華，年，付，塵，土，不，堪，重，向

幾分喜

十載在華歎往還  
酌歌唱徹念家山  
萍蹤恰自宜飄絮  
微

征衫抵泪斑

当前切莫訊商回  
隨分話頭聽趨塵  
看尽空盆千萬結  
斜陽影

裏倍作喜

卻道難詠

春暖輕寒  
尽有清驕  
陽梅雨伴



# 高梧軒詩序

余初學詩固不自諳門庭塗轍之所由也垂髫雍髮方憶從兩姊氏相羊家塾間或循聲讀唐人絕句先太夫人晨夕亦輒授以短律余之詩教蓋由此始忽忽九歲偶沾疴疾呻吟痛苦汗下如雨乃高誦海上生明月一首先公至以爲不祥迨十一歲就外傳塾師又教以雅頌而陳義不高先後學作十餘絕句先公訓之曰未嘗讀詩徒作無益旋改治實學則併此棄去者有年歲次戊辰靜宜夫人來嬪壓籛多舊槩佳本詩集尤夥遂復于青廬讀少陵玉溪昌谷東坡放翁遺山諸大家心許神會薄有所得所作亦自謂微有意境既而奔走江海出入關塞名師勝侶時時闕飲前輩老成亦輒有爲說關鍵旨趣者記游托意賡唱續酬境以日變詩亦日多其後改事填詞廢詩又十餘載及理舊彈師友往往墓有宿草去故之情感衰之感乃多奔集腕底而所讀日博所習尙無方仍不自踣其庭徑也寇亂旣熾中原鼎沸攘臂事功擲置不爲脩又五稔蓋平生未嘗刻意爲詩所作亦多肆手屏棄積存篋衍十無三四卽亦不復更加次第信屬覆瓿耳竊嘗思之詩以娛性靈寫襟抱寓興會

寄流連心有所觸則一及之日長有暇間與俯仰童而習之者至老或不能盡其奧曲雖苦吟亦奚爲其有神來之筆俊思紛如藻綵絡繹適丁作者之境地際遇彌覺其工而後之讀者不預其感不獲其事更未易卽加激賞持以示人無乃好事而不智耶麒麟之植匪所夙習越律自外亦不足以預溫柔敦厚之教余且併此而兩失之存詩以存歲月之絲歷人事之孳乳山川草木之雲蒸霞蔚以自適其玄冲淡邈之趣兼備好徵故事者之取資而已嘻行年逾六十于學問無所述作僅存亂帙寫此浮生追昔撫今縱嚴自汰替亦徒爲行看之資其猶詩教之罪人耶

戊戌春仲趙尊嶽

# 高梧軒詩卷一

## 種松山灣

武進 趙尊嶽 叔雍

樊遲治園圃，聖門崇所師。陶潛屏冠綬，一邱足棲遲。橐駝論藝植，樹德務尙滋。吾愛二三子，千載意若斯。春卉競芳盡，晨露浣新枝。餘寒猶中人，薄暖融流澌。零雨更兼宿，綠意披郊墟。夙興沐駘蕩，藜枝相扶持。老龍有奇趣，嫩籜亦紛披。吾慕大夫節，樹此表所資。荷鋤拾箆笈，卓午以爲期。倏然出塵表，蒼翠盤龍螭。色動意殊喜，戶牖蔭青姿。歸持古人言，來作種松詩。

## 以高梧名軒漫題

樓前六株梧，蒼翠殊悅目。坐以名吾軒，清風壓叢竹。偶然出西郊，運斤卜小築。官街纔十尺，俯仰對鄰屋。依違終未已，何必造林麓。

## 題上海嚴氏三世耄耋圖

載德端文化，清芬席黃耆。箕疇備五福，昌齡著遐壽。景止義行門，奕葉扶童叟。天報

有德者，必以昌厥後。德延獲高蹈，仲和屏冠綬。子張工翰墨，孝源最謹厚。不圖叔季衰，猶見三世耦。滄江潛感澤，舉案每白首。此直軼古人，曠世所希有。丹青會羣彥，投篇滿江右。維文揚其華，瑰寶逾瓊玖。娛親君家言，行仁用爲守。欣怵鼓羣倫，願晉一卮酒。

陳元白居士過談成唯識論

生滅吾堪了，真如君自知。便將八頌語，攝入五言詩。見道幾方物？存心不勝悲！珠林精勝處，此意更誰期？

高孝慤先生挽詩

忠義植大節，東林衍儒風。彌綸布彝憲，舉世知所崇。有德昌厥後，舍和遂履中。心閒物與適，志靜日以充。暇晷習養生，圭幕常充充。尚德樹禮法，劬學怡藐躬。考槃足行樂，寤言惟相融。于以疾世變，斯不貪天功。大雅傷淪胥，形役徵有終。遺言資自挽，達人安窮通。平生不懷愧，聖學紹正蒙。篤行古君子，一朝悟靈空。孝慤仰私謚，吾徒識淵衷。來書拜潛德，涕淚景岱嵩。

野行

蕭寺推枰起，扶節試野行。滄江澤塔影，山樹失斜曛。鳥趁低簷疾，花飛夾岸分。忽然江月上，魚子弄新紋。

皎鏡懸新曉，朱樓卷畫簾。露融荷葭潤，鶯囀柏枝先。青玉天千丈，白雲山一廛。起衰尋蠟屐，幽賞自吟邊。

家有良駒垂垂老矣貨之意殊不忍短歌相遺

伏櫪垂十載，晨夕不相離。念爾振鬣角，百里相奔馳。百里了平日，朝露終差池。吁嗟光過隙，逝影傷華絲。當年行蹄迹，強半荆棘枝。日月長在眼，山川無改移。胡爲有生者，轉不如墟遺。游魂逐天外，仰秣傷餘脾。吾旣愛忠骨，安忍與裹屍。今日試言別，揚鞭徒嗚咿。貽以短歌行，鹽車期安時。

春盡日示客

心與瓊枝共歲寒，卻教相伴又春闌。斜暉處處多情致，不照眉痕照遠山。十載侵尋恨已遲，舊情宛轉更誰知。番風無力韶光繫，欲遣并刀翦鬢絲。記得飄簾洒送春，驚鴻顧影自風神。從教萬驛千山路，明月圓時憶夢塵。開到將離恨別離，更堪春雨細如絲。攀條欲問長干柳，一灑春波聖得知。

江次聞歌

一聲惜惜鹽，飛作楚天雨。水落黯江秋，似催行客去。

李雲書屬題其兄薇莊遺墨農家圖

遺世有孤鶴，羞與鷺爲伍。曉起看松筠，躬耕治林圃。鄰家有老農，詔我明日雨。一椽雖云頽，牽蘿亦可補。洒濕滌萬垢，寒夜驚里鼓。獨策藜杖行，丹青弔漁父。

夏夜客座

吳菱越藕最芳鮮，滿座清涼不論錢。留得鐙檠長伴客，北窗風好倚牀眠。

寄曹纘衡京師

感君稠疊意，驛使問南枝。莫負花時約，彌矜亂後詩。簾波春影瘦，諫草夜深移。此景應相會，同消玉漏遲。

丙丁之際兵禍方亟南北懸榜緝人如兒戲偶見客名賦寫

履霜倚劍溯平生，不盡遲春賦北征。見說闌干依躑躅，更留名氏付零丁。文章惜誦知餘事，風味清言乞主盟。絕憶綠陰深巷底，瓶笙輕拂夜窗明。

桐江權歌

推蓬鏡裏看青山，山共舟行第幾灣？祇恐雲衣重疊外，路迴峯轉不成環。  
山如鬢髻水如羅，罨盡斜暉入畫多。愧我畫中無好詠，磯頭斷續聽漁歌。  
抱溪故有山迎棹，照水惟應石傲人。風靜淪漪聞細響，詩成無韻不清新。  
北苑春山夙擅名，臥游靈境愜幽情。晴窗未比蓬窗好，粉本微嫌刻畫成。  
欲托微波致寸楸，舉杯惆悵棹歌前。興來欲共沙鷗語，爲汝留真傍晚煙。  
香羹已熟喚鱸魚，便有銀鱗佐野蔬。風味似聞香秫好，舵樓煙直午炊初。  
大好巖光照眼明，提壺掠水去無聲。鴈柔漸入詩人夢，水鏡山鬢足一生。  
壞塔鈴凋前代寺，斷崖苔蝕半殘碑。幽人省得蕭疏意，寫入絲闌絕妙詞。  
玉峯深處綵雲歸，明月前溪上翠微。夾岸兩三漁火外，倚舷未覺露侵衣。  
宿霧濃氛鬱未開，漢家文物幾蒿萊？韓陵片石瑰奇甚，乞與春陰護綠苔。  
搯筇一百六十丈，犖确危闌石徑移。欲問綸竿千尺手，可能與鶴話心期？  
晞髮餘哀未可知，眼中邱壑似年時。西陵儘有閒松柏，得似冬青北面枝？  
暖風遲日醉游人，隄上清暉罨暮春。如此溪山屬忠義，儘教斫地泣孤臣。

藥農兄藏陽貞愍爲汪叔明繪夢衲庵圖卷徵題

釘釘藤纜意無端，料峭空山自在寒。一夢應憐遲十劫，縵曇多事夢中看。  
散僧入聖證前身，未了修持懺宿因。爾許詩情兼畫意，須知明鏡本無塵。  
湖上熏風醉客船，桃花柏子共清妍。憑闌解道無言說，一度含毫一惘然。

徐仲可屬作會義夫旌詞

末流傷僂撻，禮教泯榛蕪。女貞且不諒，何況旌義夫。論者怒遺行，色荒患須臾。破舌  
古明詔，荼毒甘微軀。托詞寄芳草，快意量明珠。誰省高樓間，側睫懷辛劬。成魔悟見  
愛，釋說端徑途。挂帆添片席，巧譬良未殊。青樓臨大道，胡姬當酒罏。扶花倚殘醉，頃  
刻聊嬉娛。凡茲篤嘉訓，依違多歧趨。竊謂此末節，未當罪狂奴。獨是相知者，貴在不  
相渝。人生有新故，至情同賢愚。忠貞庶競爽，日月並往徂。願言永白首，忍此紫奪朱。  
棹楔褒至節，里巷驚傳呼。深思容自返，過者宜踟蹰。省心寧自愧，抗志誰與俱。坐負  
百年身，更圖張青廬。陸蘭弛悅佩，塵鏡掩金鋪。此時追故歡，志志徒囁嚅。丈夫重然  
諾，轉石事區區。胡爲敵體恩，寡信加厚誣。隻身甘寂寞，單枕清且癯。曾公勵末俗，卽  
此世所無。學養不待數，難爲君子儒。起衰勵澆薄，國士重璉瑚。閱情砧白璧，亦以廉  
頑儒。允哉昭明言，斯道其不孤。



酬邵次公秋夜寓樓韻

砧杵初迎玉漏長，天風幾度拂枯桑。終知螻蟻歸潛壑，忍見星河被夜涼。跋躅花前應自念，高樓雲外莫輕忘。與來更欲親杯酌，披髮扶醒下大荒。

遙答李釋戡游靜宜園詩

未能作健莫登山，怨共茱萸負醉顏。茗甌清歡傳雁字，坐喧哀吹戍江關。吳楓夢熟濃如錦，越黛屏低瘦翦鬟。繞砌秋陰聊自息，爭墩無地著身閒。

筵次續得釋戡山游詩

十年辜負西山約，畫裏詩中子細論。寒碧有情酬競韻，軟紅無地著爭墩。延秋歲月珍行卷，挂屨心期托酒尊。尤喜開緘嘉客座，一卮端自爲君溫。

北游雜詠

望中未許專邱壑，夢裏還應憶舊游。今日翠微山下路，猶堪沈醉送殘秋。丙寅暮秋北游馮幼偉招

山西

已窮車足日駸駸，拋卻前巖意更深。老栝自宜千尺幹，衰楊猶繫萬絲金。自西山迂道香山  
郭外脂車緩緩行，離宮入眼漸分明。前朝興廢歸閒話，花館湯泉第幾楹。陽山

繞陌垂楊綠一鞦，漸聞清漏喚泠泠。重來欲乞閒緣借，不負新詞榜自青。玉泉山自青樹卓君庸別業

業

寢殿前頭石一楹，片雲堆雪各瓏玲。無多清祕人間世，殘劫猶留北宋銘。頭中園觀花石網故石

南陌僧房帶淺蘿，丁香似雪得春多。來遲只合看行脚，共話牆陰綠一莎。法源寺

歧路殘年意未闌，市樓斗酒蕢清歡。相從未易梅花侶，風雪關山耐卻寒。嶺玉雪中約臨市樓

鏡檻山眉竚有無，凭西築閣好攜壺。入門題壁先尋字，俊賞無因舊夢疏。江亭

獵獵風蒲已半黃，西溪猶及倦時妝。登臨漸覺江南意，眼底秋林一草堂。或謂江亭頗似杭州西溪

夜鐙深巷尋斟酌，幾輩詞流擅勝場。猶有嘉名供膾炙，莼鱸長合夢江鄉。廣和居嘗備魚江豆腐

尋春南客登臨地，麗曠飛瓊罨玉京。老樹漸肥鴉漸瘦，凍河車畔聽無聲。雪中過御河

小園自有閒風致，短石新栽映綠漪。寫入無聲詩更好，瑤華春向鏡中窺。綴玉軒為同人造像

十年花底聽流鶯，未盡成連海上情。得傍玉梅修笛譜，一時矜寵壓生平。為綴玉作曲

最是晨鐘欲動時，一楹別緒淚腰肢。征人短驛無多好，切莫來春問見期。折別

看花十載尋春約，亂後清游已恨遲。容易彌天風雪裏，從容歸棹可無詩。歸舟

西山謁羅癭公墓

十年夢裏時相憶，一覺新來入翠微。斜徑循流容歛段，短楓舞葉壓芳菲。漸驚落日疏僧舍，更著橫枝刺客衣。回首題名碑上字，舊游淒絕到巖扉。

釋戡昆孝同游隆福寺並至三槐堂觀書舊東市也

冷巷殘攤誰管領，策筇蠟屐偶經過。意窮丈室不須遠，寒入疏林未易多。繞膝兒童爭笑語，翻書買客計磋砢。塵邊更忍看東市，竚聽盲翁負鼓歌。

市樓約客來歲南游兼屬題卷子

市樓草草沽行廚，握手相看尚故吾。青鬢不辭明鏡減，酡顏應付醉花扶。十年塵海收心眼，千里樓臺乞畫圖。客夢鷗盟同一笑，明朝共發大明湖。

頤和園約客同作

昆明湖上水，嫩碧了無際。萬壽山前松，衝雲奪晴霽。十年勞心魂，一旦欣投袂。故人情殷勤，選日同作計。脂車出西郊，驛路漸津逮。薄寒良中人，殘綠尙凝睇。須臾煥金碧，林樾乍蔭蔽。入園遵短徑，幽草久未薙。堂前安燕寢，陛額尙舊題。廊深抱清流，矮座足小憇。作健更登山，穿路拾畫砌。豁然開藻井，仰見屋鱗儷。衆香真勝窟，佛閣亦殊製。棟梁擎天申，穹碑懸頂綴。迴眸收全湖，遂覺天意贖。騷騷林木振，習習穀紋細。

緒風不勝秋，遙動和鶴唳。拂茸下石舫，指岸伴鼓柁。神祠式中流，檀欒猶舊制。長橋  
偃臥虹，微波拍湖埭。山陰最勝境，永日足迢遞。放舸尋清歡，攬古窮勝契。已經付劫  
火，文物盛難繼。敗壁墮湮磷，疏巖滿籬薜。惟有貞松貞，猶復矯寒歲。凋林愁日晚，徵  
往采隱謎。吟嘯拂煙巒，橫枝壓巾帨。忽忽俱歸來，非復人間世。宸游辭銅仙，天地併  
傷逝。當時聚物力，闢萊共砥礪。長擬樂未央，四海徵圖幣。不意有崩圻，便爾易隆替。  
一草或一木，及見陽春意。承平倏夢寐，忍感大氣沴。吾徒斯何人，來此修被楔。明鏡  
悟圓覺，吟事亦寤讒。

曹靖陶分惠徽州雄村故宅所植紅豆蓋數百年或實或不實比歲大實分貽  
友好爲相思之券

南國才人淚，東風帝子心。劇憐春乍老，未忍夢如林。湘竹微慚豔，瑤璫意不禁。獨拈  
尊酒畔，記曲付沉吟。

再和幽居秋盡韻

怕聞哀吹亂嚴更，葉葉西風作戰聲。宵永似憐天意晦，病餘微遣世緣輕。漸驚黃月  
侵斜檻，猶翦烏絲竚斷檠。不盡江關感蕭瑟，許教禪悅證心清。

丁卯仲春冒雨赴湖上

宿雨慳晴未易收，小春天氣似瓊秋。來遲莫負花時約，應共荼蘼綠一樓。  
十年日日吳山路，未了關情蕙蓋船。亂後風懷渾似舊，碧漪吹皺麗人天。  
未盡人間怨別離，湖頭細雨濕春絲。寒衣莫問長亭路，已是垂楊第幾枝？

爲蕙風簪義女潘雪豔題影潘工劇事蜚聲海隅

猶記盈盈十五時，天春樓畔夢如絲。明燈特地嬌紅處，更許葳蕤見一枝。  
砥地哀歌已異時，更堪腸斷裏晴絲。春人最怯山陽笛，况見檀欒璧月枝。

靜夜玩紅豆再寄靖陶

澹盡相思酒一蕩，襟痕夢影幾經秋。開籤重見相思子，爲汝離離憶舊游。  
已漸花風著揀枝，爲誰青子比紅兒。春人不盡將離意，猶倚闌干琢麗詞。  
鬪豔工愁第幾春，故園芳訊罨書塵。夢回未忍天涯路，錦襲芸藏最賺人。  
花草虞山已劫灰，絳雲清祕付蒿萊。雄村不絕春如縷，惜起橫枝付翦裁。  
南國才名第一流，勝情誰似看雲樓。等閒紫鳳天吳外，比得紅兒好唱酬。

屬意女伶新豔  
秋捧之甚力

虞山紅豆  
早付荆榛

靖陶所居日  
看雲樓時方

重過金陵平江府

寂寂重局外，來遲覺計非。玉容應似舊，金勒更誰歸？暖閣猶新月，平林半落暉。不堪尋斷夢，珍重數腰圍。

釋戡校印瘦公梨園掌故寄贈滕詩索和

忍更巡簷聽釜雷？打窗送雨葉成堆。挑鐙未盡鈞天夢，遺世真憐避地材。一夜鶯花收寶錄，百年薪火竚殘灰。淚痕且莫西風浥，引劍無聲對鏡臺。

九日賞菊邀客甘氏非園座中程子大冒鶴亭姚虞琴以杜韻酬唱繼聲

勝景應如昨，吟情怯漸非。尙嫌黃菊晚，每竚雁書稀。薄酒能供醉，浮生夙見微。登臨誰許共？夕照上緇衣。

和纒蘅江亭獨步韻

無復年時草色青，祇餘吟斂黯新亭。愁邊遠黛和煙曉，亂後流鶯側耳聽。斫地哀歌應當哭，問天沉醉意難醒。從知車馬城南客，孤賞猶堪見性靈。

湖樓

綠到垂楊絮接天，隄前樓外最芳年。新詞自和黃金縷，短酌誰量白玉船？眼底煙巒

空寫恨，夢中夔蚊不須憐。憑闌瘦盡銷魂句，辜負雲藍錦樣箋。

蘇虞記游雜詩同游同作者冒鶴亭葉遐庵合輯成集

幼輿多事專邱壑，蠟屐歸來意最便。欲傲東坡窮眼力，行郊風物足流連。

宿霧催收雨脚輕，懸知新夏恰宜晴。銜泥便覺雲山好，初日光風靜處行。曉發不為雨阻卓午便爾晴放

晴放

移家畫裏蕙風移，豔說閭門楊柳詞。老屋城南應尚在，素雲黃鶴最相思。蕙風師會移家闔門又嘗

指城南老屋為夢窗故宅

幾拂緇塵貯午醒，扶廊嚦嚦聽流鶯。欲憑商略山塘路，惜起春闌一寸情。

拾磴牽衣翦嫩莎，粉牆背影尚峨峨。三生花草誰能識，只付盲翁負鼓歌。虎丘貨郎擔鏡述往跡不置

置

徑曲修篁拂綠茸，庭隅殘記著苔封。飄零同具人天劫，絕憶楓橋半夜鐘。寒山寺鐘已非故物寺亦廢

廢

了知一覺微無際，自省三生報有情。六百年來賢劫繼，血書入眼最分明。龍壽山房觀元僧繼誓血

書華嚴經

金閨萬戶屋鱗鱗，直 鐙火迷春倍有神。賺取危闌凭一角，夢回風雨憶斯人。就與登高君念詞人曹輅

怡園高致近何如？直 綠到階前草不除。入座煙巒添粉本，眼中樓閣最憐渠。怡園畫師顧鶴逸書為繪

高梧軒圖至  
今徒懸想望

激灑晨曦欲上時，芙蓉清絕影娥池。竭來誰會簫疏意，只解山茶覓故枝。清曉游拙政園賞新荷

想望靈巖已目前，最憐奪境自緣慳。琴臺呼酒詞人老，倦客惺惺欲問天。不及赴靈巖賦契夢箇詞

不能  
去懷

疊石倪迂夙擅名，三吳風物並傾城。林亭處處宜家好，車笠重來許結盟。此行遍游各園

自在飛花結道場，支硎遺刹付荒涼。摩挲猶及輪迴柱，一霎浮提幾海桑。舊游支硎舊推勳輪迴柱

蓋海內僅  
存者也

濯纓容易到滄浪，繞閣扶花竚野塘。剔蘚自教搜壁記，瓣香歷歷舊書堂。滄浪亭觀五百名賢像

銅街車馬鬪芳菲，駘蕩斜陽覆客衣。歸路戒幢猶駐景，亂鶯雜樹未全稀。西園戒幢寺

圓月停雲上壁枝，暖痕自與夜晴宜。輕衫白衿風吹動，正是扶醒拄杖時。

水赭山溫喚渡行，片帆能逐去潮輕。關心尺幅蓬山外，得似孤雲嶺畔橫。虞山道中



望裏雲衣怯畫眉，生成重疊照明漪。亂痕只怕風吹去，小竚遙看面面宜。

一徑逶迤出郭門，登臨初地便桃源。于今魏晉知何世，特與題名子細捫。桃源

坊表東南衍杏壇，凌夷忍更見秦燔。點班儘廢儀尊禮，亘古斯文道不刊。拜言

一代興亡繫重臣，兩朝恩遇付平民。低迴白鶴峯前路，但有樵蘇識告身。瓶蘆齋夫周氏出示前明

身告

南國相思樹幾株，離離蔓草只荒蕪。劇憐記曲銀屏夜，換盡朱顏髮似膚。遇紅豆山莊故址

河東潛德掩靈旗，消盡棠梨竚落暉。欲附桑經存鄙注，不辭榛棘爲牽衣。河東君墓邑志不詳將爲

記補

陂影高低帶石梅，城隅夜靜怯徘徊。一鐙籬落人間世，揀此清宵得幾回。夜宿石橋

笙鶴遙天未可期，難尋金闕竚鸞儀。焚身已捨胡麻飯，多事人間覓鍊師。老君觀已廢

花木禪房曲徑通，梵天生意翠成叢。廢興省識前朝樹，劫外無言倚碧翁。破山寺唐桂宋梅

珍重琳琅數草除，孤忠歲月跋躊躇。二喬不廢宏光歷，同是天涯付劫餘。爲鶴亭翁題建文三年石

刻

嬌紅勾乙字參差，翦翦寒宵本事詩。歷劫未磨天壤恨，情芳應許費矜持。觀燕園藏竹坨風懷原稿

野寺遙岡最上層，未須文字便傳鐘。西來面壁如如旨，棒喝原來喚不膺。

三峯寺僧  
慧語僧

拂水前頭躡屐登，峯迴路轉赴峻嶒。濡毫斧擘爛工妙，欲起吳王溯畫徵。

劍門石作大  
小斧學正知

墨井石谷  
深于熏習

蘄道循溪罨石拱，朱藤懸壁宛游龍。寒泉靜裏堪盈掬，吹灩無波到棟風。

老石  
洞

直與彌陀共一龕，名園濠濮卓伽藍。漁歌檢點仙源記，憔悴江南只自諳。

吾宗涪甫先  
生園滄為僧

舍

北固崢嶸倚上游，夢中鐙火更揚州。可堪投轄河橋日，揜折垂楊送客舟。

維揚之行  
恨不及繼

勝情手訂記游篇，曲送花迎字字妍。贏得留題圖畫裏，浮生珍重五雲箋。

鶴亭翁將屬  
客繪圖紀盛

### 殘醉

漸消殘醉怯殘更，纈眼瞢騰別有情。疑雨夢輕憎屋漏，破雲月豔妒花明。單衾蠟炬迷雙影，十載萍蓬負一生。低首紅樓前夜好，曲瓊初放喚傾城。

### 題畫

楊絲得似柳絲柔，挽住春風不自由。芍藥闌干輕倚處，一生端不為花羞。簾櫳疑雨綴羅文，向晚殘妝理茜裙。直把圓姿替弓月，願為銀漢護雙星。

釋戡約游金陵寺贄休所卓錫者事阻不果行寄和原韻

江城作客自休休，賸幾豪情作勝游？  
舊錫新藍隨意到，淨名清課幾生修？  
銜泥漸覺脂車滑，刪草徐通曲徑幽。  
正是彌天烽火動，與亡誰與訴閒愁？

有輯近人書法爲總集者收余新作跋謂神似海藏殊嫌不稱紀以長句

平生手盲人，夙少引縑素。垂髫秉家學，洞庭慳一賦。自分盾鼻間，揮毫作露布。雄心縱言表，塵海足馳驚。摹擬徒玩物，結構斲天趣。壯夫戒雕蟲，甯屑封故步。此志亘胸中，每致波磔誤。俯仰東坡翁，病嗜與俗迥。海藏所師事，受課頗危懼。史晨修正法，龍門追像塑。唐碑與宋帖，清暇輕一顧。狂草出篆隸，或忽得神悟。假以十年功，字字良金鑄。提名比珠玉，返視尙歧路。斂才難就範，衣鉢未見付。忽忽悲換世，雙目已昏瞽。親師久見背，殘帙餉蟬蠹。或有張余書，辨識泯好惡。願君節烏絲，勿使蠅著汗。更當焚筆硯，晞髮謝簪履。

陳肅亮屬題寫經

傳鐙自證無邊覺，落筆能參上乘禪。想見晴窗花雨裏，一鑪香定智初圓。

十洲四部溯征軺，輕擲華年付弄潮。夢想遠離顛倒際，不如歸去結疏寮。

君爲船主又外任使節素

悅  
就禪

茶爐禪榻挹春多，  
皺面觀河鬢亦疏。  
愁絕衆生同一劫，  
與君相對老維摩。

# 高梧軒詩卷二

武進 趙尊嶽 叔雍

## 落花和陳致庵姻丈

蝶使蜂媒總後時，東君到此只成悲。綠楊城郭凭如夢，紫陌闌干度已遲。碎錦繽紛應自惜，沾泥辛苦付誰知？不堪亭角尋思處，更著鴉兒覆亂棋。

絕憐兩橫更風狂，併遣天涯草不芳。絢海珍叢消片霎，驕雲畫檻了千場。移根癡擬藏金屋，對景愁猶貯玉觴。未信重開仍故樹，一彎逝水一迴腸。

錢春不放翠尊空，怕見將離鬪晚風。閨苑未容招七七，小名猶復認蟲蟲。迅同紫鳳隨雲霧，貯徹青峯送曲終。莫漫工顰兼解語，隔林惆悵信天翁。

急劫人天乞少留，麝香應尙戀枝頭。窈娘隄畔攔凝睇，少女風前不自由。鬢髻從教空鈿股，菱開長日黯妝樓。他生有分宜春苑，培養靈根未肯休。

## 陳石遺師屬作哲嗣可荊兄挽章

天地一安立，人生幾朝暮？搖落詎可期？涼飈薄煙樹。沉吟望京國，邈邈傷去故。奉手

不成歡，開緘驚馳赴。輒聞丈人言：飲水致沉痼。枕流漱白石，知與俗情忤。求田寧所安？微祿何足顧？令文庶可傳，名山供笠屨。和光含清濁，涇渭奈異趣？讀律獲聖解，魑魅窮鼎鑄。已堪家國憂，復憤醫術誤。集鵬止座隅，拂袖穩杯渡。惟天不愛才，瓌寶毀康瓠。萬事皆自失，一境獨明悟。惟是感至情，天性篤稟賦。彌留忍須臾，餘生但孺慕。持此終古恨，猶及片時語。哀哉高堂心，封碣爲志墓。沾襟餘老淚，寂寂故園路。宿草自己矣，行役倦形寓。生者何爲情，排蒼孰與籲？曝衣樓上月，靜夜泣蘭露。婿報七書 鐙澹無輝，窗影斷蕙炷。遺世削諫草，殘篋黯秀句。翠微妥吟魂，臨風束幽悵。

丁卯四月次公于王城重圍中寄示暮春雜感詩浣誦黯然爲廣其旨賦絕句

十九首

未盡餘歡強倚闌，將離容易別時看。送春消息渾如許，贏得詩人淚一紈。眼底西山著意明，倦雲生怕幻陰晴。癡龍未了人間事，橫雨狂風第幾生？平生一顧驚鴻影，尙許關情太液池。不似永豐坊畔柳，帶晴踈地織金絲。解舞垂楊冒夕曛，無情眉翠鬪羅紋。樓高不似天涯近，瑞腦猶環五色雲。煙外河橋鎮日垂，絲絲臨水怯風微。殿春此處無情緒，擽取長條曳別離。

碧城望裏最嵯峨，同日霓裳詠凱歌。一自江南花落後，東皇消息近無多。  
笑桃文杏滿城栽，便著東風次第開。似此珍叢誰愛惜？願爲香土護莓苔。  
一牒昆明掠逝波，湖隄祕殿得春多。新來唱徹公無渡，風雨前頭緩棹歌。  
南陌驕驄最勝游，張泥半著柳花毬。鳳城覓句前時好，肯爲尋春十日留？  
通明一夜喚綿蠻，悟入愁春未易刪。猶記冷攤殘社日，賽歌聲裏念家山。  
凭遍闌干欲喚春，稼軒詞筆自能神。蘭荃微尙粗能識，塵土蛾眉更幾人？  
絮亂花繁入眼頻，山眉鏡汝照人人。畫中許著閒身住，消盡柔寒度盡春。  
初試單衣換茜紗，簾梢春小玉鈎斜。夜長些子矜持處，猶道餘寒勒杏花。  
檢點珍珠字幾行？粉鱗雙翼證春盟。塵香輒繡明朝事，鳳尾猶堪押小名。  
殘月緣階上壁枝，夜深春好自相宜。玉柔花嫩尋常裏，未許風懷獨付伊。  
簾箔愔愔翠地垂，未歸人共月如眉。殘宵已拌重三過，莫更餘春鏡檻窺。  
亂後年光似擲梭，他生蜂蝶足消磨。宮溝怨字題紅葉，影事春明倦玉珂。  
轉綠回黃自縮春，穠姿應共歲華新。微嫌夢裏龍池路，難繫金鈴記會真。  
自在飛花試著權，沾泥切莫誤香嚴。珠林不許留空相，辜負瓊春上畫簾。

閩人重修杭州陳忠肅公墓徵詩

蒼蒼臨安山，湯湯聖湖水。馬鬣五百年，卓然孤臣祀。龍飛數咸淳，綱紀已瀕毀。繼統紹德祐，成敗已尺只。公荷丞相詔，亦忤權愍旨。讜言信不刊，抗疏布遐邇。聖明燭貞介，遷之左御史。瑚璉真重器，軍略試臧否。乍聞議納款，孤憤去朝市。銅仙辭漢宮，所欠惟一死。太康圖中興，海南亦千里。公起任艱鉅，責效未遑止。經武勵士卒，卻降斬賊使。一身終被逮，絕粒意不禱。文章復忠義，滿腹敢逼視。平生吾文山，志行實相齒。正氣沛兩間，大節炳千紀。亡則爲國殤，存則爲國士。惜哉身後時，不及負孤矢。展轉趨漠北，殺敵盡邊鄙。長暝尙振奮，環宇倏荆枳。來此敢輕犯，毅魄碎螻蟻。皇圖跡已陳，棹楔墓垂圯。鄉人篤風義，封樹薦草蔕。豐碑穹且崇，傳狀相序比。一篇起予衰，式閩薦毛泚。願以勵薄俗，杯斝臨風醜。表忠述前朝，雪涕寧自己？

病榻和温太尉柳枝

東風三月柳千條，舞盡闌干鬪細腰。當作鞭絲樓下過，征人曾幾夢河橋？  
一桁青樓大道旁，如珪明月映流黃。娉婷柳妒腰肢細，玉笛吹時總斷腸。  
繞遍長隄數碧條，落花微颭赤闌橋。凝情鎮日供憔悴，惜起餘春驗舞腰。



半鞦垂楊拂玉溝，憑風作絮起新愁。春波得似年時綠，蕩盡文鱗罨畫樓。  
相隨絃管度橋西，嫋嫋仙音水拍隄。更著金絲垂舞袖，玉階低處草萋萋。

庚午泛海北行養疴雜賦

侵舷微覺風兼雨，病起誰堪冷與閑。笑指柳梢沙外路，落霞天盡倚危闌。  
瞑目頗疑松振壑，隔窗輒似壑驚雷。亦知身涉波濤險，爲向滄溟砥柱來。  
素瀾平處天垂幕，綠野遙驚劍吐花。真有蛟龍是神物，彌天四海護行槎。  
漸見鱗波淡著行，漸隨殘照接天明。詩心得似文煙細，洗盡濤聲徹夜鳴。  
坐了殘更倚曉風，曜靈圓月自西東。堂堂碧落知無際，領略晨昏一霎中。  
濺雪迴瀾疊疊寒，輕煙不動似遙巒。詩人萬頃前頭立，拂袖凌雲一笑看。

李斐叔屬題十二辰卷子

樞精十二總堂堂，躔序催人遽可傷。檢點畫中詩外意，蟻封垂了夢千場。  
字字停勻角巧思，羣賢筆妙擅新詞。年來不慣工妃儷，坐盡流光似水時。

過津沽貽什公

豪氣彌天歷劫來，忍看城郭漸蒿萊。白河明月渾圖畫，紫電青霜屬霸才。一帙芸編

疑變雅，千秋心史亦餘哀。龍洲我是南歸客，許共元戎瀟酒杯。

南歸寄湯六松

卻病歸來好啟門，尙餘清角亂黃昏。江關九日花疑霧，風雨重城怨亦恩。千里雲邊懷祖逖，幾人眼底辨桓溫。疎鐘簾箔相從處，莫更紅桑子細論。

江知源翁構屋遼東以學易名齋徵詩次韻

遠疑蜃市近環村，絕憶高人靜掩門。歷歷白山兼黑水，堂堂錯節見盤根。予遺幸有巢堪托，時日云亡遺尙存。莫問執輿更誰某，河汾疏易自稱尊。

辛未三月重游秣陵舉目淒異頗觸舊懷

嫣紅惹紫黯芳辰，過盡番風數盡春。未易重逢猶一笑，堂前愁絕看花人。夢裏年光似水流，離情重疊蕩蘭舟。羈人不負薔薇約，揚子津頭趁石尤。柳作鞭絲絮作球，瑤京夢斷已三秋。天涯芳草綠階綠，恰認眉痕上玉鉤。妝成花妒玉腰肢，綺閣臨春綻折枝。一霎三生重見處，穠香渾憶未開時。翠巖垂簷燭影深，夜來惟賸薄寒侵。妒人雙燕營巢處，冷月黃雲怨不禁。

辛未四月廣州雜賦

怯暑應憐作客人，樓船萬里浣征塵。輕衫短袖隨宜好，棊几湘簾別樣春。  
高樓蜜炬夜如何？涼月西壕弄茜波。望裏亂雲重疊處，故園消息已無多。  
綠陰漸漸掩東山，應有幽人自掩關。莫遣龍吟喚風雨，且湔塵慮付潺湲。  
先王奮跡闢蠻陬，大長雄豪屬漢鉤。我愧江南成逐客，淺嘗侯鯖賦登樓。  
薄暝雙照樓招飲鎮海酒家

晚霞光景漸參差，紅映層城翠上枝。殘劫燕歸尋故壘，微醺人倦索金卮。山凝淺黛  
將開裏，風起雕輪欲動時。此際自應窮勝賞，十年魂夢慰棲遲。

壬申殘臘與藥農兄同游歙縣道中

錦幃千屏綠似春，殘郊浴雪淨無塵。誰知走馬看山客，卻是滄江歲晚人。

題梅氏本事卷

翰墨馨留玉雪痕，戒書密記手親存。鏡前好憶回文字，莫負香癡一嚮恩。  
花比柔奴媚不如，珠啼玉笑儘輸渠。尊前壽客應須記，青鬢華年入世初。  
影事凌波遽可哀，平章費盡建安才。無端說與鄆城賦，未了三生更一回。  
暖霧涼雲貯碧波，含情並影曳纖羅。他生桂殿稽仙籍，曾見雙星誓斧柯。

輕陰釀暖近何如？料理吳綿換袂初。自有迴腸酬錦段，不須雙淚換明珠。  
浥露芙蓉擁絳池，蘭膏影暈倦腰肢。平生英氣消磨盡，殘夢惺忪欲醉時。

吳敬臣屬題梁節庵丈畫梅余甫襁褓丈卽以金剛經勸學篇供晬盤追憶惘

然

夢中冰雪劫餘春，掩袂重逢舊喜神。應識平生期許意，心腸鐵石各艱辛。  
殷勤致語寫冰紈，梵筴芸籤簇晬盤。閱世恩私酬涕淚，河山消盡墨花寒。

綽約

綽約相看恨有餘，池塘春水縠紋初。東風忍作無情激，驚起萍根雙鯉魚。  
門巷愔愔最寂寥，偶然相見自魂消。無情風送征帆去，一別蕭郎便瘦腰。  
曳樹殘蟬帶露啼，玉階日影漸平西。秋風我未捐團扇，忍見天涯一葉飛。  
垂柳垂楊色替金，秋風送綠賸空林。堂堂白日從君去，誰省紅闈惜逝心？

馮文鳳女畫人繪百梅圖屬題

南枝北國兩堪哀！玉笛江城漸綠苔。儘有喜神留粉本，更無消息喚春回。  
羅浮舊夢足平生，冰雪空山獨有情。吟到玉龍餘怨曲，披圖滿紙斷腸聲。

鄭大讓于挽詩

驚雷振蟄海東頭，鑄鼎還期聚九州。孤憤生平爭一息，陰符片解亦千秋。魂歸細雨初殘夜，夢去浮漚不繫舟。淒絕綠櫻穠似錦，更無人處對層樓。

癸酉四月宿南海豐澤園頤年堂雜記

絲柳迎晴拂曉風，玉階金戶漸龍蔥。雕輪太液池邊過，回首祥雲疊疊紅。藻井商量第幾回？紅襟顧影掠波回。春人不盡呢喃意，輸與銜花鬪草來。蝸角紛爭遽可哀！相從青瑣話殘灰。眼前清淺猶蓬海，賺取紅桑更一回。睿藻璇題字字新，官家玉璽認猶真。此來移作衙齋榜，腸斷金輪夢裏人。輦路春雲夢翠鈿，檀欒畫裏罨疏煙。宮鴉細數金根過，誰是當前最少年？辜負靈和七度春，罪言祕殿賸酸辛。誰知曲突遷薪客，還作焦頭爛額人。海棠開後夢春陰，劫外猶能證道心。自笑頤年堂上客，褐裘側局尙侵尋。

下花

庭中海棠盛  
吸觀就奕

齊榜多題  
楚禮御筆

臨流鎮日坐清暉，倒影長松過十圍。松自無情隨水激，道人于此解忘機。蓬壺勝地榜瀛臺，半作茶亭半草萊。廿五年前風雨夜，涵元殿裏一低徊。

德宗前于  
涵元殿

本來天地一浮漚，芥子杯中亦泛舟。流水有音誰會得？心如止水不曾流。

流水音爲南海勝地

馮玉祥舉師張家口聲威

已大  
駭矣

社稷壇邊信步行，藥闌炫晝與雲平。多情好事尋花客，未許惺惺問姓名。開到將離數別離，盈旬彌月更何之？緇塵京雒三千丈，裁遍紅箋欲覓伊。

醉中漫書

悟道每從真處入，參禪難得酒醒時。人間儘有鴟夷在，誰奉劉伶作大師？清楚功德付唐捐，轉語機鋒信夙緣。青鬢有情明鏡裏，麴生須不負華年。挾策長安百事非，心兵纔合便忘機。與來試索春醪飲，一例相思淚滿衣。激灑金波泛玉卮，淺嘗便許別漏卮。甯教辛澀堪尋味，莫學酸甜與俗宜。卻嫌臣朔患長饑，先進盤餐後把卮。量窄偏教桑落滿，狂奴于此一支頤。春明夢斷幾經秋？屐齒襟痕舊酒樓。慚愧車公猶上客，酡顏只合醉方休。珍重姮娥照酒杯，夜深清漏漸相催。主人更起浮三雅，正恐團圓負此回。吾宗遺澤許摩挲，舉爵欣爲得寶歌。況是平生期許意，風雲筆筆枕雕戈。

酒次食君出  
示漢趙充國

珥玉

一醉能教盪百愁，滄桑眼底付浮漚。心如旋磨無常向，身似揮戈不轉頭。  
扶頭敲枕似弓彎，夢覺輕寒獨往還。眼纈小屏風上路，微嫌粉本似家山。  
醉裏情懷許自知，排闥入地邈無思。看朱成碧尋常事，換骨偷仙是此時。  
主客圖成泛一觴，凭闌歷歷竚紅桑。他年莫憶今宵事，容易宣南作醉鄉。

協和登泰岱寄詩索和

（協和卽李烈鈞）

行行京雒拂緇塵，愁絕欒槍指北辰。閒卻鄧林夸父手，獨攜雙屐送殘春。  
子房夙已薄留封，老去韜名榜赤松。黃石素書心法在，岱雲深處一支筇。  
急劫爭持局幾移，爛柯忍復話年時。揮毫未盡英雄氣，好寫凌雲七字詩。  
泰岱崢嶸輦路紆，憑君躑躅對霜株。劇憐竊號人間世，喚作亡秦五大夫。

甲戌上巳纒衝集客修禊玄武湖以興公蘭亭詩分韻代余拈有字補寄

晴春記三三，勝集千載後。攜榼來湖頭，把卮載旨酒。高情溯玄賞，盛事盟詩友。繞隄  
多絳桃，瀕水植細柳。錦霞漲遙天，白雲自蒼狗。柔綠帶淺莎，嫩紅薄窗牖。放舟涉中  
流，微聞清浪瀾。扣舷耽吟誦，思古數誰某。興公賦蘭亭，盈卷不去手。俯仰二三子，樂

道敦素守。日常同簿書。休沐共巖藪。況茲值令辰，豔陽肯輕負？拈韻寄遠人，好我意良厚。羈棲情自切，課無庸責有。徒憐江關客，臨風一搔首。

浦濱坐月

草閣扶頭聽水聲，可中圓月傍人明。侵宵暑氣隨波上，坐久星河撲面行。未了清歡餘逝影，半醒殘夢訴勞生。不堪街鼓統統動，惆悵歸來黯斗更。

和纒衡中秋韻

斷無殘夢到瑤京，一別三年迹漸生。素月不隨流水逝，酒星猶傍畫闌明。怕從圓夜尋芳躅，莫更重城拾墜盟。四壁幽蟲應惜起，江關愁坐庾蘭成。

雁蕩紀游留示東道主蔣叔南

拂面垂楊故作陰，沿溪野萼不勝簪。道人著眼光風裏，便見天機一片心。疑雲疑絮迷山影，和雨和風落夢邊。最是不堪春已半，將愁帶怨付疏煙。

雨中看梨花

臨水天桃乍一枝，無言含笑半開時。空山曲澗教誰見，自惜幽芳學弄姿。雲在山頭緩緩行，山隨雲漾綠微明。餐霞采朮知吾事，試喚靈槎渡斗更。嶙嶙斷翠分山影，點點殘紅著野花。誰識屏廬老居士，百年心事在山家。

蔣叔南構屏廬于山巖



爭墩謝傅傳靈谷，專壑君家又蔣山。多事桃源知魏晉，振衣千仞落人間。  
夢去華嚴路更深，明珠萬斛瀉高岑。恆河灩盡波斯面，恰是先生觀瀑心。  
平生省識丹青趣，步入丹青更有情。疊疊亂峯爭落照，絲絲殘雨送歸程。  
靜院能烹玉筍湯，山僧迓客下胡牀。前生似我曾經處，重散天花作道場。  
錦幃雲屏綠似莎，最深深處得春多。野棠夢好無人省，驚起黃鸝宛轉歌。

消暑莫干山留題白雲山館

幽人自惜閒中趣，壯骨甯消伏櫪心。天半朱霞起樓閣，坐看朝旭換晴陰。  
老范胸中有甲兵，半山禪悅負時名。泥犁自有青蓮在，底事空山絕頂行？  
憑將慧業參無漏，悟徹菩提便有情。法喜相看成寂寞，掩關垂淚話蒼生。  
亂峯出沒矜殘照，一水潑洄帶素姿。白日堂堂隨逝影，更誰解道惜芳時？  
專壑平生意不禁，山中歲月自侵尋。凭闌試與酬琴筑，喚起蒼龍萬壑吟。

歲晚北行

歲晚臨歧路，天涯怯病身。重來徒悵惘，隨分各酸辛。山闊雲垂墜，林疏草不春。更堪  
斜照裏，車影逐緇塵。

歲晚關河迥，天涯獨客親。琴書隨永晝，風雪自蕭辰。藥盞甘茶苦，花箋著墨新。寂寥堪杖室，扶夢貯鱸尊。

津浦歸途

平曠千里闊，涼月一規圓。自信身爲客，遙看水接天。乾坤供轉軸，林岫送殘年。歸意隨人急，低徊驛卒前。

春夜過圍城

夜寒如水翦春衣，點點殘鐙送客歸。最愛漪瀾堂下路，四更霜月漾清暉。漪瀾堂在北海

腺疾經年卒，遵醫囑于丁亥初春專程京師協和割治住院經月枕次雜賦。剖腹鏤肝事可爲，天涯一榻命如絲。堂堂春去無多好，怕負丁香似雪時。餘魂似涉中陰界，一息方從歷劫回。始信懺情滋味苦，散僧斷際念難灰。寸碧萍雲簇遠峯，千條霞燭眩飛龍。道人日日樓頭坐，初試安禪聽曉鐘。他生不信有餘生，此際垂垂拔宅行。恩怨千般都易釋，收京一事未忘情。

前作淒異病痊別立新義一反前說禪宗所謂奪境蓋有類于此

粉氣花光罨畫樓，筠籃鏡檻自溫柔。書生扶病消清福，只解歡娛不解愁。

綺懷刪盡更無餘，藥鼎重衾伴起居。只有病中詩境好，一窗新綠半牀書。  
老屋悄悄向夕陽，細風扶綠上筠廊。卅年詞筆迴旋地，夢外輕魂未易忘。  
宗藩重色兼繩武，虞海傳疑付史官。今日朱樓供病客，只愁重作過墟看。

病院爲善  
豫王府

病起應熊秉三丈邀宿香山雙清歡喜園習靜留題

原知體國兼經野，餘事山林付剪裁。二十年來幾緬履，草堂松桂盡成材。  
歡喜園中極樂身，與來魚鳥亦相親。年時廢盡調羹手，猶種梅花貯曉春。  
眼底春山自卷舒，竟將天地作蘧廬。我來直向雲中住，慚愧真靈位業圖。

由大覺寺策蹇至管家嶺看杏花新病不支墜驢有作

病起支筇試曉行，管家嶺畔貯新晴。疲驢墜客驚詩夢，壞殿邀僧作黍羹。萬本穠華  
和粉蘂，一亭寂寞帶煙橫。從教消息春如海，不負鬢天片霎情。

歸途過閩人林氏別業饒有園林結構蓋金源離宮故址且多杏花小息縱賞

主人出冊子徵題

膩粉酥雲覆畫池，離宮橋畔立多時。凝眸乍憶冰綃句，淚灑先朝北狩詞。

上巳後十日法源寺看丁香游人甚盛靜宜同行

宣南唐剝舊知名，雪海香微晷晚晴。夢畔老僧疏款客，新來病客廁傾城。巢松憩欲求田舍，倚月弦初就奕枰。莫忘相看攜手處，細風如水和流鶯。

# 高梧軒詩卷三

武進 趙尊嶽 叔雍

急足西行病起登庸關

狂風撲地畫驚沙，策杖扶醒就犢車。  
野老倚城尋劍鏃，客游凭雉數桃花。  
專征隨分千秋業，力役何堪百萬家。  
天塹危樓真可接，萬山重叠一痕霞。

張家口登賜兒山俯眺舊買賣城

未容辟世儘佯狂，披髮真成下大荒。  
檻外紫雲迷塞北，眼中離杏映殘陽。  
盛時蕃馬原爲市，亂後明駝忍去鄉。  
負手粘天衰艸路，雄關逝水自淒涼。

過大同冒雨游華嚴寺觀壁畫歸途遇雪

太行不是恆河水，也許閒身皺面來。  
無壞風輪仍頂刹，有情花雨尙粘苔。  
丹青歷劫晦能顯，石火留光去復回。  
五百威儀瞻具足，雪山坐對念成灰。

大同久勝樓傳爲明武宗巡幸所及卽院本梅龍鎮故趾

翦取并州十萬封，巡邊按劍是真龍。  
小樓密詔傳春宴，大漠迷雲竚晚烽。  
見說豹房

多寵幸，絕憐形。史誤織穠。承恩正坐盲翁語，爲到河湟訪舊蹤。

昭君墓

斷領玉匣已消沉，負土成圍過十尋。望裏穹廬兼板築，當前斗柄盡橫參。堂堂天使輸持節，寂寂芳辰故作陰。我欲重聽絃上語，不辭小隊共登臨。

陰山歸綏新城步月獨客蒼茫歸途成詠

煙樹無風送晚晴，清霜寒月受降城。斗迴杓柄連天直，岸積砂平絕地橫。廢塔國師留壞影，窮邊塞主竚殘更。此時勝賞矜幽獨，欲喚團圓共北征。

繞道陰山古狼居胥後至烏蘭察布盟

勅勒封狼廣漠寒，疏村斷澗幾回盤。流沙漲晚爭城起，斥鹵彌空似雪殘。猶有胡兒矜放牧，更堪毡酪勸加餐。天涯獨許輕車過，絕塞雄關掩淚看。

過陰山絕險處遙聽胡樂馬頭琴時三月已半嚴冰未解

曲壩荒溪一徑深，嚴冰初日兩相侵。巉峯合壁自天地，大漠長河無古今。羊角風高依野戍，馬頭樂動識胡琴。征夫不敢誇籌筆，斜倚雕戈付苦吟。

三月既望抵百靈廟就宿蒙古包主人烤牛勃取暖烹羊胛奉客中宵月色如

銀凌晨羽笳遙動氣象森嚴不知人間之何世矣

驚風廣漠走氈車凍合河冰沒徑斜。千里雲屯循古召，四更霜月落清笳。毳廬暖勃能溫席，文杏烘春未著花。依舊賀蘭山色好，可憐衛霍已無家。

距包頭九十里萬山中有五當台宏麗爲西蒙三盟諸旗之冠余襆被來游見胡僧疊石爲鄂博展旛爲圖騰均黃教遺制詩寫其實

羣峯拱壑樹崩嶒密諦招提最上乘。官道胡僧尊鄂博，風旛斷帙展圖騰。舊痕野燒經春在，乍廢危樓拾級登。游子釘釘亦籐纜，幾時教外許傳燈。

烏蘭察布盟爲蒙兀兒治所晤宗人匯川暢論屯墾邊務感賦一律

山圍澗繞絕車塵，細草平沙送暮春。賣塞悔應憐去日，屯田計自出先臣。東風遼海千行淚，西笑輪臺萬里身。不敢輕吟徒壯語，燕然帳外幾逡巡。

京師崇效寺牡丹盛開乙亥三月偕劍秋兄往觀並展玩朴公圖卷劍秋謂賦牡丹難于盛開惟先甌北公集中有之試爲繼聲

青松紅杏夢流離，猶賸名花浥露垂。正訪精藍搜舊記，恰如傾國照明漪。霞光絢奪朱顏好，粉氣輕蒸婪尾遲。見說含苞輸爛漫，東風著意解尋詩。

極樂寺在西郊以文官花馳譽。荆北花色凡先後。三變菩薩時。白色半開則青。萼怒放。又紅似。賜緋以狀麟臺文物之制。寺內凡十餘樹。蒙密錯落。余花時來游紀以一詩。

冷寺殘僧滯夕陽，看花重過國花堂。高林密葉凝酥雨，儷白緋紅罨畫廊。早惜等閒同印綬，祇餘掌故話滄桑。鬢天亦有盧生感，歲歲城西抵夢梁。寺有國花堂

橫海飛京師

齊州九點俯塵埃，真見排空馭氣來。自有河山申帶礪，卻教煙樹作輿儻。郢封萬井虛芒屨，列宿三清接上台。豈只高寒凭玉宇，今朝碧落許徘徊。

飛車賦游仙詩

瑟瑟天風海不知，扶搖和我步虛詞。赤城莫道雲邊好，好更凌波乍上時。澄漪細浪粼粼碧，粉絮閒雲款款橫。望裏蓬萊便金闕，青鸞多事控雙成。繡陌香隄自錯斜，盈盈衣帶水明霞。層霄別有朝元路，不待支機喚斗槎。真成縫月裁雲手，來作餐霞馭氣人。慚愧玉皇香案吏，仙都重到認前身。星辰掠面參差過，海嶽逡巡著眼新。閒卻鴻都老方士，只餘鍊魄制精神。



秋日習靜北戴河海濱

水淨沙明送暮秋，野雲殘綠倚層樓。偶從第五橋邊去，驚起提壺一徑幽。  
樓外滄溟作畫屏，登樓倦鬢亦星星。無因漸覺林泉好，惜起眠鷗共醉醒。  
簑笠風流傍釣磯，榜人欣載滿船歸。新來閒卻垂綸手，坐看銀鱗出水肥。  
偃蹇青山解弄晴，故教煙靄帶腰橫。平生自有凌雲志，愛向蓮峯絕頂行。  
新枝粗已解摩空，振壑翻濤趁晚風。絕愛蠖公珍重意，廿年前與植雛松。

松無數

貴陽朱蠖公經營有年植

粉雲似雪遮隄路，綠樹垂陰覆暮潮。明日陰晴渾不管，只延新月共溪橋。  
風前岸幘最相宜，浪淺澄波似斷溪。一笑拍浮均足樂，樓前看取弄潮兒。

宿醒

珠箔紅樓事已非，重衾斜軆淚沾衣。夢輕不共停雲逝，意嬾猶嫌中酒遲。依約新鶯  
疑舊苑，朦朧冷篆裊晴暉。無端梅影橫窗隙，絕憶瑤階對玉妃。

舊有探梅之約悵，攬芳菲漸成去故疏。香淺艷未能去，懷賦詩遣興。  
微聞綠葉漸成陰，夢畔春蹊未易尋。殘雪待融消倩影，落花誰許證禪心？已窺宿燕

營巢壘，更據斜陽掠斷岑。無賴壺觴容獨醉，紅樓更鼓竚沈沈。

釋戡于上巳招襖秣陵未及赴會代拈嚶韻比年計縮春燕市者爲多每殷懷

想情溢于詞

笛步初開竚晚晴，春衫乍拂惜餘醒。三生太液尋芳躅，一笑流觴拾舊盟。壓座江山愁錯落，隔船兒女儘啾嚶。板橋尚有閒情緒，聽取啼鶻更幾聲。

約退庵同聽劉寶全伯牙琴鼓詞時劉年逾七秩矣

已忍親絲管，何堪見老成。紅牙餘淚漬，雪鬢寫宮聲。月旦傳佳話，風期勵後生。高山流水外，負鼓有餘情。

符離集道中

遠渚垂雲尾，遙岑接太空。斷帆迎落日，飛絮趁斜風。岸幘看新綠，荷鋤數短鴻。村沽勞父老，猶復竚年豐。

山城循路轉，水驛漲沙迴。隴畝棲餘麥，陰晴滯熟梅。犢車驚重載，隄柳試新栽。一抹斜陽外，蒼巖撲面來。

飛絮漫天卷簾撲坐余懷棖觸寫之以詩

馬足車塵劇可哀，征袍翦翦染風埃。無因更著離人淚，點點蘋花逐水來。  
墜溷飄茵又一回，也教激瀆泛金杯。殘春天氣無聊賴，只共禪心半未灰。  
漸移明鏡羞霜鬢，更遣楊花撲野巾。誰付華年與塵土，不堪重問幾分春。  
十載東華獨往還，酣歌唱徹念家山。萍踪恰自宜飄絮，綴向征衫抵淚斑。  
當前切莫訊蘭因，隨分溪頭醮麴塵。看盡金絲千萬縷，斜陽影裏惜餘春。

郊游雜詠

薄暖輕寒盡有情，驕陽梅雨伴初程。不辭金勒城西路，檢點殘春付曙鶯。  
歲歲尋芳拾翠來，好春天氣倦池臺。生愁影共斜陽逝，鄭重清游更一回。  
花畦金粉炫天工，帶露初陽挹曉風。爲恐筠籬妨醉客，故教移影傍珍叢。  
東君許與舊風標，白奈丁香鬪柳腰。正似蒼顏兼雪鬢，無言袖手赤闌橋。

上巳日臺城展禊拈懸字寄讓衡

夢回春色帶餘妍，重許瀟裙曲水邊。信有羲和能駐轡，直教絳叟欲疑年。嫣紅未褪  
雕闌亞，穉綠初舒細柳懸。遙想秣陵風物好，禊堂遲我泛觥船。

金息侯自津沽寄壽詩徵和

玉籤寶算計華年，汗簡裁青信可傳。相見幼安方涉海，夙知夷甫不言錢。平居故國非吾世，惜誦餘生祇籲天。莫謂籌桑容易換，松貞石介自能全。

丙子冬日急足飛洛陽途次

信有垂天翼，衝雲破曉煙。循山窺險壑，當路乍斜川。舊習伽藍記，新爛鬼谷篇。二陵風雨急，誰遣制機先？

丁丑秋日北游

玉貌圍城有所思，安危前席更無辭。陰符夙已還黃石，筮短龜長欲問誰？漸著吳霜點鬢絲，坐消流水閱芳時。鐵函揀取沉心史，除卻青銅聖得知。小隊長安結駟來，槐根舊夢未全灰。笑他斂手推枰日，活著殘棋更一回。

挽陳石遺師

河汾亂世重經師，餘事風騷喜說詩。腰脚特邀天爵健，肺肝常濯酒懷悲。自隨書局娛清暇，小構園亭寄遠思。楊柳闔門曾泛棹，重游殘淚漬新詞。

挽陳伯嚴丈

故國孤懸夢外身，早摺餘命作逋臣。罪言黨錮矜門第，晚節江湖自苦辛。一代楷模

崇雅正，千秋文字更嶙峋。從今宣武城西路，老屋斜陽草不春。

丁丑七夕海隅戰事待發正勾當秣陵兼程迂道嘉興賦歸夜宿車次

莫從靈鵲叩黃姑，坐越鋒車賣虎符。新月穿雲浮甲仗，殘蟲傲夜唱菰蒲。涼生羅袂喧微寂，倦睇秋波醉漸蘇。壯志未因霜鬢減，幾時冠劍上征途？

翌晨

辛苦江南夢裏過，緒風微動拂銀河。曙星錯落依山斂，宿鳥啾嚶付柳梭。掃黛鄰娃工引鏡，撫髀老卒話揮戈。相逢同具興亡感，且對朝暾一放歌。

相見

相見經宵露未晞，不期東市換朝衣。遽憐同命悲磨蝎，幾更遲書抵佩韋？疑有罪言浮謗獄，怕翻遺稿黯靈旗。苟全未易人間世，從此天闌夢亦稀。歷劫浮漚賸此身，亦知臣朔患長貧。廿年讜論珍餘墨，經歲寒窗作比鄰。薄酒高歌詩筆健，旁妻芳訊素書頻。從教一夕成長訣，亂世殘生信不辰！

珠海索居示袁君

海國相逢日，天涯共命時。細香浮麝息，輒醉粲顰眉。乍見驚相識，多情理舊恩。聞聲

堪對影，只牘小菱知。

鄭海藏丈挽詩

廿載悲天墮，孤鳴振地綱。周旋同複壁，車騎入長楊。羣識桓榮貴，誰矜舅犯剛。盟心沉白璧，遼鶴忍遺鄉？

啓沃資寅夕，趨蹌侍早朝。棄家揀作客，捨宅托征橈。拓土當佳諡，褒忠賦大招。中原諸父老，掩淚竚靈輶。

至善求真效，修文課治平。薄徭期樂土，買犢勸銷兵。講學昌王道，升壇自主盟。河汾弘教澤，化俗企功成。

頗憶垂髫日，摳衣謁老成。藏山窺述作，負氣見生平。每侍花時宴，遂聞大雅聲。綠陰猶隔院，淒絕對繁櫻。

誨我殷勤意，臨池更學詩。史晨傳法眼，玉局擅雄姿。篤行崇儒術，心兵秉素持。芳堅擬蘭石，奎藻正無私。

丈會荷蘭石芳堅四字之勝

平日看天醒，端居合道心。經書成課誦，蔬筍足園林。墨妙千秋擅，閑情一往深。當歌兼對酒，豪氣自蕭森。

瑤京千里迫，清誨十年遙。挾策慚懷刺，拏舟惜去潮。輪囷瀝肝膽，離亂問芻蕘。忍見  
露光壞，辰維失斗杓。

父執凋零盡，餘生亦鮮民。九京期世好，奕葉勉修名。逝水雄關夢，殘營野哭聲。音書  
苦迢遞，雪涕若爲情！

爲譚瓶齋親家題西涯致仕詩卷

廟堂奕葉繫安危，餘事山林好護持。想見晴窗賓退日，一泓新綠榜西涯。  
堂堂墨妙世無倫，天馬行空意自新。家法宗師承北海，流風珂里有傳人。  
文正文勤四百年，茶陵勳舊紹前賢。蕭條異代同時感，併付青箱尺五箋。

丁丑仲冬南行雜賦

豎子朝堂已失機，和親逐北計全非。無聊勾當南疆事，等似閒鷗傍海飛。  
循峯傍壑走輕車，野店疏林處士家。自信行窩安樂好，十年前已種桑麻。  
面海看山負手人，高樓一桁絕纖塵。遽憐乾淨無餘土，故國斜陽不是春。  
夜深撲面數流螢，最愛前巖一片青。真似步虛通帝闕，天風珠玉伴娉婷。  
士女傾城事俊游，商胡卜驛海前頭。夜涼携手凭肩處，斜倚珠簾控玉鉤。

丹桂村訪  
王季文  
還庵招飲  
山樓所居

好依巖壑闢榛荆，別起樓臺照海明。月地雲階渾見慣，胡牀老子早忘情。捐燕遺恨數前朝，寸寸江山夜夜潮。不分彈丸區脫地，留教逋客作團蕉。吳霜染鬢一絲絲，坐看長安似奕棋。猶識東南有王氣，樓船捧檄數歸期。

約客夜登旗杆山頂

海市繁燈似雨絲，山城細霧潤苔枝。翠禽未了枝頭約，奈此清宵薄醉時？雪藕調冰更一回，葡萄釀進輓金杯。微嫌鬧市無多好，細語鐙昏念已灰。輕車穿徑漸凌空，隔座鬢香殢晚風。心似轆轤情繫纜，恰宜斷梗對飄蓬。巖樓一角倚危闌，青鏡凝妝獨自看。夢到舊游京雒好，夜深乍覺水雲寒。

戊寅仲秋渡黃海

無情海水作飛濤，墨掩霓旌翠映袍。入望長空收芥粟，傷心促拍赴檀槽。敢輕沉陸千秋事，自信行棋一著高。急劫殘圍餘片霎，樓船橫海不辭勞。

京師雨中過松樹胡同

幽齋寂寞似當時，淪茗呼鐙月上時。不信伏屍羸薄俸，只餘短漏和殘詩。修蛇赴壑人終老，霜鬢論兵恨已遲。試向北邙山下望，羸顛劉蹶更無詞。



昆明湖茗次

九疊屏風映夕陽，一簾山翠殫秋光。俊游人共涵虛碧，好景天教付晚妝。漸著團團升藻脊，微嫌格磔鬪雕梁。胡僧早泯興亡感，不向殘灰數海棠。

過西華門畔社稷壇後柳塘小憩

照影春波已夢痕，殘枝猶復曳天闌。銅街車馬垂垂盡，鏡殿蠨蛸歷歷存。曾送翠華藏複壁，更堪胡馬指長門。深秋無事悲搖落，亂後相逢怨亦恩。

九日客金陵

江城獨客挹秋陰，坐對鍾山綠一林。夢外微聞殘溜急，樓高猶遣緒風侵。車書王會千秋盛，饒吹戎師萬馬瘖。爲問故園花事好，疏籬澹菊費沉吟。

北行宿中南海

雕闌玉砌尙參差，夢醒流光已換時。九陌香塵迷繡轂，一春花事褪顰眉。風吹酒面微頰夜，燕掠文波倦翦枝。賸有吏閒賓退際，鐙移漏響費尋思。

飛京

從容誰信便收京，片霎飛車下九城。雪涕旄麾瞻故國，干雲羽葆迓初程。御池不改

春波灩，花柳新抽綺緒生。愧我十年霜滿鬢，雕闌負手怕論兵。

由南海飛張家口

舊是燕雲十六州，巡邊按部作勾留。亂峯拱壑迎喬馭，荒漠殘煙轟燧樓。漸喜諸藩崇正朔，便教大長卸兜鍪。平生蠟屐難忘處，西望輪臺乍五秋。

金陵河房

十年貫醉舊河房，亂後重經已海桑。映月徒添詩鬢白，掠波猶遞畫船香。相看索笑無多語，一搦通詞只自傷。畢竟夢華成憶錄，東京絃管自淒涼。

閒坐

逝水流光送短時，衙齋薄坐倦支頤。文書散帙隨風疊，官柳蕭疏帶雨垂。著眼旌旗兼露布，驚心饒吹雜侏離。廿年裘馬青春好，甘苦平生只自知。

清暇繕整舊詩漫題卷面

吳箋淡墨意深深，感舊裁篇跡可尋。霜鬢孤兒憐去日，故家喬木尙濃陰。自慚斥鴃隨雲起，頻倚危闌竚陸沈。莫負楹書空自哂，隱囊紗帽證初心。

寇禍 日寇侵華時作

弓刀事業夢難回，坐看長安付劫灰。三載光陰同逝電，千家辛苦怯驚雷。去時花木榮苔徑，隔世風懷黯酒杯。籌筆自慚侯鯖客，倚樓忍更攬崔巍。

客中得暑

葦幕彌天護短牀，紛披殘帙怯驕陽。炎威絳闕雲如火，水厄金莖露似湯。朝議儘教容短褐，閑愁終自揀他鄉。披襟最憶南陽路，綠外層樓遶短牆。

重九謝登高之約和致一詩

獨居感秋辰，大氣濯霜霧。龍山集游屐，嘉會謝不顧。玄黃乍變色，山川偕狐兔。兵氣捍喬木，溘沆宛縞素。冷城近戶庭，荆棘亦封步。我口既已瘖，詩情更誰籲。籬菊雖新放，一士漸遲暮。

秋夜過文德橋

河房歷歷認鐙痕，酒半酣時夢已溫。亂後疏星映疏柳，一絲一點足消魂。素月銅街灑欲流，畫雲開處露光浮。春城十萬花如海，賸照珠簾第幾樓。倦波流盼儘惺忪，雲水無情對碧峯。看取畫船俱繫岸，負他明月曉煙籠。

久客歸家漫興

劫後琴書楚楚閒，寂寥庭院付重關。更無人處寒花秀，若有情時好夢慳。尊酒自酬  
鐙夜悄，年光隨遞鬢絲斑。起從盡篋收殘稿，與到還將舊句刪。  
長夜一樓新月小，迴廊片霎晚風寒。依牆凍菊花猶藥，隔歲殘尊酒未闌。閒拂小綾  
欣覓句，微聞老僕勸加餐。平生夙愛孤吟好，更理清詩擘鳳團。

歲暮賦歸

辛苦歸來識歲除，主人似客笑迂疏。初聞花氣尋新萼，未具盤餐問舊酤。檢點關河  
餘壁畫，排當几席位琴書。玉田最識吾盧味，大好襟懷一起予。  
負手沿階得得行，疏花亂萼不知名。微陽初霽生新暖，薄霧徐開逞晚晴。春氣已融  
生意動，冰紋乍泮綠波平。呢喃輸汝雙棲燕，占穩雕梁最有情。

辛巳春朝秣陵寓中聞曉角淒厲賦之

釀得春陰作薄寒，中宵微覺練衾單。夢回一枕游仙好，戍角初嚴透畫闌。  
漸開曙色層雲散，半墮銀蟾素水明。曉氣龍蔥花露重，不堪遙聽斷腸聲。  
送盡芳菲了卻春，江南繡野付煙塵。不知多少深閨淚，換取鳴笳作曉巡。  
斷岸譙樓拾級登，熏風吹面倚崩嶒。征人偶作刀環夢，哀吹嚴更自不勝！

無情風送亂紅飛，嚶嚶流鶯繞曲隄。禁得柳花悠颺裏，平添鶯粟畫橋西。  
瞳矐初日上窗紗，布穀聲中雜亂笳。滴盡陌頭思婦淚，盃尊誰與共桑麻？  
鏡曲聲聲事可哀，征衣戰血雜塵埃。曲終應奏公無渡，殘骨緣知付劫灰。

車次觀秋稼豐收

望裏黃雲黍作油，山家攜盃隴西頭。遽憐地老天荒後，幸許珠穰玉粒收。千萬哀鴻  
猶遍野，一行淚墨愧登樓。不堪重檢豳風讀，父老新來尙說愁。

途次聞哀角蓋收隊者所奏

潰卒庸能抗直師？哀兵自勝更奚疑。繁笳促拍腸爲斷，滅竈量沙路漸歧。已恐滔天  
成巨浸，行看拔地樹降旗。醫無閭外雲深處，三箭功成會有期。

游絲

游絲踈地付輕狂，曳住韶華夢便香。記荊應能參慧解，敢呼小玉認檀郎。  
綺懷難識舊時春？夢裏銀屏認未真。明日相逢尊酒畔，絕憐花外倚樓人。

釋戡約作展重陽集于所居三步兩橋

錢秋天氣乍晴陰，罨靄溪堂挹遠林。轟飲每慚麩粟詔，論詩直欲反騷心。秋懷恰似

因愁展，藥色微嫌集霰侵。換盡流光餘悵惘，橋西負手一沉吟！

與圭翁結鄰情親，鐙火于其別也爲之黯然

簾影鐙痕隔院移，粉牆高柳兩家宜。辛盤糒盛供嘉客，細語艱危指覆棋。南嶽自應尊上將，神州畢竟有男兒。疲驢未許湖頭去，躍起龍泉莫後期。

拂曉過垂虹

巨浸稽天事可哀，眼中鐙火換樓臺。妖蜃貫日迎初霽，虜騎奔雲帶急枚。一夜新旛欣過市，百年殘劫總成灰。道人飽識無生相，目送滄溟去不回。

圭翁重來金陵，迓以四韻

不堪王粲賦登樓，掩淚臨歧去復留。依舊青山圍故郭，隨宜綠水和新謳。湖湘子弟兵間老，關塞風雲物外愁。刻楮三年徒自笑，西窗夜夜控吳鉤。

齋坐

習靜空齋百不知，野花山鳥共清時。無端一著興亡感，恰似楊花點鬢絲。

習靜

梨花淨白明虛室，山槿柔紅壓畫闌。風靜香濃猶嫩藥，始知春信勒餘寒。

莓苔冉冉上牆腰，微遣星紅破寂寥。花竟亦如人意倦，鞦韆枝情態勝垂梢。破曉新煙合繡櫺，繞枝鸚鵡話伶俜。夢回有相無生際，微染江南一抹青。

獨酌

簫聲漸逐楊花遠，軟霧輕籠芍藥開。未了餘情斜照裏，綠陰池館獨銜杯。

午憩層陰

不親麴蘖已微酣，坐向層陰老屋南。淺絳落花吹濺水，初黃新綠曳遙巒。夢回多事驚旋蝶，客去無因且閉龕。靜裏天機誰與道？倦聽梁燕話呢喃。

伏日苦熱乍發狂風知且雨矣

岫雲卷雨未全舒，先遣狂飈掃日車。辟暑正將藏藕孔，借閒暫許蟄蝸廬。懸知蠖屈潛將動，會看河傾急復徐。獨惜凭闌人意倦，北窗容膝自觀書。





# 高梧軒詩卷四

武進 趙尊嶽 叔雍

## 乙酉嚴冬幽居和陶形贈影

沍冬且藏壑，鳴蟄會乘時。東君扇青陽，消息庶得之。明鏡照花發，嘉辰會及茲。豈不媚芳華？願與明鏡期。云胡高樓上？鎮日結相思。幢幢殘鐙側，塊然傷璉珣。長言答天問，自信還自疑。天心惜勞獨，相依更無辭。

## 影答形

浮生去如雲，謀事老更拙。五年倏彈指，回首意欲絕。拯溺有本心，豈復爲世悅？一朝嬰塵網，甯後惜離別？獨居惟爾我，俯仰共生滅。忍彼冰蘖枯，猶此肺肝熱。石磔火自明，海枯淚不竭。持此較國論，吾道詎云劣。

## 神釋

治亂一循環，此理誠久著。死生自安立，寒暖迭更故。誰信有至人，拔宅脫依附。高樓青雲間，似與羣帝語。井蛙不爲卑，闔峯竟何許？但能守谷神，霄壤同可住。谷神專一

靜。外物豈足數？服食非所工，瓊竅更不具。全真還混沌，尤復泯毀譽。乘虛自悠翔，隨雲旋來去。既不勞屏營，更何所恐懼？本自無此神，息心攝衆慮。

丙戌立春

檻鳳笈驚事可哀！迎春餞臘夢難迴。十年錦字機中怨，六等刑章亂後裁。應罪盧龍真賣塞，孰矜李白道憐才？密書何況通靈武，司戶傷心坐敗來。

國論

國論千秋托紀綱，行朝五載閱興亡。范睢迄不爲張祿，紀信何曾叛漢王？霸越事吳原有待，入秦存趙莫輕忘。燼餘功罪分明在，杜宇東南早斷腸。

元夜

鬧蛾燈火事依然，未覺春長怯早眠。容易妻孥入殘夢，繽紛哀樂賺中年。兩潮鬪月爭晴夜，一雁無書負好天。切莫重翻荆楚記，東皇消息玉梅邊。

無題

荷衣薙髮影躊躇，角枕羅衾夢有無？百首詩篇慈母授，平生才調晚唐輸。汗青叢謗爰書泐，頭白孤兒淚眼枯。四十九年成一擲，隔窗燈火已模糊。

無題

連環金獸鬣闌干，迢遞銀虬薦漏盤。繞砌陰移春寂寂，捧湯人至步珊珊。樓疏斜帶三星遠，細雨微招一夜寒。知有家山夢好夢，今宵珠淚不須彈。

室人有饋

百六光陰第幾旬，荒雞破夢喚人人。細君遺肉憐方朔，髯老尋詩和賴濱。東市乍驚疑獄具，北門漸報羽書頻。幽棲得似禪扃好，法喜同教不染塵。

送春

樓高屈戌鎖朝暉，寂寂愁春晝掩扉。塵外鶯飛看草長，望中綠暗識紅稀。晨酣夢好非關酒，午倦風柔懶卸衣。便欲從今疏頌偈，天涯游子乍思歸。

疊和

花光仿佛戀春暉，小小林亭掩禁扉。石瘦苔青行跡少，林高天迥夢痕稀。無多勺水慳烹茗，乍斷晴絲尚著衣。莫遣杜鵑催客去，關河寥落更安歸。

再疊

疏林春盡賸斜暉，繾綣流光尚映扉。夢短珍叢疑欲謝，愁深芳緒故應稀。微聽燕語

難酬簡，遍拂緇塵未浣衣。三徑吾廬原只尺，海棠遲我未容歸。

三疊

殘紅猶解戀餘暉，故故移陰上短扉。窺鏡煙巒知去遠，趁人蜂蝶未全稀。巖更箕踞  
鐙迷座，隘苑星疏露逼衣。恰是欲眠眠不得，杜鵑破曉喚人歸。

四疊

牆高未易挹林暉，草嫩猶堪綴禁扉。健婦持門生事減，故人厚祿到書稀。江東寢殿  
傷銅狄，直北材官尚鐵衣。日涉小園徒嘆息，千秋功罪竟誰歸？

五疊

餘寒翦翦浣遙暉，過雨疏雲欲款扉。曉鏡漸憐霜鬢瘦，晨炊初辨蜀鹽稀。情如中酒  
矜殘夢，困欲生春試袂衣。綠遍樓前芳草路，王孫何事不言歸？

六疊

長街綠樹妒芳暉，不遣穠姿蔭短扉。斗室獨居惟睡好，虛廊晚語漸人稀。鶯吭未必  
輸歌席，柳色疑堪鬪舞衣。依舊少年心性在，夢痕零落不成歸。

七疊

流鶯乳燕弄晨暉，嚶嚶穿林欲扣扉。夢恨頻侵雙語細，花猶初放亂香稀。牆依薜荔  
疑天幕，禘隱芙蓉作地衣。凭檻不堪三月暮，未歸人老看春歸。

八疊

栢子桃花共夕暉，心清鎖院似禪扉。觀河皺面波同逝，踏雪留鴻迹已稀。兩戒山河  
消劍履，幾回社稷困戎衣。定中我更無多語，火宅前頭不忍歸。

和人送春韻

依前夢穩到江村，虹雨梅風綠一痕。未謝花姿臨寶鑑，猶青柳眼換斜門。難爭塵土  
矜殘霸，獨少壺觴醉斷魂。紫陌銅駝人意懶，送春消息更誰論！

一疊

卓庵拄錫已無村，墜溷飄茵尚有痕。暖雨吹人新白袷，細風梳柳舊朱門。江山只遺  
供詩料，鶯燕相從黯客魂。商略荼靡留得否，密持芳意與誰論！

兩疊夜夢上塚

遠連雲水近連村，北直塘河陰綠痕。慚愧羲之曾誓墓，飄零張儉困投門。樵斤已失  
松楸影，山鬼猶驚薜荔魂。賸有羈孤餘涕淚，青箱舊業不須論！

三疊薄醉

連宵凍雨似孤村，強著春衫驗酒痕。歸燕笑人違畫省，餘花傲檻護柴門。煮蒿隴外傷雄鬼，瘴癘江南黯旅魂。草草杯盤人已老，清歌明月事難論。

四疊偶憶玄武舊游

雲迷洲渚水連村，勝賞曾留蠟屐痕。茜藻繁波舟滯客，朱櫻落霰樹當門。初熏風引江南夢，殘血鶻啼塞北魂。幾度金陵王氣盡，龍蟠虎踞更休論！

五疊答贈荔支

荔子丹黃別有村，珠江夢好已無痕。離離側挺花穿葉，泛泛初晴水上門。笠屐嶺南知有恨，塵沙劍外賦消魂。多君雙蒂殷勤贈，江綠藍紅子細論。

和章孤桐

未嘗學劍不工書，攬鏡青銅笑故吾。六國丸泥謀已左，九州鑄鼎計微疏。林亭漸覺隨人瘦，鷹隼難堪鍛羽初。猶是烽煙三萬里，從君欲乞辟塵珠。

移居和客

羲娥縱轡事難詳，倏送春暉換曠陽。早攘羈懷甘枳棘，猶存辣性比黃薑。覆巢已分

千家哭，畫地難爲一夜涼。更自雲英愁不見，欲從何處乞瓊漿？

有贈

原知衛玠好風神，喬木猶堪蔭世臣。論議桓寬先給足，文章庾信最清新。踏歌宛轉醇醪厚，歸騎郎當蹴踠頻。相與平生誠有分，南冠莫共笑勞人。

有贈

疑獄庸知事可傷，相看欲斷已無腸。餘生豈竟沉冤海，一夢差同入醉鄉。明日州前搥大鼓，幾回籌外換紅桑。澗阿只擬甘肥遁，李白何曾老夜郎？

丙戌午日得穎川哀耗

一瞑從教萬客哀，十年難盡百腸迴。江山孰任傷沉陸，肝肺無私蒸死灰。復楚不矜猶有罪，沈湘獨往更憐才。啼鶯駐馬闔門路，不許堂前老吏來。

其二

三年江海共棲遲，幢節精嚴數舉卮。賓退萋弘啼蜀血，詞成屈子托湘纍。廣陵散後絃應絕，上蔡人亡事可知。早分韓彭付俎醢，漢家功業自明時。

追念昔游獨居棖觸輒系一詩

躍馬橫戈最少年，歸來青鬢惜華顛。腐儒困學承家法，逐客傳經補外篇。竊祿遽憐三昧戲，心齋未了半生緣。久疏醇酒爲多病，過盡飛花不礙禪。

槐堂殘醉染襟痕，老樹疏花接苑門。讀律師承嫌鍛鍊，工文家法自高渾。飲鳩端爲蒼生渴，嘔血方知獄吏尊。去日壺觴慳一醉，巖山心事與誰論？

奕葉交期廣雅堂，廿年花底共壺觴。陶朱曾以貧爲累，管仲能知富致強。建節兩番辜晚歲，密書幾度抵南疆。傷心四月城東路，握手臨歧送夕陽。

望中宮闕接蓬萊，複壁巾車獨往來。與虎謀皮誠不易，騎鯨入海正堪哀。羣狙喜怒尋常事，一士安危未易才。淒絕道前街上月，籠紗絕筆忍低徊。

搖落人間萬事違，支離楚客獨言歸。黃墟夢好難尋醉，白袷初春不上衣。卅載功名了殘夢，平生心緒揀斜暉。東窗讀易知無過，長記相逢晝掩扉。

避兵藕孔嫌多事，不食熊蟠自欠伸。出世輕于舟一葉，歸鞍猶共酒三巡。丹黃庫本珍初槩，鶯燕妝樓負好春。賸有江湖遺集在，夜深掩卷獨傷神！

善戰真教伏上刑，西流同過小池亭。第昆海內矜雙玉，將士軍前殞一星。每念垂楊生左肘，難忘細柳認空營。徐君挂劍吾知愧，薤露歌成宿草青。



長身髯戟識清娛，老樹當門認故居。驚座夙推天下士，憂時不廢古人書。頻煩著艾求醫國，每見勞薪曳後車。病榻吾能輕一諾，燕雲規復莫踟躕。滿腔熱血惟忠憤，歷劫冰心擲亂離。自任千鈞天下重，人驚一士世間奇。孤懷雪涕頻相共，殘醉沾襟忍再披。說與泉扃應腹痛，迴車無語對臨歧。鐙火相親過小樓，孟嘗賓客足風流。相如檄蜀傳殊俗，鄒衍談天數九州。誰信餘生膏斧鑕，夙看華屋當山邱。從今抉目城門望，麋鹿姑蘇又幾秋。

丙戌九日移居醫樓和客韻

坐看落葉認深秋，桓景臺荒莫漫由。幾見萸囊能辟世，賸攜藥裹賦登樓。餘情江海憐雙鬢，斷夢邱山負萬牛。猶辦新詩酬永日，未須風雨寫離憂。

贈朱赤子

交親共晨夕，風義夙期許。叔季乏知音，此意誰可語？豫讓甘漆身，夷門伏劍死。酬恩匪異人，伊古許國士。生則役羈縻，死則甘棘枳。意氣薄雲天，賢哉朱赤子！

黃任之粥字療饑詩以寄志和答四韻

居士觀空植勝因，屢屢藜藿自甘貧。盜泉卻飲時存戒，掾筆生花意出新。維社披圖成惋歎，鵝溪買絹亦艱辛。硯田寫盡興亡史，白髮尊前更幾人？

丁布衣後人觀萍法曹屬題所書甲骨文冊子

決獄誰知赦不經？圖扉生意草常青。于公自是多陰德，傳世名家受一經。  
檢點人間幾海棠？囚山絕學費商量。班書范志都刪盡，直溯高宗伐鬼方。  
幾日恩恩便賦歸，高情原與世相違。買山合往尋花塢，低首平生老布衣。

丙戌十二月初十日新元雜書

元正頒赦書，大辟皆除死。歡聲騰禁扉，開戶咸倒屣。羣生竚德音，雪涕讀片紙。云何鉤黨誅，不若奸與宄？謂彼竊鉤者，可以承恩旨！將此比竊國，必欲肆朝市。所爭在名位，所恨奪朱紫。勝敗旣攸歸，吾心如止水。甯復恤是非？願以質良史。

萬木欣昭蘇，餘寒罷風雪。惟此請室間，猶未見萌蘖。恩恩歲華逝，國事付饜饕。喋血或朝市，故好多永訣。不堪念家室，咫尺千里別。破巢幾完卵？夢斷惟泣血。一飲屢更匝，一飯且數噎。以視吐櫛勤，強顏致歡悅。此生幸不廢，將復捫吾舌。

小陽舒微陰，黥卒走相問。謂適是元朔，捧手迓景運。吾生誠不辰，功業有定分。已傷

伏櫪心，騏驥甯振奮？中年患哀樂，學道泯喜愠。迴首舊長安，俯仰祇日近。塵埃困百斛，方寸敢自紊。延年謝意美，吟嘯課清韻。慰我無多言，待我酒泉郡。凌虛有高臺，臺高亘十丈。極目觀海色，俯瞰接廣壤。獨不見家山，煙塵空泱泱。九達驚錯織，樓宇自軒冕。熙熙樂晨夕，吾意不暇賞。已堅物外心，不著鏡中象。興來叩碧翁，歸路乞晴爽。停雲杳靄間，作意竚虛幌。何當共絮語，執手披鶴氅。

### 舜兒北戍

彌天關塞更何之？一劍龍堆雪滿時。莫忘而翁行役地，十年辛苦豎降旗。樓臺寂寞梅初放，天氣沉陰柳未黃。籬落前頭猶識汝，鬢絲差較去年長。松花江白天如鏡，羅刹城荒鐵作麾。制敵別傳心法在，汾陽單騎是兒師。征人寸草戀春暉，拜母堂前尚鐵衣。見說巡邊能緩轡，解顏猶盼阿翁歸。

### 挽章

交親二十年，轍迹共四海。一樓逾百日，荷校坐相待。世人雖驚鄙，反躬曾不悔。巨浪驚天時，砥柱甘坐罪。以此責吾曹，吾意自有在。

君辯教儀秦，君才視管葛。沈機庶上智，闊度亦豁達。惜哉時數奇，喪亂事難遏。強欲

致太平，陷穽不自拔。千秋碧血殷，巾淚共一撮。  
平生溯歌酒，意氣自殊勝。屏山孔雀閑，篇什每酬贈。竭來共晨夕，媚學發佳興。忽焉  
白日邁，珠玉斷笙磬。坐使秋蟲吟，淒其泣清聽。  
驚閱服上刑，策杖方病起。得誦君遺言，論政直如矢。猶似讀君詩，詞旨盡流美。神完  
氣自充，誰信殺一士。嗟彼中興年，坐惜黃鐘毀。

露臺就曝

崇垣繚露臺，臺高逾十丈。千金完傑閣，不作文帝想。文帝除肉刑，大德著霄壤。條侯  
終嘔血，厥咎藏甲仗。爰書反地下，此意自怏怏。流輩佐中興，乃使伍笞榜。爭必在勢  
位，罪豈計直枉。感世亦銜冤，何復覲板蕩。天道當有待，違問事消長。不如安赭衣，曝  
背自來往。

贈和姊

一別經秋淚眼枯，臨分長記費踟躕。誰知細雨殘年裏，猶及靈均兒女憂。  
五年敢自負東南，捫腹能容百不堪。猶有家人知見厚，庭隅片霎足清談。  
至性何容話苦辛，死生骨肉最情親。藁街尋政無人識，盼姊來收劫後身。

弱弟相憐影似形，讀書長共一燈青。恩恩卅載年光擲，頭白何堪話訟庭？  
行行綠樹南陽路，蒜髮相依弄夕暉。爲問舊巢新燕子，可還識我舊簾幃？  
堂前松栝已成圍，老僕黃鬚盼我歸。莫向空王論成敗，靈光終不廢崔巍。  
阿弟新來鬢亦霜，不平遮莫訴干將。泥塗畫地無多好，猶挾殘書逞夕陽。  
相看掩抑問諸甥，總角垂髫盡長成。問世余慚官裏去，應知食力勝浮名。

寄舉兒（舉即文蔚）

讀書頗自參神解，詞課差能法本師。雅學蟲魚曾授汝，扶闌怯步上鐙時。  
戲綵娛親事可爲，吹花嚼蘂舞僛僛。獨憐土室無鐘鼓，臥想華堂奏管絲。  
鴟鴞毀室萬家愁，將母持門又一秋。祝汝杏花風信裏，重攜殘醉上雲樓。

無題

餓吏當庭獄始成，丹心無改世情輕。夷齊周召同邱隴，自信千秋有定評。  
已無密勿堪謀國，賸有殘年不治生。笑語兒曹應解事，老夫力拙罷心兵。  
交親直分天涯隔，姓氏驚傳四海知。習靜觀空知我事，點睛破壁更何時？  
天際真人孰與儔？性靈文字亦風流。此身長繫心猶放，仍作雲天汗漫游。

不堪事業付消磨。雪鬢雙鉗恨已多。說與餘生知幾日。浮漚只作夢中過。  
浮生寂寞等禪關。擲眼婆娑更不還。猶賸多情難見屏。隔樓煙雨擁家山。  
料量生事最艱難。強遣詩書意自寬。休憶潑茶兼賭字。王孫從此御南冠。  
太湖風急當晴日。焦麓煙輕裊客帆。攜手清歡成往事。來生同聽燕呢喃。  
憔悴緇塵輕出世。縱橫老淚話遺家。兒曹奉母應知孝。莫更書堂喚阿爺。  
梅花怒放春如海。竹葉長青雪剪花。思婦樓頭休暗憶。鯉書日日好還家。  
孤憤刪餘不入書。故將好語托雙魚。支離眠食心常足。咤叱風雲願已虛。

藏書被劫憤寫長詩

生平聚書不聚寶。鐵函錦篋搜奇珍。大如蜀刻逾球壁。小皮中箱亦萬緡。遠紹科斗  
開篆隸。近訪殊域兼時新。青氈餘澤席世業。後來居上似積薪。丹鉛卅載勤戡校。含  
毫點乙知艱辛。蘭荃微尚猶所托。倦眼日與鐙火親。有時冷坊獲殘槩。恍如衰世觀  
鳳麟。連城充棟不知足。儘謂文字將療貧。畢竟煮石難爲食。撐腸滿腹徒吟呻。自分  
擁此足娛老。夜行炳燭光燐燐。高明薄福天所忌。瞰室有鬼搖青燐。向來護藏始誨  
盜。文物遂爾淪荆榛。同遭屯蹇悲雪涕。奪我所好傷我神。晨捆載付力役。亭午遙

聽車麟駟。精粗鎮庫一不辨。惟知爭取孽狺狺。韋編已絕競躡跋。鐵搗垂折埋沙塵。  
叢編罔或顧。缺逸梨棗顛倒壓。輪囷遺芸散。麝猶在室。委珠棄玉紛郊埏。茲事直同  
秦火劫。胡然天狼犯句陳。又如逆金輦花石。汴河絡繹排艗輪。家書啓視乍失色。省  
讀數四行逡巡。生坐官事已寂寞。所望卷帙供陶淳。豈意卷帙亦俱了。一疏文字空  
吾身。吾身幽處不足惜。抱道終使屈蠖伸。瑤林雖燼道有在。會看赤帝誅暴秦。未須  
吳興山鬼哭。寒山還許作主人。

三年

三年無語報平安。獨滯羅衾向夜闌。自省悲歡常有恨。已知魂夢見應難。銀屏珠箔  
能忘妒。湘瑟秦簫不盡歡。歷歷星榆窗下路。劇憐翠袖恰天寒。

淺笑

淺笑輕顰付寂寥。夢回不忍憶中宵。背人密誓千尋水。泥我橫陳一捻腰。帶岸雲根  
瑤草秀。當街風逞玉驄驕。輕拋影事猶心上。再世知能見玉簫。

雪夜讀孫吳兵家言

少不習兵書。長不預戎備。悠悠五十載。真復辜壯志。偶然收放心。養晦世共棄。開卷

課臚起，卻欲出新議。奇正勢易奪，勝負無常帥。爭長在民心，善者天所忌。澄清誠宿願，功業豈難致？一旅應已足，一成國之始。觀兵遜耀德，綱紀或廢墜。斯理或不詳，竊謂非上智。戡亂雖自失，吾意向姿肆。殘燈積雪間，伏櫪笑老驥。

讀鬼谷子

與戎不必勝，耀德不必亂。行道貴有術，著撰失神算。智哉歸谷師，陳義最廉悍。威治端所趨，王道植基幹。內隱逆心意，貌取務果斷。揣摩習有餘，詞令自浩瀚。突出排時流，矜異似傲岸。平生學從政，每每遵患難。亦知疏涵索，斯義未淹貫。劫來困塵俗，古訓托咏嘆。不嫌日如歲，經畫尙尋按。知幾庶能神，吾思忽過半。

和人

積霰層陰怕不晴，春融殘雪拂吟情。微嫌日上酣猶足，靜看池邊緣漸生。挾策孤懷空負手，論交斗室自深盟。蟄龍未了人間事，且起巡簷聽漏聲。

立春日遷居新舍

殘更數盡復無言，月轉參橫隔斷垣。微聽荒雞催客醒，漸看野馬逐晨暄。中年久擲無情夢，三徑真成不窺園。試檢歷頭尋甲子，驚心春好負花幡。



移居示仲

同樓四十旬，晦朔慘對晤。余罪且不赦，知與物情忤。微祿難爲養，晒汝亦黨錮。抄連涉瓜蔓，元佑事可數。一室相煦燠，每每得將護。視汝同吾幼，親好情盡訴。偶然拈吟課，輒復出秀句。長廊短席間，時獲共酒脯。

恨天不憖遺，驚聞若翁赴。若翁不世才，山澤避當路。銜杯消永日，弄翰屏世務。金張比門閥，怡悅甘韋布。國士蒿萊間，墨經疏禮數。哀哉父子情，訣別頃刻誤。陳書請手足，酷吏徒牴牾。遂教廢白華，留作終身慕。無詞致慰唁，忍淚祇相顧。

倏復與汝別，移居等流寓。文山兵馬司，綠樹蔭廢圃。猶喜倚明窗，幽韻時流吐。此間差足勝，整飭異禁庫。讀書樂我淨，官食無餘具。羈棲似作客，塵土未見污。惟念汝殷勤，瘦骨服縞素。願試進粥糜，勉自抑愁苦。旬日脫樊籠，餘哀差可籲。

兩家權禁網，弱女遂失措。苴間同竄逐，將母慰驚懼。晨興饋饘水，鐙夜苴牒訴。又丁君舅憂，黽勉奉大故。棄家一年半，舊巢換煙樹。此日行且歸，歸視汝婦孺。少卻別離情，微共林壑趣。敬止事萱室，厚德絲奕祚。繼志慰九京，莫使楹書蠹。獄事待平反，庭尉正審度。斡旋並相責，雁字竚朝暮。

夜夢張孝若

江南江北兩書生。少日文章動老成。奇禍何辜甘一瞬，危邦自蹈坐浮名。頽波赴海蛟龍泣，貫索衝霄燕雀驚。得見春衫猶似舊，鐙帷許更共詩盟。

送金雄白

世情到此應能識，生事從今莫漫言。迸盡千哀歸斗室，相看一笑偶諸髡。堂堂莫負男兒志，了了愁懸春夢痕。償盡期年恩怨債，會看驚鳥更翩翩。

# 高梧軒詩卷五

武進 趙尊嶽 叔雍

## 讀明季北略書後

養寇以自尊，玩敵以自利。寇則使坐大，官乃致高位。亦有好男兒，英發振武備。一生盡忠貞，匡濟終不遂。犄角不爲用，首尾相捐棄。忽忽二十年，逆勢益僭恣。鼎移龍上升，祿厚禍亦致。吁嗟申西間，梭夾窮途淚。

縉紳何峨峨？士論辯長短。所爭伐同異，所據似悃款。按之實陳腐，未足益勝算。豪情或四海，抱道苦自滿。蠻觸鬪蝸角，天斲國脈斷。翦姦固大忠，安命每蕭散。狂瀾終難遏，急劫不容緩。獨惜混賢愚，瓦礫雜圭瓚。

籌邊應易爲，固圉不容懈。海岱本天險，豈必恃岩峩？廟堂不識人，愛憎使草芥。節帥矜元功，傾軋事益壞。建州出真人，行師豪以邁。收京平劇賊，十載撫兩戒。天命疑攸歸，青史數成敗。誰實啓其衷？降臣弄狡獪。

逆璫肆慘酷，士類盡玉碎。淚灑草莽間，民德漸衰背。思陵少倔強，初起功蓋代。客魏

並誅夷，向用多名輩。奄小不足數，重能納忠誨。深宮棄太阿，茲事殊自昧。積重苦難返，漸復涉陰晦。哀哉王承恩！就義獨慷慨。

靜宜常日課書全，唐詩倦則負手花前茗吟。自遣習靜忘言闊，別三載此景長在目前賦四韻寄示。

瓊窗玉戶絕塵侵，愛寫唐詩每自尋。草色隔簾遮細字，花時負手玩新陰。杯嫌味淡頻添斝，煙趁愁疏一散襟。靜裏天機知愛好，猶耽佳句付行吟。

靜宜饋遺至

別後難爲一解顏，眉痕猶喜見弓彎。無多細語平安好，強說幽居自在閒。撫景漸同流水逝，勸君徐趁夕陽還。應憐臣朔長饑相，手負饘筐鬢亦斑。

就家人索詩韻，猶舊藏也。重見劫餘悲喜交集書之。暉背

此亦秦餘種樹書，芸香錦襲最憐渠。彩鸞細字兼箋釋，平水新篇辨疾徐。斷句三更邀短夢，長城五字寫幽居。變風變雅蕭條甚，猶爲商聲一起予。

夜讀張水部詩後記

鐙火囚山足自娛。書生積習挾詩俱。從容夙好元長體，雅正能傳主客圖。此日已成

巢幕燕，有人起聽夜啼烏。彌天水部空低首，獨倚疏檣擊唾壺。

裴伯謙戍新疆探河源著河海崑崙錄文極駿肆鄭韶覺其弟子也攜入禁中

以自遣遂屬題句因賦排律

乘鷲夜醉崑崙月，鳴珂曉踏皋蘭雪。穆王去後璣珠宮，博望行前閉金鑰。遙知御氣  
肇鴻濛，旋識分維善溲沔。稽天巨浸約橫流，一綫初痕長山骨。茫茫獠狃始孳乳，芘  
芘草萊以萌蘖。萬方離垢判滄溟，閱世猿猱構巢窟。宓犧太昊倏代謝，夸父女媧幾  
顛蹶。籀書汗簡亂千番，獸跡烏躡拱雙闕。嚴冰本自窮陰始，野燒未減益火烈。俗客  
不許身往窺，羽士何祇神飛越。閔茲奇蘊障霓旌，長遣化工封絳節。謫官何幸覓濫  
觴？狂客竟得瞻截業。振衣遽小千仞崗，犯海數渡迷津筏。叢爾生涯祇穢瑣，夥頤世  
情遽恍惚。勛名不逮水中漚，功業敢誇駟及舌。浪游我亦繼茲感，梗泛君先去如瞥。  
穹廬豹尾坐可汗，小隊銀鎗尊典謁。忘情故事憶趨蹌，過眼遺文失剗剗。北征劫後  
只詩存，西笑人間向誰說？悵經文武遞羸鎔，薄彼湯武罪稷契。成王敗寇付簡竹，斂  
手深居竟縲紲。九流自爾廢章句，千夫坐視污膏血。已疏百癖遣離憂，惟有一編供  
怡悅。雲萍歷歷恣汗漫，影事重重追馭觚。叫開闔闔指杓辰，喚起鳳凰舞丹穴。臥游

未須償絹素  
象，底事衷  
鵬同放軼。

鄭韶

莫遣星沉  
東市獄，采

屢問

嬾披白練  
嬌融粉，遠

東坡

老去困吏  
意氣盛，國

夜讀

築堂四十

識晚節，霜雪所勿侵。東君司陽和，碧玉重抽簪。謾謾每自振，竽籟奪好音。親人泯天機，結巢來嘉禽。持觴藉芳草，此樂抵兼金。一朝憫離亂，俗情隨淺深。世網未獲解，拄笏脫巾簪。榮利詎所屑，棘枳安本心。束身委司敗，夜起整衣襟。細讀坡翁詩，清韻流蕭森。望迷龍鸞姿，倚檻不可尋。蒼髯白甲叟，惆悵亦至今。徒然寄懷想，寤寐發長吟。

再用東坡醉墨堂韻題西樓帖

十年吏事患辛苦，一定幽累作小休。褐衣犢鼻已云賤，妻子戚鄰空生愁。背塵養性難自己，驚開西樓眼爲漶。玩書乍奪全牛勢，琢句疑逐天雞游。書爛放筆貴適意，詩通齊物工解憂。燦如閩峯出星宿，甘如窮子羅珍羞。和如春花沐時雨，得如擴獸奔長邱。天吳紫鳳紛海若，南金東箭萃揚州。被珠懷玉樂有極，得此將復無他求。麝煤響拓供涵索，放心詭論俱能收。坡翁瓣香八百載，石墨惟此稱最優。容吾邯鄲窺步伐，寒宵凍指臨霜凋。

春暮嘗新

生涯隨分年光去，婪尾蘆芽殿晚春。更有江鮪佐薑芥，客來辛苦勸嘗新。櫻桃豔奪磳磳穎，燕筍尖抽白玉簪。風味老饕渾忘卻，喜從尊俎見春深。

乍憶金焦舊游用東坡金山寺韻

二十年前貴介子，好弄扁舟放江海。竹杖芒屨不辭遠，松溪蘿徑知何在？潤州古寺老頭陀，深嫌江海狎風波。勸我習靜專一壑，塔鈴振處天花多。行參猶記曳雙屨，映發中流看落日。蒼蒼萬綠翳層霞，奇景山圍齊眩赤。偶來急雨打頭風，遮卻雲頭片時黑。風回雨止寥空明，彩虹倒挂羣鴉驚。碧翁幻象誰能識？不信浮雲易方物。細看還復是此山，化人天游足警頑。尋幽繼勝其可已，攝心試品中冷水。

學書用東坡墨妙亭韻

巢居深靜如邱陵，大千隔院春膏騰。老懷尙蓄餘健在，夢想猿臂鞬雙鷹。挽強射中事已渺，霜毫猶許風生稜。八分試與窺程蔡，篆籀直欲承斯冰。手盲自愧五十載，銀鈎鐵畫將安憑？此時忽然試薄技，書成展卷徒生憎。譬如珠璣雜珉瓊，直以紵葛亂綾繒。門牆翼峙雖入望，堂廡廓落誰許登？已嫌孤陋少契賞，更恨攻錯無良朋。關心寂寂墜簪井，適意丁丁絕纜藤。臨池聊以送晚歲，響拓試且就明鐙。籠鵝道士莫見怪，潑墨如海徒撫膺。

梨花絕句蓋山谷書奉外舅孫莘老者少游有和作錢梅溪得之高郵遂付石



墨韓城師禹門跋謂嘗見闕刻三十首與之大同小異然山谷少游兩集均失載豈編集時未經收入耶余頃就梅溪叢刊玩讀之書法猶山谷盛年時筆意詩更蔥蘢饒得五代間柳枝餘韻春陰浣誦試和繁聲以消長晝至用韻微異者則從山谷

漸看穠陰覆薜階，一枝玉樹倚闌栽。愁春未必愁風雨，故遣梨花鬪雪開。絕憶山城弄壁姿，嬌桃穠李敢爭奇。東風淡到無人處，顧影前溪月上時。

生平所見梨花以月夜過

金華時尚最盛刻不去便

陌上閒看鬪草輸，比將顏色總難如。原非薄怒佯嗔事，一樣啼妝恨有餘。近迷曉月疑無色，輕蕩疏檣別有香。素靨纖纖春宛宛，夜深窺我讀書堂。家園一株淡絕可愛春衫花下最相宜，莫放壺觴日影移。料峭紅襟渾不去，好銜香藻最高枝。莫嫌春色只平常，淡逐雲間靜有香。能幾番看風雨外，怕隨鶯燕換年光。團團玉藻點雲裳，好送幽芳過草堂。絮亂風輕撩倦客，夢中肯自去愁將。明珠糝雪紵裁花，粉鏡前頭漸茁芽。莫道踏青裙履好，凡姿空自笑吳娃。冷峭銀橫一樹花，北梅差與鬪穠華。若教移植燕山路，萬水千山儘憶家。

前村好襯酒旗紅，楊柳陰中露玉容。一抹遙山銜夕照，微赭素面浣斜風。

午日颶風中感逝

難尋楚客共傳杯，逝水東流未肯回。海雨天風迷故國，蠻煙瘴霧鎖樓臺。已知買誼終無策，孰謂高陽信不才。蕭艾只今盈望眼，莫從荃蕙訴餘哀。

家人以新茗見貽用東坡和蔣夔寄茶韻答之

簿書粟六喜絕緣，科頭跣足隨所便。只嫌官食不足具，興來時或羅甘鮮。細君饜我花豬肉，媵以顧渚烹芳泉。鳳團龍餅久無分，眼明倏覩輕甌圓。乳新花箔動微沫，綠沈葉細翳長川。漸同諫果奪至味，頗擬歡伯鬪華筵。停湯乍沸初入手，清韻再品將流涎。平生此道吾不尙，旨芳茶苦罕尋研。獨居習靜自茲始，繩牀直欲了窮年。酒香稻熟付寤寐，旗槍况復當春先。聞之尤物近難致，論斤直逾百萬錢。舊攜龍井每盈篋，今日慎莫輕腰纏。尙慳中冷水一勺，文磁活火相熬煎。拋殘心力償妙趣，得謂識小猶其賢。解事盧陸去已遠，鈍根強欲辨媿妍。佳人佳茗試續句，且膏枯吻煩雕鑿。

馮若飛致意拳拳遂憶春明舊游用東坡寄王晉卿忽憶寒食游北城韻

王城薄祿官事微，征車晚逐香塵飛。炊煙冉冉肯賦歸，躊躇每勒金鞍鞿。清言四座

珠玉珮，詩成漏靜露未晞。從容尊俎塵一麾，桑海十載去檐帷。灰心忍事夢已稀，游舊誰復念輕肥。知君解事采葑菲，頗憶故人寬帶圍。朝夕粗糲陳蕨薇，猶出新句歌緇衣。

舉女送冰至口吟三絕句

乘肩小女呼郎罷，淨洗銀瓶翦玉花。畫地不忘溫清好，摩挲老眼挹瑤華。  
輕衫觸熱萬塵侵，檻臥難教一散襟。知汝別含深意在，欲從鐵骨見冰心。  
信是千年一老冰，欲將晚節傲凌兢。東園看盡閑桃李，不及松堂月半稜。

用東坡記園中草木十一首韻以記家園花木之感

日涉五畝園，恍如友俊彥。寂歷四十載，華實玩時變。偶然攜尊俎，風雨未言倦。興來一揮毫，清韻落吟卷。世事儘碌碌，吾意常婉婉。倏然遭世網，茲游不得遣。雪涕傷友生，隱恫惜瓜蔓。盈眼蕭與艾，非復舊蘭畹。課花如簿書，作計未爲晚。

先人植雙栝，偃蓋夙成林。盤桓撫手澤，喬木意殊矜。一枝橫半畝，蕭散不自任。柏屏相頡頏，謾謾動素襟。下復藝幽菊，老圃娛巾簪。雞冠紅欲滴，閒映秋色深。君子重晚節，斯道誰能興。滔滔問舉世，衆醉愧未能。  
栝

高士愛修竹，漪漪足娛老。吾家百十竿，子猷當絕倒。緣牆疏復密，徑曲意獨造。將以障俗塵，竟奪廊廡巧。初春試覓筍，茁茁露幽耗。一夜風雷生，新筠透豐草。竹

六梧干雲霄，兩株尤聳拔。南榮早蔭樾，筆立向天插。圍以草繡球，當春正萌蘖。淡紫落蒙茸，綠陰漸婉約。泥金帖地錦，抽條顯活潑。猶恐白露零，一葉見搖落。梧

蓼花臨素水，每賤菰與蒲。秋光異三春，嬾接蜂蝶鬚。茆亭映丹楓，半樹老漸枯。此景真靜好，恨不瀕明湖。綠湖買斷岸，想望舒勞劬。何當償夙願，先製神樓圖。蓼

生平愛梅花，冰雪不嫌早。花開傍南齋，足伴幽人老。殷勤閱歲序，鐵骨幸未槁。日日衝寒行，飢馬似戀草。敢復希廣平，自矜好懷抱。還且貯翠衣，苔枝夢衣縞。梅

海南有瓊花，航輦羅前廳。搦篠爲綉架，寶土加密釘。三伏花盛開，嘉賓遂盈庭。爭看頃刻事，幽豔傷蛉蜻。朝菌不知晦，白髮難復青。于此悟代謝，熱腸自冷冷。花

海棠高兩丈，芳譽重東南。吾家當花時，杯罍傳芳甘。徘徊不忍去，油幕春陰涵。拈詩或一笑，明媚插筠籃。北梅臨風瘦，隔院殊難堪。持觴亦相酌，無使對客慚。海棠

京華老作客，花寺常優游。劇賞丁香苑，負手玩清幽。故園有雙樹，移自北道溝。風微好春動，兩勁亂條抽。素華團作絮，醜榦癭如虬。有影信成水，佳句吾欲偷。香

年時大覺寺，歷歷猶在目。西堂發高葩，挺秀出林麓。雅素泛微馨，皎潔逾白玉。顧彼十尋姿，奪此一庭綠。以視吾雙鸞，鄴泉比蕊菊。小園涉成趣，清韻容擊筑。亦足娛我情，殘夢每心曲。註

小山植叢桂，深意誰許知？閒讀招隱篇，願言君子悲。疏籬繞衡門，平陸遠江湄。亦有十餘樹，灑落見襟期。清影亂月魄，浮香共蓀籬。靜參金粟禪，無言更忘機。註

楊公濟梅花絕句東坡兩和之茲再賡賦以寄余懷

偏從風雪見陽和，一笑南枝意獨多。相看溪山重疊處，師雄醉眼奈狂何？  
繡幕冰心貯玉臺，重重紙帳爲君開。塵天不假庸脂粉，自撥猩紅點綠苔。  
別去重看第幾回？黃昏細雨驛前開。天涯得似江南好，長使幽人繞砌來。  
不飲長教伴玉尊。檀心的的共晨昏。十年花送佳人老，借東坡句贏得詩人最斷魂。  
傲骨矜持第一花，笛聲起處壓簷斜。許將換月擎雲手，移植孤山處士家。  
瓊枝映月每先開，玉殿無勞羯鼓催。暖霧夜深如解事，盈盈遙送暗香來。  
尙許雲屏見玉肌，三年苔翠鎖空枝。相思淚眼無家客，藥店飛龍祇自醫。  
故遣殘英帖地飛，朔風妒盡上陽枝。紅羅亭子原多事，愁到家亡國破時。

未忘雙影綠毛輕，玉檻冰紈照眼明。百六春光容易過，此生留待說無情。  
漫憶傾城不憶家，巡簷夢到月初斜。縞衣知有冰霜骨，耐盡清寒尙著花。

示仲

城南韋杜矜門伐，江左鍾王值亂離。莫問冰清向玉潤，憐他樂廣尙長羈。  
當門燕雀靜無譁，吏散賓亡似放衙。只有輕裘羊叔子，起居不廢夏侯家。  
彌天四海識詞仙，山抹微雲句最妍。一自黨人碑刻後，幾曾蘭畹話尊前？

和曾錫鏞

更無心緒撥殘灰，煨芋虛堂數舊哀。舉世應慚崇九錫，獨居誰與共千杯？  
熊熊烽影迷關堞，寂寂潮聲暗海隈。休擬罪言狂杜牧，囚山詩筆自清才。

夏夜行散再和

心同殘蠟漸成炭，猶向人間賦七哀。不信賭棋直擲墅，忍循曲水憶流杯。  
風情落漠禪初定，夜氣迷離天一隈。隔盡短牆餘悵望，海山能幾供詩才？

丁亥中秋

每從瓊牖賺清光，不見銀蟾照屋梁。三度中秋真落落，百年好景自堂堂。  
難爲雙照

誰相念？愁牘單情尙許狂。贏得低聲歌水調，瓊樓玉宇祇尋常。

舉申以鉅餌雞舌見饋

官食難供況酪漿？風來每憶隴頭香。阿爺憔悴塵埃裏，寒具今朝始再嘗。  
長街獻歲恰迎春，妮子牽衣逐馬塵。胡餅夜深風味好，重嘗夢憶劇酸辛！  
滋味難教與俗宜，平生冰蘖課諸兒。偏將雞舌殷勤至，棖觸清談縱酒時。

八月十八日潮神誕猶記與靜宜海寧之行

荏苒三年別，低徊百劫身。蛟龍疑世遠，風露溯情親。夢趁蓬濺玉，潮來舴潑銀。幾番滄海外，聞道尙揚塵。

五十生朝放歌

高旻遽鑿混沌竅，煉石媧皇亦長嘯。黃雞白日坐催愁，寶燭銀蟾逐殘照。堂堂百歲乍過半，寂寂三秋餘自笑。未須離亂話艱辛，輒記承平溯英妙。傳經總角識家法，草檄寰區窮典要。偶然拔幟樹中原，更遣車脂走邊徼。清言麗句出雅頌，入破轉頭擅宮調。岸巾磅礴漉酒腸，蠟屐從容覓詩料。馳心動與前哲合，觀政每致多士拘。歸來灌園補花竹，旋去間關當虎豹。丈夫何意賤溝瀆？壯志甯肯負廊廟？一麾尊俎靖煙

塵萬慮樞機安海嶠。哀兵倖勝事倏忽，悍將矜功恣嫉媚。中興父老念小康，移國京畿付大盜。苟利社稷敢自恤，微哂黎元阿俗好。謂甘復楚污緇塵，差勝逃秦老皂帽。風雷午夜誤壑松，車轂積途陷泥淖。夜郎太白比長流，師魯渭州忍重到。刑曹捧牘對削瓜，孺子仰面餘擲玃。初春柳綠困青眼，冬晚菘根薦寒銚。靜娛白駒穿墁壁，亂舞黃塵揚土竈。境幽夢短據蒺藜，神王篇成擬奧突。抱躬天爵彌可貴，鑠口人言會當掃。側身轉覺天地寬，玩世猶耽泉石好。嬾揮彩筆寫珊瑚，閒竚文梁張玳瑁。俗情淡盡勉拂拭，豪語粗忘尙桀鷲。琅玕廢圃發新枝，荆棘圍城持玉貌。山妻倘發葡萄尊，明鏡蒼顏鬪年少。

九日廢酒

霜勁秋涵玉宇高，樓深寒壓劍光豪。潺潺逝水循殘岸，歷歷斜陽沒斷蒿。舊賞園林猶藝菊，餘哀籬落廢投醪。崔魏未必知人意，且坐西風讀楚騷。

往歲十月十日令節 先公必張宴款辛亥參與密勿諸公且傳觀遜國文獻

爲一年盛事余小子亦輒侍末席晚歲耆彥彫謝始廢其事屈指蓋三十年矣丁亥節日追賦其事



明時歌酒每續紛，拔幟中原記義軍。借箸騶虞真徇國，長箠方相竝酬勳。閒開柱下  
恭王壁，重理周初汲冢文。垂手書紳猶記取，卅年花外日斜曛。

寄樂三弟青州頗憶乙酉秋夜方共尊俎翌晨一別不相見者三載矣

涼月團團共倚樓，銀蟾瀲灩恰延秋。乍驚兵氣侵花萼，不信刑書犯斗牛。行李君應  
窮赤縣，山川吾亦夢青州。欣聞金線泉邊住，多繫鱗鴻與寫憂。

曉枕

宛轉寒裳認不真，低眉晝裏喚人人。疑從漢水交要甫，幾見陳思譴洛神。角枕曉迴  
鐙掩淚，霜簾秋迥夢相親。天涯莫道雲山隔，猶遣鉛華着意勻。

壽黃任之七十

豹隱龍驤不計年，儒風象法兩忘筌。白頭天與英賢健，青史人開社稷先。三論過秦  
餘忍事，千詩入蜀足名篇。東南猶記親耆舊，老圃秋應晚更研。

孫繼之屬題秋山紅樹圖

一抹斜陽壓短檐，迎風桐葉醉厭厭。赤城絳闕非吾事，只許山光入畫簾。  
綠天深處舊琅函，石壁龍威手自剗。好景江南應更勝，素雲霜葉共巉巖。

孫氏前集  
書處小錄天

世味酸鹹百不諳，竹爐參朮靜中甘。更開圖畫延秋爽，合借雲山許卓庵。

和曾錫鏞秋興

素霜乘節序，暝陽已異時。璇璣窺天軸，仲秋其樞機。俛仰五十載，乘除肯見欺？將毋亦類是，漸漸炳燭歸。

散髮無好緒，商風無好音。結想夫容城，錦帳花森森。年時玩月豔，此日息層陰。拒霜秋有骨，醉舞揮雙鐔。

半江繞千回，兩潮爭一水。日日俯東流，此情良不已。浮漚原露電，生滅笑蛭蟻。坳堂比槐根，知是誰家子？

行散把瘦菊，寒蝶傍我飛。緒風倏振袂，冥冥心謂危。蝶豈知我情，瞰我將安歸？我心如智井，不問從所禱。

夢岑三心叔來談

竹簟移陰就晚鐘，豪情大略坐相矜。惡聲原與警風雨，勝事從教思犬鷹。猶賸星星瀟客夢，難爲落落定中僧。三年積毀同銷骨，得許人間絕愛憎？

期書不至徒玩前箋自遣而已

一樓寂寂坐鐙清，喚起閒情酒半醒。別久每疑書未達，秋深惟有夢催暝。伶俜珠字從頭數，斷續魚更著意聽。明日吳箋三百箇，好憑征雁再叮嚀。

書至

霜罨窗明夜未凋，殘更了了應寒蛩。初醒夢帶闌干悄，久別歸迷驛路遙。猶有江雲傳雁字，生憎菱汐妬鸞翹。相逢來歲知何許，薄醉重尋百渡橋。

棄鱣行

吾鄉盛饗英衍家書爲長詩余讀而善之和答一首

粲粲滋繁花，盈盈玩秀茁。絲絲托薦蘿，宛轉千萬結。頗記緱山夜，玉笙媚明月。亦似桐華鳳，清露甘竹實。同牢復同衾，長擬共儔匹。愛河竟易波，塵海偶相失。一朝據疾藜，寸寸腸欲裂。思君更難任，倦枕只嗚咽。磋砢逾經歲，生意已垂絕。何意致雙鯉，詞旨芳且潔。挑鐙讀細字，斜照眩夢纈。千言累未已，令我心喜悅。疑真似非真，薌澤差可必。舊情溯綢繆，油壁縱征轍。闐峯蓬萊間，香霧襲裘葛。夜深就羅幃，炬明香不滅。忽爾鱣鱣來，雁行隨陣列。侵曉冒風露，誰與事梳抹。更期冥濛中，得隙瞰禁室。怕遭吏卒呵，俄頃便催發。一去君惘然，雙眼我似漆。緬思年時歡，孰料有此別。高樓俯仰間，倩影如電瞥。目及心已追，恨身不從逸。雲天纔尺只，體魄等怨割。覆書聊慰情，言

簡意絮聒。葆我歲寒姿，勉若松筠節。攜手當在邇，陽春會有日。

丁亥大雪日奇熱作憫農詩

老農樂歲歌西疇。烹羊庖酒宜小休。天公不許老農樂，故遣衰盾煥林邱。今年暝熱異往歲，赤雲長覆海東頭。豈憐斯民乏五袴，轉埋蝻子縱蜂游。嚴冬陽氣不蘊地，象緯失度誰與謀？老幼早委溝壑盡，兵凶更復森刀矛。繩樞桑戶寄奢望，汗邪敢祝滿溝篲。但冀黍麥盈半畝，差供官稅免逋囚。半盂倘獲續殘命，一息崦嵫足黔婁。初無意興植異卉，物妖羯鼓將何求？天時人事每相應，京房絕學通明幽。至今更困在縲綫，坐看黎庶相虔劉。依然日飽粥與飯，黃齏白鱸供新藟。貪天無功不自憫，猶憐老農窮荒陬。何當重廻羲和馭，笑指南阡北陌被珠雨粟呼朋儔。

賦詩翌日陰冽轉寒饒有雪意再作一首

昨日作詩叩碧翁，胡由寒暝靳神功？老農欲語共誰語？徒以文字申孤忠。天似有聽出民聽，許調玉濁昌元工。堂初不高廉不遠，炊累萬物同憊懣。本非有意壞黍稷，亦竚報賽祈年豐。豈意陽威陰不殺，陰陽激盪蠱以風。干戈既致戾氣沴，四海政亂垂困窮。羣生益偷世日變，天難勝欲徒摩空。石米百萬何足較？五風十雨應毋同。子偏

好事惜民力，吾試迴轡催豐隆。彤雲漸起西北向，蒼龍白虎揚飛蓬。羶沉凍合晝將晦，先灑霰雹迷簾櫳。禦寒無當百狐腋，獸爐榘炭光熊熊。吟情好似持寸鐵，明朝冷透琉璃宮。丹心直復格造物，願賚梨花千樹神弦一曲酬蒼穹。

懷舊

攜手匡廬最上層，山房同禮佛前燈。和親卻敵原經國，區脫開邊惜破甑。已了餘生工密錄，記邀殘客策孤藤。女牆花竹蕭森處，怕聽啼鶉感不勝。

連日陰霾靜宜生朝饒有雪意得泛觴遙介眉壽喜賦

朔雲竟夕壓重檐，遙竚瞳矐上曉簾。細字珍珠知滿篋，清光冰玉乍窺籤。卅年離亂隨宜老，三載平安強自慊。我已蒼顏攜白髮，猶堪酒暈爲君添。

園中覓句爲君壽，塵外尋詩似子難。千卷烏絲歸弱腕，三年珠箔障重闌。垂堂子弟能傳業，遣夜佞僮許獨看。莫放朱顏愁裏過，試浮綠螳卻新寒。

和曾錫鏞賦雪

素幕迷天浪潑銀，青氈劫盡不嫌貧。樓涵八表凌虛意，坐對殘年失路人。塞北淮西師漸老，灞橋梁苑跡成陳。莫嫌萬紫千紅晚，分付鉤萌與報春。

凌兢蝕骨傲清奇，晚賞能無酒一卮？  
病鶴襍褻猶緩擊，老梅的礫亞疏枝。  
難爲出塞征塵灑，愛看臨流解泮遲。  
我是山中老居士，不辭衾鐵尙尋詩。

丁亥除夕

難與酬嘉節，猶能忍歲艱。  
一鐙熒午夜，殘酌送朱顏。  
濯濯花前客，迢迢夢外山。  
幾時許重見？金劍壓塵寰。

# 高梧軒詩卷六

武進 趙尊嶽 叔雍

戊子元日

揮手三年老，開顏一笑違。江湖餘赭褐，關塞尚戎衣。梅小春初綻，樓高雁欲歸。鄰家絃管亟，誰道賞音稀？

張一誠約飲

微醺小抑又生潮，指點春盤意已消。留得素心盟石友，更無長物費銀貂。一漚人我輸千劫，三載光陰乞半瓢。且讀班書尋故事，失侯吾肯負清宵？

靜宜饋武夷巖茶篋，面霞鬢曼陀室圖。蓋產地所在雪中，細烹緩酌久無此風味矣。

畫裏霞賓秀一巒，朱鈴錦字繞雙鸞。開絨細數珠疑藥，潑盞徐看水作瀾。腰脚正嫌新雪峭，杯盤差具密雲團。歸來堂上清如許，幾日歸來帶笑看？

以巖茶分貽俞覺生三十年前蓋其治軍之所

銅鞮金甲出安溪，玉軫葵花舊品題。厚似太羹釀玄酒，俊如并翦破哀梨。卅年嘆惜堪回味，一勺從容認遠齋。風味檻窗休不慣，夜深活火守青藜。

薄醉和客韻

吳謳花月換春江，坐遣微吟倚檻窗。殘酒彌矜杯外趣，清商猶理夢餘腔。遲歸筋力垂垂盡，漸老心兵款款降。一笑便從莊蝶化，不須海客話神瀆。

昨朝風雪漸橫江，寒盡微留日透窗。瓶粟已空猶蕢醉，宮絃垂絕不成腔。幾應閨位疑靈武，莫倚殘兵戍受降。清思閒局餘自傲，驚濤老去怯飛瀆。不堪橫槊話臨江，雪意將雲壓斷窗。促席自尋尊有酒，倦歌微度笛無腔。亦知屈蠖難爲用，終覺推枰未肯降。負氣從君文字飲，相期漱石枕流瀆。

靜宜來述金雞消息

金雞消息滿塵寰，恰趁春晴破曉寒。久別真教疑隔世，相逢今始見開顏。未須風雪將行棹，粗具琴尊伴畫闌。卻恐斯人閒不得，橫戈躍馬又長安。

袁中郎梅花絕句輒在汝南壁閒見之賦和寄懷

三載幽棲不看花，只餘涕淚話辭家。誰知冷月疏檣外，占盡陽春總是他。



彌天四海滿兵塵，賸我清寒出世人。相對坐忘空紙帳，夢中猶見好風神。

張一誠手治牛炙湯餅見餉

平生每嗜牛心炙，鬪勝京華意自豪。張翰五湖非我願，莼鱸難與下香醪。  
藥闌飽煎坐初晴，玉帶銀絲試早烹。一夢十年人已老，藥盤猶許說春明。  
自笑三年飯顆山，薺甘荼苦盡緣慳。矮窗寒具無因試，喚起花光照酒顏。  
官閣賓僚更酒徒，相逢不似舊狂奴。破鐺折足看侯鯖，欲鬪歌樓乞食圖。

四海

四海何人更見收？雁飛不上最高樓。停雲一色遙天碧，逝水千回去日遒。難織鮫絲當繭紙，幾簪珠字倚吳鉤。餘生負盡殷勤意，賸對花光照白頭。

玉璫

玉璫真繫錦書來，滌盡塵襟萬斛哀。別後光陰真草草，劫餘氣象尚恢恢。苦難斷際成追憶，已縮同心莫漫猜。側雨闌風消去日，綠窗深處待銜杯。

家園玉蘭盛開

皎皎花光奪淡暉，扶疏猶訝主人歸。林梢雪積迷妝面，翠外雲涵染素衣。香遠綴簾

微有韻，幽尋落萼未全稀。詩成莫忘當時好，汲水栽枝露未晞。

海棠不花聞之悵悵

依依淡粉更輕脂，賺我閒情日有詩。長乞春陰知愛惜，微消燭暈話相思。紅桑乍老應無色，紫蝶重來莫後時。應與慈恩同掌故，歸時松動向西枝。

夜深望月巷歌淒厲不寐再和

清光破曉俯重簷，容易巡闌對月纖。楚竺微聞愁夜永，吳綿誰與殢寒添。流鶯窺鏡迷珠箔，太白經天誤玉鈿。能遣萬緣心自寂，五更風露覺來恬。

侵晨閣眺三疊

壓帽無花出短簷，萬家春濯綠痕纖。遲遲車馬鐘前動，獵獵風帆雨後添。雅趣偶宜歸墨戲，小詩猶遣押朱鈿。定身一例三千界，轉識期能與智恬。

舊與靜宜同游金山寺雲藍閣爲齋主供養時披袈裟留影忽忽逾十稔矣戊

子二月二十六日不戒于火全寺灰燼傳殉僧數人感嘆成咏

耿耿金山盛樓閣，香幢寶蓋珠絡索。道場倏忽千餘年，柏子桃花幾開落。當初江水圍陂陀，奪境晴空暢寥廓。北固迴肩差可接，焦農攬袂如成削。寺門花草印屐齒，經

藏棟梁布丹雘。撰幽百丈登石級，更有精巖出林壑。憑高鈴語笑風旛，窺穴潮音祕  
鎖鑰。機鋒學士輸玉帶，公案祖庭供一語。我來後此八百載，箱箠猶能駐行脚。鋒車  
直御抵洲渚，野馬迷離俯城郭。玉堂手澤煥精神，先佞古芬開錦箔。復次升堂啓上  
座，分派曹溪甘一勺。循廊繞出寺裏山，窄堵移陰過簷鐸。齋堂采女自窈窕，款以伊  
蒲屏羹臠。吾茲亦與法喜偕，同笑何曾嗜藜藿。飯餘鼓腹學披剗，儀服水田扣朱襪。  
有相偶爲無相留，四大甯爲四禪縛。茶煙冉冉絲壓鬢，歸去明珠懸碧落。十年習染  
未能忘，豈信勝緣真有托。法王觀空貴斷際，首戒遺情泥今昨。癡疑生幻幻生惑，苦  
集滅道證真樂。凡夫每發夢中狂，大乘應知悟爲樂。執迷何以破罔象，速命祝融肆  
炎熇。此火直名三昧火，卽滅卽度不爲虐。諸天龍神列八部，焰起雷奔共驚愕。刹那  
胡灰壓泉底，八面長干壞瓔珞。雕甍像設一時捐，阿卯僧祇踏爐藥。世淪末劫入茶  
毘，了了風輪消鎔鑠。空桑從此絕心影，留記伽藍無處著。火中終復見青蓮，和合何  
妨還寂寞。

讀書雜憶

康回怒魄竄三危，貳負羈囚厄士師。汗簡祇因成敗論，神堯千古頌明時。

永王史筆不須論，靈武功成自寡恩。惟悴潯陽李學士，夜郎長謫夢金門。  
江陵壯語身爲辱，粟里閒情帶作衣。同是悲天同憫物，蘭陵獨惜賞音稀。  
叔敖相楚不勝官，投老湖湘仰屋看。能信婦言真有價，負他優孟試衣冠。  
乞兒搬碗不辭勞，毀積餘書足自豪。清課小山輸倦客，猶堪珍重到霜毛。  
蚩尤守藏仆靈旂，壞壁重尋又嬾披。多買何如能熟讀，景和終不是書癡。  
畫堂談笑卻秦軍，草長煙迷日漸曛。風義獨推李師道，私錢贖宅報殊勛。  
街西崇讓近何如？深巷難容長者車。留得聚頭遺扇在，簪花猶識館甥書。

貼

外男書以題水翁書扇見

頑仙端不如才鬼，貞白遺言最耐思。贏得薤歌知漆緯，生天成佛已嫌遲。  
東風歷歷小紅樓，我亦雷塘記舊游。只是無心注孫子，空教花影控簾鉤。  
流鶯勸酌夕陽前，嘉約先吟瑞鶴仙。鴻慶齋宮無宿處，孤城闌角意茫然。  
敬中衰鬢污緇塵，搵涕羅巾對寫真。又是重三展禊日，劇憐不及鏡中人。  
綠窗椒壁舊停車，飛絮爐煙乍不如。猶勝饒州張舉子，樓中鎖燕正愁予。  
似奕長安海更桑，封侯曾已熟黃梁。輕車再過邯鄲道，夢好何妨第二場？

事見玉照新志

晏小山仇儂故事

阿輒風懷尙舊裁，壁題終恐漉塵埃。幾時重見通州句？綠水紅蓮一夜開。  
龍東殘卒不成軍，突騎傳呼幸策勛。風義獨嫌無李穆，坐看逆景肆妖氛。  
敬容殘客更何人？劉虎爭雄事亦陳。劫首正邱慚故吏，斷雲乾土幾逡巡？  
鈔書晚課自思維，數盡飛車更語誰？猶遜長康入千紙，圍城冷月映孤幃。  
智略才情兩勝人，朝章趨局亦酸辛。戴花更與江郎筆，夢老城南酒幾巡？  
平生和遍小山詞，老吏無言愧少師。莫是餘才捐不盡？蓮蘋長與寄相思。  
結客誰知轉負冤，獨矜俊語賞崔瑗。行廚騶從年年盛，不及淮陰具一餐。  
瓔珞莊嚴又一番，布金帖地亦祇園。南朝東海慈雲寺，檀越曾隨怯夜幡。  
會稽一戰漲塵煙，鎖甲巡城宋子仙。畢竟肩吾工好句，得留殘命付吟邊。  
漢家宮闕已蒿萊，秦獄崢嶸更劫灰。解事只餘臣朔在，積憂能識赤蟲哀。  
弘恭石顯早盈庭，繫獄鄒陽閱德馨。幾見平原甘代死，少留絕學紹遺經。  
已知獵者工羅織，臣肉爲羹豈倖全？語妙不須真負謗，金輪末劫尙親賢。  
當年曾未典春衣，三載東華控玉璣。堪笑今朝真食粥，詞心淡盡自忘饑。  
更誰持贈夜飛蟬？怕有微霜上鏡邊。虛幌曉風明月裏，西施不值一文看。

傲骨甯教宅易州，青氈終可傲王侯。生涯未許蜘蛛隱，贏得郵亭當畫樓。  
箭徑風高去又還，三生花草惜荆菅。莫從犬竇輕豪傑，霸越功開一拜間。  
茂陵衰鬢幾消磨？羽獵長楊付逝波。猶誓仙舁橋上路，不乘駟馬不重過。  
景文絕代風流客，鋪綴當年亦可觀。不分惱嬰憔悴裏，娶脯徒與奉盤餐。  
滄海橫流事可傷，露車叱犢自相羊。年時油壁尋花處，絕倒王尼大道旁。  
阿奴十歲不知書，腰鼓頻搗下玉除。今日棟梁都折盡，莫尋游釣立榛蕪。  
漸起輕雲怯倚闌，小菱鬪月有無間。重教相字迴環覓，不怕飛霜點鏡斑。  
建牙因壘屋千間，蔽芾甘棠漸就刪。靈寶終能從謝混，畫堂絲竹守東山。  
民窮道困野遺賢，空付新詩萬口傳。常侍愛才殊不易，肯輕放役任筠川。  
冒取弘恩示廣覃，贖刑虞夏不嫌貪。侍人真閉三錢府，平仲容教脫左驂。  
合傳韓非更李聃，帝堯蘇峻亦同龕。祖思攘臂龍門笑，此義憑君與細參。  
非星璀璨亦非雲，斗下光微逗隙曛。應是歸耶先卜兆，莫輕象緯驗天文。

統一兒從戎三載期以歸來賦此速之

陸離劍佩渡西興，軌革陰符識已能。曉仗溪蠻爲屬吏，夜窗山鬼作良朋。每嫌書遠

無由達，笑指壇高孰可登？還是桃林看放馬，舉家遲汝酒盈升。  
驂騑鷹隼是男兒，輟學辭親舉世奇。試引嫺隅嗔上客，偶拈僕遠學新詞。歸來萬里  
身猶客，去就三年鬢亦絲。無限阿翁矜惜意，好憑腰鼓話年時。

杭州許藻庭五十索壽詩

故鄉真有好湖山，棹楔雲開夕照間。人許通侯承世澤，子從黨錮識時艱。滄桑眼底  
開霜鬢，日月壺中總醉顏。一笑南枝春欲綻，呼童行看杖藜邊。

戴英甫索贈

星變終磨黨籍碑，呼天負手更何爲？秋衾銅輦悲辭闕，智井枯槐尙映帷。且隱棘樊  
同滅度，莫遺龜筮策安危。囊錐會看相攜脫，立馬高邱俯九逵。

戊子五月朔日追懷傅樂清蓋其亡忌

吞聲搔首恨難宣！不信松楸漸滿阡。去日侵晨猶細語，餘生惜逝亦殘年。樂天官說  
江南好，道濟身先塞北捐。更記臨歧書滿紙，河陽家訓淚淪漣。

追懷穎川

惘惘山川異去時，紉紉鼓角尙哀思。酬知不屑明功罪，靖難何須問報施。八表蜺旌

空竹汗，一坯虹雨贖苔滋。秦淮水戲前朝事，愁與重吟弔屈詩。

無題

獄成草牒自矜持。天下銜冤訴士師。隔歲平反方有信，畢生諒直更無詞。削瓜夙厭咎繇薦，刻木難禁庫狄篳。應許少寬歸去日，勞君破涕共尋詩。

五月二十七日賦事

芳年勝事猶能記，一度尋春酒一巡。歸晚曾看珠有淚，羈晨愁對草如茵。弄姿仙袂飄飄舉，照影菱波的的真。結習未能忘掌故，每吟秀句寫紅巾。書來悲喜應交集，一寸花箋萬疊心。期我好春歸共討，爲君藏醞酒同斟。近從燕市窺珠箔，莫帶紅樓竚綠陰。相見休嫌惆悵事，只嫌微著鬢霜侵。

陳散原文歸葬杭州不克趨奠敬賦四韻

亂絲叢笛過西冷，老盡赭顏不厭聽。十載兵塵遲旅殯，千秋苔翠瘞花銘。揚葩夙已開宗派，撰杖微能述老成。慚愧秋聲入吟腹，靈峯歸夢早伶俜。

末二語蓋廿載前  
文題拙卷中詩句

意不能盡再賦

城西缺月映扶疏，頭白孤吟近直廬。抵死曾爲辨姦論，餘生不作封禪書。江山秀氣



供陶鑄，天地秋聲自卷舒。屈指同光遺老盡，臨安寂寞話平居。

子范賦歸索和

三年辛苦更誰諳？心影寒光映碧潭。獨恨呼天疑不應，舊曾愴地復何堪。明朝重見施行馬，他日還期脫左驂。相見倘還尋雅故，齏鹽寒具亦彌甘。

夫容初上好秋時，得得吟歸鬢未絲。心似枯蓮方破節，身猶勞燕待安枝。小紅應和吹蕭緩，太白休嫌醉月遲。差幸已留微命在，肩吾一笑說工詩。

紉佩秋蘭漸被涯，騷心郁郁認同儕。長嫌困獸猶爭柙，苦說圍城久析骸。議貴吏惟驕僕妾，沽恩令止錄椎埋。難逢漁父爲商略，且作潛夫強自排。

大雅笙詩得更聽，時衰青史廁官伶。藏山差擬三年艾，懷璧同于六等刑。此去匡牀蜚振羽，言歸華表鶴梳翎。緒風儘有悲秋意，不送楊花漫作萍。

子范更請以前韻作香奩體平日涵濡于詞者較多涉筆不慎便落詞荃因專事淡語規模致堯苦不能工也

淡盡春痕祇自諳，莓牆西畔舊花潭。牽衣乍別情無奈，中酒微蘇夢不堪。來日綠陰應鎖徑，那回紅藥幾停驂。休言重見他生事，已負金莖一味甘。

宛轉終知是別時，斜風片片雨絲絲。三重真鑿黃金鎖，八犯難交碧玉枝。茶熟香溫新炙細，酒闌人散獨歸遲。紅妝莫放啼痕澹，留取羅巾爲寫詩。

悵望死央泛水涯，原知同命是同儕。珊珊風度終仙骨，脈脈相思托病骸。臨去微波通悵惘，少留英氣未沉埋。從頭再譜霓裳曲，袞遍黃龍第幾排？

八琅仙樂記同聽，調笑擲絃壓座伶。相見應難疑曲赦，重逢倘許竚祥刑。紅蕤沁雨迷絲鬢，素奈迴風散雪翎。樓上舊時芳節好，只嫌春絮已黏萍。

戊子七月初三日感暑晝晦風雨志異

兼旬苦感暑，日迫火雲蒸。微軀久不耐，中單去青綾。匡牀敷尺席，展轉就窗棧。賤卒更見忤，伐木刪鬚鬢。遂使綠陰歇，蟬亦噤不響。酷熱如酷吏，斯事誠堪憎。道窮命途舛，直似魚墮罾。臨淵難苟脫，猶幸天所矜。天公憫無告，羊角馳鷗鵬。片時六合晦，豐隆掀且騰。急雨如潑墨，迅電如掠鷹。便復降珠玉，一一冰花凝。著壁頗黎碎，扑骨尻脊癢。破檻布滿室，晶晶挾寒兢。飛瀑遜跳脫，風浪起泔泔。萬籟乍抑塞，黑雲彌郊塍。投林斷宿鳥，栖硯忽凍蠅。片霎翳宇宙，屋漏隨波升。涼生意蘇快，躡屐遷行騰。雜亂忘憂累，拾級行登登。呼嘯俯九陌，深谷行爲陵。或云是災異，或謂示勸懲。玄象卜事

理，斯術吾猶能。羣陰正構扇，獨陽樹威凌。誰與恤民意？虎視異龍興。修讓且難濟，撻伐猶因仍。蕩激終至此，僑壓稜自崩。莫嫌違節序，造物信可憑。子政語不妄，京房良足稱。更詔二三子，夏蟲無疑冰。

夜夢與稼農景周吳氏昆季春明游觀

蕭條薊門柳，寂掩松筠庵。曩歲滯京國，邀君嘗同探。風輕入懷袖，月朗映遙簷。相與說吟事，雅趣吾能參。亦試共杯酌，市樓縱清談。臧否及人物，疊鼓傳黃柑。此樂未爲樂，更漏倏再三。居家近神武，靜院如僧藍。釘坐器鼎鼎，環堵花毵毵。客來傾茗飲，至味尋幽醴。當軒開畫篋，飽味如枯蟬。一時引昆仲，元季誠無慚。此去二十載，別久難復堪。辟亂竄濫瀕，零落宦江南。事毀更見錄，髡髮遂鬢鬢。從茲堯與峻，甯得使同龕。當前已萍絮，顧影消雲曇。相望不相及，清興猶舊躡。今宵喜相見，意厚言尤甘。醒來始相失，夢境方自諳。哀腸蘊涕淚，整衣餘幽憺。長憶不容已，行歌且喃喃。

外孫女新令塗鴉函候情意殷摯笑題其後

別汝髮覆額，今汝且垂髻。屈指已三載，吾意苦寂寥。拳兒出錐母，頗復憶生朝。金陵城北居，錦襍徒呼號。來作外家客，姊妹相招邀。花陰捉蛺蝶，強父致鼓鼗。牙牙漸學

語，健步縱以跳。星眸如點漆，笑靨被酒潮。每飯輒見侍，勸我說童謠。簿書滿几案，曾不厭煩叟。一時官裏去，正復懼覆巢。念汝亦至篤，悵惘每中宵。樓居知啾噓，斗室兼廩庖。迷藏無處所，里巷無游敖。卻時憶老翁，細字來冰綃。開緘驚且喜，善頌歸衡茅。母言翁將返，征車行及郊。歌呼好撰杖，乘肩不勝嬌。疏斜纔半幅，小名尤堪嘲。蝸涎亦學篆，薤拔連繩膠。奪行亂花葉，控弓弦脫鞘。字弱意則擊，數讀心陶陶。終當償此願，翦伐蓬與蒿。重開東閣門，重佩昆吾刀。並看露頭角，繭紙揮霜毫。勿再畫蛇蚓，更自工蘭苕。衛媯體最精，茶陵名至高。有時興未已，列案陳酒肴。酌汝僅一爵，獨飲盡懸匏。醉餘述往事，怪語驚兒曹。

孫道始治申韓事有所憤將繪焚律圖余嘉其意先題長句

嬴秦焚詩書，一篋虧九仞。百家諸子外，胡獨遺律令。坐使兩千載，流毒困百姓。大法因成敗，生死出喜愠。猾吏緣爲姦，餓卒食膏潤。吾徒初不知，今盡燭其隱。孫君有卓識，象魏付一燼。卅年習士師，自誓拔陷穽。不更責鬼薪，不復檢遺行。聞之色然喜，嘉話播遠近。譬諸咸陽炬，片霎除暴政。三章亦多事，綿絳生悔吝。折衡且剖斗，便爾絕凌競。無冤卽無濫，春臺庶足慶。刑措致垂拱，斯舉真絕勝。何當永丹青，題篇先命韻。

病中口號

井梧已下一痕秋，未酒難消萬斛愁。更遣輕寒添細雨，不堪殘綠映層樓。

郭學羣伉儷餽以臠肪餠桃賦謝

歲星忽忽歷三度，畫地爲牢竟身入。一甌一盞紅糝飯，坐使老饕困殘粒。厚君見惠感肴饌，道遠侵晨逾潦溼。臠肪盈握復綏桃，色動神驚發滕笈。東陽細膾出花猪，西海飴甘奪霞蜜。紅如瑪瑙凍白玉，黃瑱沆瀣金壺汁。渴來脣吻久枯燥，鼻觀先容參遠馭。夢回未覺遜當年，百萬何曾猶自失。丈夫初不累口腹，生死交情誠足述。異時玉食尙錦衣，攜手松醪恣取給。

戊子九日

沉冥斗室送重陽，絕意花光更酒光。風雨隔樓秋漸縱，河山滿眼夢能償。故園見說繁霜滿，獨客能禁子夜長。屈指登高猶作健，詩成須不負壺觴。

客有談兵事者雅無多語示以四韻

龍堆砂磧遍征鏡，眼底中原誤斗筲。斧鉞李陵原管敢，玄黃武吉殺殷郊。窺天歲破家懸炭，火際光微佩掩鞘。愧我三年木居士，長籌橫海已全拋。

薄醉

幽居久闕醇醪興，詭體甯堪刀筆文？玉馬早先商器走，銅駝坐待晉宮焚。閒看逝水  
迴殘照，忍聽遺黎說潰軍？百尺危樓休更上，扶闌人意苦微醺。

晚坐

日斜無語罷明釭，秋動潮聲起暮江。何處玉關求馬服？當年金板應龍逢。平居冷眼  
看移國，伏櫪雄心誤受降。漸聽隔牆歌吹沸，念家山又換新腔。

九日和人

東籬瘦祇一枝看，搖落三年願已瘳。地迥蹊疏真獨秀，樓高袂薄怯初寒。懷人事闕  
空耽句，止酒愁深直廢餐。何處龍山供嘯傲？但餘霜氣盪迴瀾。

遙憶金陵梅花山

冰心綠萼一踟躕，難認遺蹤過夕墟。封杞成湯寒帶礪，存齊樂毅墮鍾簾。寒侵松柏  
迷銅井，天老星辰黯緯車。千載九疑誰攬袂？閒雲長自掩樵漁。

題簡

疏綾碎字罨孤鐙，樓閣天涯第幾層？已了萬千年兜率，遽憐五百世摩登。風懷懺盡

終難諱，霜鬢蓬時莫漫嗔！便遣聞釵爲破戒，定中猶自愧枯僧。

傳是樓挽詞

危言抵掌隔人天，清話猶珍篋錦編。彤矢魏公專九錫，朱弓杜伯誓三年。安劉地下真將反，霸越朝班未倖全。老我頤年堂上客，海棠如霧一淒然。

園法日懷百萬始買得，蔬果細民遂匿貨不出幾無自致肴饌以知大變之當

前也賦寄孤桐

天公胡爲肆荼毒？園法崇朝竟先壞。交關會子賤如泥，坐貶黃金付等殺。細民匿怨不敢申，偶語沙中遭扭械。森羅吏卒列塵市，搵積無人應趨賣。兼旬空巷罄積儲，簿籍斗筲塞庭廡。行庖亦自乏蔬米，夢繞紅杭兼綠蕪。肉糜溫詔出尙方，流布人間祇嘉話。直教臣朔苦長饑，儘有侏儒亦羸玠。粗糲日日惡官飯，河鯉烹羊圖一快。客來遺我玉粟羹，霜露東園伴薑芥。爲官聚斂出上意，草野紛紜何足怪？日中爲市輒後時，暮夜贏金逞狡獪。願輸倍蓰易雞豚，分得園葵不盈簣。聞之雪涕復竊笑，一飽深知繫成敗。匹夫夙已委溝壑，貞士棘闈同誤註。莫輕藜藿饜甘肥，燕頷虎頭餘自喟。佛說持齋邀五福，婆娑攝受清淨界。平生低首況東坡，更勵前生五祖戒。尙嫌舍衛

且乞食，碌碌報身困煩憊，不如天供學辟穀，仙露明珠徒沆漚。

和客賦事

鬱鬱真思北走胡，出山遠志更誰無？十年菲艾堪前席，三載菰蘆冷後湖。姚鳳已摧淮上壘，荆軻行獻督亢圖。握奇風角吾能識，爲道今宵幕有烏。

二疊

義淺恩深漢似胡，師終入郢報能無。蕭蕭風雨迷西塞，獵獵旌旗下北湖。江闊投鞭知可渡，城空殘霸已難圖。枕迴整婦如麋淚，忍和寒霜屋上烏。

三疊

落落平生鄙賈胡，勝情還似舊時無？矇矓背月垂三稔，短夢揚舲尚五湖。弄晚課花真解語，辟塵學佛亦良圖。投閒身手知難慣，頭白難期質塞烏。

四疊

劫餘不復見商胡，禪智清輝似舊無？十里亂紅酣北郭，一泓嫩碧瘦西湖。樓臺選巷空陳迹，兵馬高家夙異圖。莫爲蕪城重作賦，王孫夜夜泣城烏。

五疊



從君一劑索柴胡，得已風淫末疾無？  
窺客山川說京雒，羈心魚鳥忘江湖。  
三年獨破天魔陣，四壁難尋素女圖。  
荏苒祇嫌春去驟，幾回蒼鬢許重烏？

六疊

君家羯末與封胡，玉樹庭階一代無。  
好句轉鶯真出谷，閒身種竹每瀕湖。  
晨鈔細字雲開笈，夜玩迴文錦織圖。  
十里軟塵深似海，延秋微恨白頭烏。



# 高梧軒詩卷七

武進 趙尊嶽 叔雍

庚寅南游客仲將家酒疾遽發去死僅間毫髮留連祗得五閱月雜作口號

直同神馬御尻輪，蟻繞浮漚忽幾巡。我已善行無轍迹，茫茫縱轡入無垠。  
兒曹愛我見純誠，含淚承歡強笑聲。更道今朝來北訊，花前珍重話平生。  
無生已似德樂止，有恨初非涓蜀梁。造化隨緣來復去，心安莫更問吾鄉。  
涅槃直欲入無餘，魂魄沈酣意自舒。不信呼圖猶轉劫，六塵謝處悟真如。  
遺情已渺更無言，繞榻羣兒靜不喧。坐待離魂頃刻事，中陰好赴土山園。  
頗知繼晷難焚燭，歸去今宵亦大佳。聚窟忽傳膏血劑，無端還我舊形骸。  
通德辭門去未還，伶元臥病杜禪關。諸天未必無情思，猶散仙花遺小環。  
信陵就國徒醇酒，太白還山只舉觴。早識麴生能伐性，澆愁一石肆清狂。  
暗室明鐙我不欺，照將滿腹背時宜。上池未必須臨鏡，解事朝雲早得知。

午日和章孤桐

座隅茶醞壓花穠，鬱鬱情懷我欲東。不分廢樗全世外，枉期蓄艾度天中。三年斂手難忘劫，四海驚心未竟功。揮劍屠龍餘勇在，邯鄲重待論窮通。

抑抑愁深抵酒濃，遲遲斷竈隱牆東。雲開漠野風初動，畫罨江亭月可中。妙手解圍誰服罪？焦頭逐客不矜功。平戎倘向尋餘策，跨海投鞭一輩通。

紅棉歷歷送春濃，夢熟驚回玉檻東。畫角移宮滄海外，哀師掬指亂流中。泉南孫碣難重證，好大王碑漫勒功。太息三仁應有後，蓬萊消息幾時通？

海濱飲座

猶與憑肩唱惱公，扶闌花影壓肌豐。好風圓月分明在，忍說相逢是夢中。海山佳處作勾留，宿願能償舊客愁。桑落車螯風味好，冷淘不及小紅樓。牽幃還著水紅衫，乍試矜莊斂削簪。玉笑珠啼兩寂寞，回眸故故數雲帆。

芬女伉儷飛渡重洋賦此

隱隱風雷動九霄，奇肱奇器迫魁杓。送余嬌女重瀛遠，忍我衰顏獨客遙。比翼真教誇穆滿，兼程何啻倍班超。天驕麟鳳人人識，弱水前頭好弄潮。

挽潘一山中將姊丈

垂髻送子渡重瀛，十載兜鍪絕藝成。佐命革除真奏凱，留車醮命竚親迎。半生老作諸侯客，沒世難爭豎子名。我更南天同玉局，愴懷仲遠不勝情。

曩與靜宜同游祕魔崖別薛尋詩得滄趣翁舊題此景歷歷二十稔矣頃偶讀

滄趣集復見此詩爲之棖觸賦寄靜宜共賞之

祕魔崖下坐多時，鯨龍去松猶翠偃枝。靜對青山真入畫，飽看紅葉好支頤。僧房詰曲尋幽徑，苔壁從容覓舊題。攜手記從新病後，廿年慚愧別盧師。

靜宜來書輒繩王城勝賞苦不獲偕賦答

爽氣西山尙襲人，真教拄笏作閒身。雲帆珠海難尋渡，鐙火蝸廬似可親。九陌風光容獨賞，三年滋味待誰申。不須興廢談身世，屈指花時已愴神。

統兒去廣州就叔氏擇業送之道左勉以攝衛

道旁執手難爲別，須戒垂堂善葆身。萬里弓刀憐瘁瘵，百年松柏竚輪囷。賢昆室毀堪爲主，慈母書馳莫厭頻。食力習勞應自勉，不忘卷帙沃心神。

舉紳兩女盡室北歸示別

從今只待雁書來，坐看鋒車首重回。歷歷樓臺應可意，粲粲夫婿盡清才。病餘止酒

堪相慰，客到談瀛莫漫催。一夜鄉心真五處，中天月好幾低徊。

感遇

海涯已分難相見，百世真知不負心。尚乞天留微命住，蛾眉端不惜黃金。高樓夜夜夢珠還，國士酬恩百不慳。我已神丹傳換骨，相期長葆好容顏。

病起小憩璇灣

未信衰顏五十三，郊行尚許作幽探。北窮碣石南珠海，八表平生早盡諳。輕鷗看逐海雲飛，矐矐難施自忘機。莫羨玄真西塞路，璇灣風物共依依。

淺水灣頭

輕諾臨歧未易忘，停車皓月照流黃。一年容易如流水，不再淩波照斷腸。一攬青銅漸亦絲，別離滋味幾多時？飄鐙送酒應如舊，只是尋春已較遲。花箋方寸不勝情，日誦千回暗恨生。更向鴻都問消息，幾時重許奏通明？

仿玉溪體

紫府銖衣絕謁參，玉螭金勒負精藍。啼妝一別難爲宛，屢語他年祇自諳。細篆疏香縈畫檻，涼宵微雨瀉詩龕。綠章遺乞臨邛奏，仙籍終當署玉函。

庚寅八月五日得統兒噩耗遣婢往經紀其喪拉雜賦悼詩父子緣慳血和淚  
忍凡得十七首

經旬不得書，日日玩舊札。每謂病差愈，強飯甘藜蕨。遠道妹適來，伶俜撫秀骨。以欣復以慰，驛電驚一霎。校字不成書，人天頓存歿。不知歿何時，不知病從發。眼明乍相見，來往似恍惚。忍淚遣妹行，爲兒封短碣。

粵中急足來，老淚復盈掬。始詳病所起，求治意過速。針灸或有失，冒閉氣益促。每或怯醫藥，憐我無餘蓄。貧誠能崇人，醫到命難續。彌留呼阿姆，弱腕擊季叔。語細不堪辨，萬念付一哭。悠悠孝子心，此恨何能贖？

憶兒侍祖庭，晚鐙課兒讀。老人恤寡嗣，寒夜引共宿。嬉游或逾節，小杖亦責朴。溫婉無違詞，昆季咸友睦。不幸困比匪，經月苦桎梏。奪命出重圍，壯志去南服。三年釋甲歸，家難倏轉燭。天命實不猶，英氣差躑躅。統一弟曾困綁匪窟中經月始脫附註

讀書何用所？急難去鄉國。行行越萬里，童子真剽疾。飄泊西南間，蠻語具淵識。入生數出死，炮火時在側。忽焉襲兜鍪，歸迷尚股栗。卒以致羸瘵，刀圭試醫術。回生餘數稔，漫游尚南北。誰謂術窮時，客途委墨印。弟抗日戰時從軍數年

余病際彌留，男女繞病榻。離魂乍返時，好語相酬答。劑和既手致，奔走了塵雜。夜鏡報母書，婉轉語重沓。色難以爲孝，微意至周匝。孱軀日健朗，笑語傾樓閣。何意中陰還，兒卻謝簪盍。天道誠難論，人生真朝溘！

踽踽遂獨行，林梢上新月。想兒冥茫間，不復見月出。抑或升九天，雙丸探金闕。魂今何所之？吾意不可必。魂今若有靈，當歸侍農夕。慷慨述南征，生死間毫髮。阿翁喜壯語，兒事自英烈。一刹生意泯，對月徒哽咽。

養痾就友生，逃世辟塵俗。辛勤爲部署，此事責家督。茵枕與几案，井井手親觸。排日更相就，憑檻共新綠。遠信竚鄉人，近事話朝局。不信一揮手，從此贖遺躅。父子情至親，變順尤汝屬。使我局愁城，天意亦良酷。

未泣眼已枯，欲哭淚光竭。車沿揮素手，彈指未兩月。當時情味惡，氣餒怯永別。作詩強自解，輪囷喻松栢。豈意歲寒姿，終且困霜雪。世事已落漠，萬里棄家室。惟兒近承歡，生意共朝夕。倏焉堂構傾，窮老更安適？

日者憶飲冰，垂肩過廣陌。夜鐙熒熒明，待我就車驛。頗恐致勞苦，弱骨事將掖。扶闌送轉軸，車動猶目逆。亦知侵農行，旦夕距只尺。猶期旬月間，得復共鋪餒。心焉乍自



驚，此會良遽迫。孺慕永在邇，孰謂卽永訣？

琅琅振車鈴，仿佛兒入室。猶似沙田來，道遠意怡悅。一椽殊不惡，山水更清絕。微嫌跋涉勞，相晤苦倉卒。老尼頗煦嫻，誠是善知識。背塵良自信，禪淨夙有得。報身還四大，旛靜風亦息。掩袂質南能，容兒幾聖域？

雁行五昆季，相愛意最篤。千金不少恡，厚饋致醫藥。偶然聞損膳，長姊馳急足。弟妹咸殷勤，日日問寒暄。豈意天一方，萬里或海濱？汝竟逝不還，折翼困天祿。幽居夜漫漫，露臺星熠熠。珍重留影時，聯輝畫闌曲。

去秋別阿娘，亭午就海舶。恐兒不勝勞，罷飯遣先發。今年別姊妹，征車凌曉月。絮絮致離情，細語抵深夕。季弟亦判袂，習買作遠客。猶見隨肩行，抵掌述游歷。隻身侍病翁，終自去百粵。不忍斷衆緣，甯復甘窳窳？

搏土始爲人，媧皇正七日。兒亡甫來復，喪葬事差畢。桐棺不三寸，草草整衾飾。夙性屏煩縛，吾力亦差竭。手足不及視，漿酒不容醜。聞當一往時，輻涼示安逸。本無愧怍心，來去自解脫。好去黃花岡，死傍要離側。

兩姊盡室還，兒計歸北國。奉母居九城，藉少獲將息。粵南受一椽，情好最叔侄。相待

殷且渥，竊喜有起色。罡風自天來，奇變不可測。料量及屬壙，感幸豈易得？  
歸旅魂其返北。幽明同此心，孝思終不竭！

年年際生朝，雞黍設酒局。今年猶此日，痛已登鬼錄。齋堂薦蘋蘩，歆饗誰可  
氣淒厲，花供不盈掬。孟蘭張法會，人意聊有托。弱妹苦經營，宗鄰淚奪目。以  
時，歡笑挹醪醪。茲情不容溯，千載傷鞠育。

手顫發母書，至性感且泣。含恨謂終生，往事咎無及。頗悔拋兒行，母職或白  
侍阿耶，道遠致壺榼。不辭塵土勞，稱壽就請室。誰實使破家，清貧不自給。空  
聚，嘉會總難合。溫言祇相慰，好景傷永戢。

花落不再開，萍逝不復合。聚散固夙分，吾意終邑邑。念兒正英俊，擲世隱此  
最淒厲，雪涕每俯啜。祇期夢魂間，旅櫬迂蕭颯。蜃雲起繽紛，巒翠擁周匝。坵  
處，游跡感雜遝。只恨詞萬千，瞑目靳一答。

壽章行嚴七十

陰符倘許用吾謀，北燮南諧孰與儔？好事曾攜滄海客，勝情終逐赤松游。方  
陶貞白，秀骨屏風李鄴侯。箋啓近傳商密勿，邠歧景運貯新猷。  
二十許時嘗在  
在上海要擊工

遠被

道弘治化三千載，身繫安危五十年。暇日新詩歌緩緩，良宵清話意便便。萊公無地能旋馬，莊子臨淵夙忘筌。笑數寒齋侍尊俎，荷衣撰杖亦華顛。

余十三歲得待顏色且因以就教于林畏廣先生

重過沙田普覺園蓋統一養疴舊寓所常至也

掩淚重過普覺園，伶俜瘦影隱山巒。矮窗一榻長敲枕，修竹千竿尙繞垣。笑語杯盤傾白墮，梵音鈴唄送黃昏。回頭卻步前朝事，了了塵天晝掩門。

壽王十內兄述勤七十

征車崇讓廿年前，老屋城東乞一廛。絳節霓旌出滄海，紫薇紅蠟映槐天。階前蘭玉人爭秀，楹畔詩書手自研。贏得長生丹訣在，持觴猶費杖頭錢。

聞歌口號

南內東城舊笛聲，重聽只恨不分明。仙雲隔斷山河迥，此是陽關第幾程？零落梨園老法師，歛魂拱木鶴歸遲。今朝誰更傳家法，檀板人人倚竹枝？昇平不復見靈官，縱有知音亦廢彈。一夜新秋涼似水，霓裳空向月中看。憑闌側帽選新歌，檢點排當問世科。數到貞元方幾日，教坊子弟已無多。

統兒七虞適得粵中寄來墓圖感書其後

虞祭何堪滯異鄉？無人爲汝捧烝嘗。披圖短碣新題字，檢篋殘箋舊著行。游子春暉傷永慕，老懷秋雨更難償。重泉莫忘人間世，雛鳳清聲許再詳。

寄壽靜宜

晴旭蔥蘢上短窗，夜明風起夢崢嶸。凌寒已覺春雲展，闕別猶思舊侶雙。廢酒只餘詩上壽，懷歸每憶雨浮艘。經年心緒明朝事，坐雪斟茶聽曉淙。

十二月四日賦落梅

帖地猶存向暖心，逝波終許一相尋。十年珍重歸吟幄，百萼爛斑戀繡衾。細雨春殘愁半熟，夕陽黃處惜微侵。不堪重就鐙前看，宮粉仙雲隔曉參。

殘年游黃大仙廟或云黃石公也

殘年意已垂垂盡，病客身真日日閒。頗見弓刀張漢幟，略思雞犬賺秦關。鏡中相字還應在，篋底孤虛未易刪。我愛穀城山下住，不妨瀕洞一開顏。

孤桐惠詩追述辛亥改革枉顧紆籌事清談移鼎史蹟罕傳景運共和肇端斗室倏忽三十餘年知者蓋僅時余方十三歲撰杖側席正似昌谷之于昌黎

也日月居諸東山蔓草垂涕答之

遽傷蒜髮鬢霜侵，四十年來祇夢尋。偶語真能遷九鼎，垂堂每戒惜分陰。幾時重竚高軒過？此日難爲老屋吟！檢點延秋門外事，白頭烏識故侯心。先租榜屋曰借陰堂詩註

揮毫刻燭記無餘，懷舊詩成一起予。下馬入門真氣象，受經束髮正軒渠。側聽房杜商前席，笑指蘇張匿後車。莫問大功坊史事，頻年衰草沒平居。

余方垂髻，先公命以文字就教林師畏廬孤桐爲致之京師四十年後話舊賦及

文章閩縣紹桐城，九百虞初詔後生。投贖不辭千里遠，封書微發少年頰。千秋蠹腹攘孤注，易代龍頭屬老成。得似貞元話遺事，蠻陬涕淚早縱橫。

除夕此間花事甚盛中夜往游

風光自逐歲華新，數擊肩摩不動塵。列炬通明爭迓客，張旛搖曳近親人。千花擁道真開陣，一紙書紅便覺春。勾起老懷徵掌故，斜街詩鬢感霜筠。

家書道靜宜亦白髮微添矣

覆額垂肩憶靚妝，鬢雲如墨映朝陽。卅年風雨真催老，易代樓臺許見償。羈客已教

心似稿，征途誰遣鏡添霜？書來不是徒惆悵，入表憑君驗海桑。

春陰

霧霧春陰似合圍，穠華著意上簾幃。可堪露濕枝猶顫，恰竚雲開日漸暉。新蝶沉酣  
疑引醉，癯禪零落事多違。三年無語東牆下，容易華胥肯放歸？

靜宜久輟吟事北國來詩饒多雅趣

十年廢吟事，一紙惠清詩。想見安巢樂，從知課子時。拈毫香弄筆，追畫茗添卮。忽憶  
南遷客，臨風有所思。

因窗依樹罅，攬鏡竚層樓。北國終吾土，蠻鄉已倦游。晚晴娛薄醉，晨藪試新羞。一得  
江南訊，低迴去復留。

辛卯六月十五夜寄靜宜

共此團團月，天涯賦北征。三年猶惜別，萬里若爲情！客老憎絲髮，宵深數倦更。明朝  
應見許，珠字慰平生。

蒙學算經校餘漫書

交關會子幾紛更？剖析毫茫與正名。千載不容爭一算，欲將此意詔諸生。

舊從髀算計，鎔銖六藝難。工數與書。今日臬廬同一擲，更誰消息問盈虛？  
測圓鏡海兩俱忘，弓步難爲子細量。望極窮邊百萬里，莫從地老問天荒。  
少年勝賞黃金窟，垂老閒身著作林。歲月侵循吾意盡，不須記簿與重尋。

蒙學職方記校餘漫書

十年鏡被青霜鬢，九牧圖刪黑水河。整頓坤輿兒輩事，老夫夢裏早經過。  
郡國山川二十秋，風檣陣馬好勾留。職方老不能詳數，且展丹青作臥游。  
蘿圖歷歷數藩封，玉詔曾經出漢宮。今日謳歌稱敵體，輸他可汗是英雄。  
前朝遺恨數捐燕，北顧河山意惘然！劫後披圖稱繼絕，背人彈淚校陳篇。

過海濱船埠與靜宜錄別之所感吟

三年容易別，了了斜暉。海國天如醉，樓船去似飛。凌波猶顧影，回首每沾衣。但乞  
明朝願，還鄉早迓歸。

史詠賡得一客袖詩還五字斷句爲余寫實足成三律

碧海平如鏡，秋雲疊似山。三更催渡急，一客袖詩還。秀句尊前發，孤吟亂後刪。不堪  
雞唱曉，清淚漸攔斑。

相見休疑夢，重逢鬢亦斑。百年隨水逝，一客袖詩還。細細挑燈讀，徐徐就枕刪。此中天籟好，鶯語自間關。

白髮垂垂長，吟情未盡刪。十年磨劍老，一客袖詩還。市渡喧微寂，秋燈夜更閒。好看清絕處，眉月似弓彎。

辛卯九日

一尊無地酬西風，菊瘦萸香祇夢中。路迫關河迷楚岫，天斬霜露點吳楓。彈棊局散河東貶，市骨臺傾冀北空。海客不須嫌寂寞，猶將詩思托征鴻。

王四彥和內兄年垂八秩北行浮海視女

善和已斥三千卷，崇讓猶矜八秩翁。莽莽征途輕冀北，堂堂遺愛永江東。赭顏不減花前量，秀句還推劫後工。愧我牽幃兒女樂，團團鐙火竚詩筒。

近有藻繪繒綵山川人物之屬爲服御者客以爲多出西制余曰中土舊固有之雲仙雜記關文衍官散騎常侍嘗畫九華山水于白綾半臂著之曰令吾此身常在雲泉之內其嚆矢也因亦習御之

深衣易代制隨新，佳士風流墊角巾。我便欲爲關散侍，九華泉石隱閒身。



壬辰六月望日坐月寄靜宜

寂寂清宵月，團團照畫墀。波澄天映海，風動鳥驚枝。南北應無間，山川恨遠離。只憑珠似露，遙夜托相思。

壬辰九日詠賡招俞振飛伉儷作局吟唱適得海上來書

更無風雨到南疆，坐對岑樓送夕陽。海奪山光波淺赭，秋隨人意鬢微霜。漉巾止酒翻戕性，倚檻當歌尙許狂。乍憶江鄉兒女樂，蟹肥菊綻異投荒。

李明屬題畫冊

晴雲面面壓頰黎，綠靜紅紛翠上枝。背取小窗風乍過，更無人處換羅衣。生平絕愛淨無塵，卻掃沉吟祇自親。剝啄將門迎客笑，細斟佳茗是佳人。花驄會意莫嫌遲，况臨歧更有詞。屈指初三眉月好，休緣醇酒誤佳期。

由西環校園循山下降微茫隱秀夜歸輒窮幽賞一日倦餘過海觀殘月漫書

卷背

苑圃牽蘿薜，循鐙一徑斜。銜山餘半月，繞樹怯驚鴉。翦翦風迎棹，依依夢抵家。乍聞人語闌，遵岸逐輕車。

壽靜宜

三載歸舟客，千春樂壽人。澄懷能習靜，閑坐自安神。善葆容顏好，長看物象新。蠻鄉消息遠，卅六竚金鱗。

舊和楊公濟梅花十絕句寄興遙深忽忽十稔消息零落壬辰仲冬重獲幽賞

雕痕墜影不異當年欣再續和

寒雲滌盡見清和，春上枝頭不在多。許我重教姑射去，問君十載奈情何？  
鐵骨豐肌倚鏡臺，鐙簾書幌莫輕開。怕教漏洩春消息，淺露雕痕綴粉苔。  
風雪山中去復回，袁安洞壑爲君開。高眠擁褐尋常事，不信今生不再來。  
怯病遂教廢酒尊，餘情落落最黃昏。從今水驛山樓外，又放南枝慰旅魂。  
此是羅浮頂上花，伴君行役夕陽斜。莫嫌積瘴叢蠻地，累石誅茆便可家。  
堂堂六扇錦屏開，街鼓微嫌枕畔催。涼月如銀真妒我，畫梅特上茜窗來。  
瘴海三年竚雪肌，強揩淚眼憶南枝。縞衣不入征人夢，病到無情莫漫醫。  
莫道沾泥帶雪飛，巡簷重見最高枝。紛紛細蕊侵詩帳，此是承恩刻骨時。  
風過疏櫺習習輕，夜窗如水月籠明。橫斜簾影玲瓏透，笑指釵痕訴舊情。

紅羅亭子便爲家，不問晨暉晷月斜。十載侵尋香雪海，千春魁首上陽花。

壬辰十二月初二日賦紙帳梅花

疏燈薄霧小紅樓，南國天融臘似秋。破夢不嫌雞舌細，擁衾微泥燕歌柔。十年重見矜青睞，他日相逢儘白頭。莫負海山辜宿諾，飄蓬斷梗爲君留。

癸巳元日日蝕寄靜宜京師

紛紛栢綠映椒紅，春思迴皇入夢中。此日修蛇真赴壑，有人杯酒尙疑弓。花繁匝地懷雙闕，閣晦渾天翳九宮。且貯瓶笙傾白墮，羞拈青鬢對霜銅。

俞大綱招飲座中李相庵談命甚神迨及余輒應之曰求田問舍外無他願矣

相與絕倒歸途賦此

鬢鬣春雲漸入樓，酒慳茶醞遞觴酬。坐宮磨蝎難全命，赴壑修蛇速置郵。不遠梯航循北角，莫輕文字會南州。十年夙已盧生醒，問舍從君見許不。

曾履川和余此詩再疊答之

三年海角倚危樓，坐對雲山廢唱酬。已卜餘生憎宿曜，乍驚麗句托詩郵。豪情歷歷尊前客，急景茫茫嶺外州。把臂不堪同北顧，故園松菊尙存不。



# 高梧軒詩卷八

武進 趙尊嶽 叔雍

近授諸生美學絕少傳書因婢女就徐氏女假得兩種蓋故人徐森玉女公子也頗憶曩歲北居搜刻明詞森玉傾篋見假更惠以影鈔陳坐隱和草堂詞孤見單傳之本爲蕙風師彙往而未及一見者光陰荏苒二十年前朋簪之樂輒上心眼爲賦其事悵然久之

長安如奕棋，黑白屢爭道。至人置不問，心事自了了。摩挲蠹簡中，嫵嬾足娛老。文史素敦尚，蘭荃猶宿好。余時尙盛年，雅興嗜詞藻。搜羅盡瓊玖，雕斲付梨棗。一帙君見貽，精繕奪環寶。坐隱和草堂，世獲真賞少。卽爲傳萬遍，猶恨蕙風歿。不及盪薇誦，餘音聽嫋嫋。光陰似迅羽，南北困紛擾。君猶安王城，余已越嶺嶠。花時每自憶，此老當健矯。禪悅資供養，圍座麗緗縹。苦難再相從，借瓶通八表。何期玉雪兒，青箱真克紹。旁窺涉四譯，孤槩矜七稿。聚書傳翁癖，治學不輕掉。邇來復假我，美學供深造。此學最精微，斯理窮要眇。舉世無幾家，玄悟能澈曉。嗟余課諸生，聊事謀一飽。違言教與

學相長共研討。腹儉空無儲，憂心正如擣。得此色然喜，窮陰怳胸臆。重念乃翁殷，奮夢更縈繞。交期延奕世，勁節仰霜篠。何以我廢學？從宦困塗潦。鬢髮已種種，孤憤空滿抱。長歌輒自咎，抽簪恨不早。

林下行

天吳紫鳳紛闐闐，蒼狗白雲爭伏臘。東南誰信有扶餘？一客平居屏塵雜。山樓面海枕平莎，山似煙鬟海似羅。地迥不嫌行迹少，廊深自著夕陽多。夕陽照映英思發，生具柔腸兼俠骨。儘將心史擲東風，猶獵奇書坐明月。著姓傳開頃刻花，嘉名一石酌流霞。霜林千樹紅于錦，紅到澄江處士家。幼從姆教工詩禮，掌珠最博高堂喜。羣季俊秀盡長才，不櫛里中尤進士。更通四裔習離侏，重譯旁諳海國圖。絕學略窺金鎖陣，異文詳辨玉麟符。萍泊青州容暫住，披襟浴日工新句。縹緲峯頭九點煙，參差闌畔三株樹。懷兄慷慨策平戎，濯足蓬壺跨海東。書劍不辭勞萬里，旂常長自傲三公。莫輕弱質難爲用，江漢師興共騶從。微官末秩笑閒身，急劫餘糧正收宋。事成投效便歸來，還我湘裙舊翦裁。旋納玄纁徵聘幣，不須紅葉當詩媒。槃槃夫婿真華國，玉鏡臺前似相識。簪邊殖貨已堪矜，磨盾揮毫還檄賊。移家漠北靖胡塵，博議青廬翰

墨親。寒雁睥睨鷓鴣笑，柳條城外雪如銀。賭書澄茗尋常事，唐碑晉帖爭羅致。龍威  
祕笈壓名區，宛委仙山超福地。公卿倒屣動京師，徵辟連宵羽檄馳。九府通財關大  
計，三農薦穀重恩施。維時地坼天崩墜，遍野玄黃遭寇騎。行朝一髮繫中原，正朔崇  
朝恢漢幟。重披荆棘濯銅駝，涕淚收京奏凱歌。父老騶虞依北闕，欣看洗甲挽銀河。  
密書況已通靈武，鐘應銅山期復禹。婉嬪端資內助賢，鴻濛胥仗媧皇補。不爭不伐  
不矜功，共勉丹心貫日忠。鐙火歸來堂上坐，吏閒賓退倚詩筒。孰知禍變生倉卒，倖  
勝翻教罪曲突。永王奉詔出金陵，死貶庶人遭籍沒。太白長流去夜郎，台州司業事  
堪傷。劇憐獨柳毵毵下，一輩銜冤比國殤。東城甲第開酣燕，羅織羣陰方構扇。緹騎  
初臨上將驚，檻車乍蒞儒生賤。一時菲畢換圭璋，土室塵封夜不光。從此俊臣工鍛  
鍊，門開麗景布彈章。倉黃棄室謀宵遁，稚子牽衣同遠引。蚩尤典籍仆靈旗，師曠調  
琴拋玉軫。削瓜無那對臯陶，恩賚斜封竟未邀。囊底文章爭象魏，夢中翡翠尙蘭苕。  
危邦亂國難羈跡，熒惑移宮見兵革。南天一角去勾留，蘭菊蓬蒿環堵宅。耐閒強記  
習多聞，脩脯時行禮數殷。蓋世紅妝尊季布，千秋金鑑屬宣文。五經腹笥便便積，餘  
韻長歌愛元白。大家再續腐遷書，元凱獨傳盲左癖。與來理曲倚晴樓，帝女緣深自

解憂。比翼挽車明日事，鬢霜不上德公頭。荀陳縱跡同吳楚，我愧交親共雞黍。秣歸井里謁霜砧，數首丹青瞻繭楮。復從異域拜彤幃，熟後黃梁有所思。莫惜尊前尋往事，好循林下溯芳儀。

癸巳上巳日禊游淺水灣分韻得騁字

我生似浮漚，南北苦泛梗。三載遷炎洲，寂寞弔孤影。陽春好韶華，強起攬煙景。不知復上巳，歲月誠可警。拿舟飭行事，命駕越前嶺。峯迴路幾轉，滄波出萬頃。氣驕奪胸臆，晴開見晝永。赤日正杲杲，萬卉真蠢蠢。老樹疏復斜，重樓高且迥。當戶藝蘭蓀，傍岸繫苓簞。一來據胡牀，先就索杯茗。少拂緇衣塵，旋進槐芽餅。曠觀信有得，冥想發深省。山光朱乍紫，水態動倏靜。不患宇宙寬，片嚮恣管領。更憶前來時，挾客半醅酹。少年意氣盛，窮目極游騁。誰期二十秋，鬢雪已炯炯。馬櫻高出屋，紅棉夙生癭。婆婆山海間，閱人自淒哽。彌天千古劫，天道本無盡。蝨處窮禪中，思之每輕哂。偶欲傲古人，濁慮率洗屏。戒定恨不工，狂歌贖衰郢。

新會唐天如翁廢詩十稔見余林下行喜題兩律且屬賦和翁作文論政坐禪

品茗醫學臨池無不精勝獨未見其詩篇豈真亂後所刪耶依韻酬答



一榻深藏壑，團龍每自煎。戒詩從亂後，負手每花前。忍事心波息，臨池筆意圓。隨宜  
三味海，觀照已瑩然。

采藥尋幽契，誅茆瘴海濱。遺編傳性理，野獲好敷陳。偶發囊中句，時疏物外身。祇慚  
林下詠，刪後復何言？

荔園曉詠歸途口號

破曉鋒車疾似雷，塵心洗盡白雲隈。晨鐘初上歸鞭動，滄海桑田日一回。  
隨波逐浪已多年，函蓋乾坤亦偶然。截斷衆流今日事，雲門信是祖師禪。  
平生諳盡江湖味，老去閒參飲水禪。俯仰一身滄海客，羨魚每自忘臨淵。  
萬里風雷效靈，扶搖潑浪涉南溟。今朝甘作池中物，猶染潛蚪帶雨腥。  
皺面觀河不自勝，遽無坯土卓孤藤。青天雲映瓶中水，此義同傳教外鐙。  
海水羣飛不計年，紅旗狎浪孰爭先。何須更唱公無渡，魚躍珠沉自九淵。  
麴塵微動水微波，錦燦霞明黛點螺。近識親人魚鳥好，相從洵沫不須多。  
浪迴起攤千重雪，潮落徐開一脈銀。揮手欲從河伯語，燃犀許與照沈淪。  
懷沙抱石事酸辛，一曲郢歌笑逐臣。入水不濡方健者，此行直欲傲靈均。

渡江一葦事尋常，望裏青山接故鄉。莫更中流爭擊楫，濯纓人合老滄浪。  
舊向迷津覓坦途，渚宮沉網取珊瑚。十年前事休重問，又探癡龍領下珠。  
試卜歸期未有期，寸心輸與弄潮兒。長風沙在長江口，回首煙巒別幾時？  
歷歷沙鷗弄遠帆，倦游一笑倚前巖。釣磯善說南唐事，心史千秋付鐵函。  
早擲浮名棄九垓，濠堂長日對滌洄。枕流漱石非吾事，履薄臨深更一回。

梅窩示客

一去江南第五秋，無邊風物憶前游。今朝重入征人眼，水輭山溫著艣柔。  
繁花漸已綴殘英，許我幽棲逐晚晴。猶遣當春英氣在，凌波顧影話平生。

散原丈百歲週祭紀之以詩

千回雲氣壓匡山，百歲聲名付等閒。問字荷衣驚鶴髮，浮觴酒面奪蒼顏。棠梨歷歷  
隴頭發，椒桂盈盈客裏慳。不盡餘生成寂寞，天低夢遠雨潛潛。

癸巳冬日南疆奇熱見梅枝

陽暝侵冬氣，單衣竚嶺梅。南強真世外，西笑幾顏開？習靜徒看灶，扶衰早覆醅。巡簷  
明日事，先待錦書來。

嚴冬奇暖觀馬賽適得家書謂已雪矣

濃氛侵海國，輭霧襲林隈。潤逼重衾暖，春酣一線來。綠華先解拆，金馬試銜枚。北驛傳新訊，窗明雪作堆。

甲午仲春京師人士移崇效寺牡丹至社稷壇花時尤盛開逾恆

五雲扶檻侍花王，京國風流夙擅場。亦有吾家姚魏在，十年心眼繞南陽。

武昌劉馬生長文字有奇氣主革命少游瀛海娶西婦而繩以禮法所著洪憲

雜事詩尤傳衆口茲隱化矣迴憶歌酒之盛挽以四韻

白髮江湖奠一尊，楚天引領望經幡。萬言匡濟難容世，百歲功名總負冤。馴悍威猶加異域，發姦詩早譽江南。歸田料量平生事，忘卻人間萬念喧。

挽鄭二

池臺花木南陽路，博奕歌呼北海尊。百歲比鄰成隔世，一肩萬里別中原。白頭自帽難終老，赤膽蒲衣總負恩。涕淚河山三晉遠，鶴歸誰與共晨昏？

參大士道場歸賦長句

浮生百歲困羈旅，況我違俗多齟齬。南強北勝角中原，不問黃梁熟幾許？間關出死

泛瓊海，歷劫遷流換寒暑。王尼露車每道旁，尙遜虞生寸椽主。左圖右史久屏厭，低首空王乞法乳。此行命駕出郊坰，漱石枕流耽勝趣。道場參啓觀世音，六時晝夜度厄苦。喃喃繞室隨梵唄，洋洋果腹飽桑菹。坐聽和上說開示，靜看飛雲擁牖戶。重翻貝葉誦記勸頌悟萬言，惟一語。真如無相亦無我，斷際絕愛了了去。此生旣復脫業力，出世入世兩無取。我心卽已超法界，我卽已契佛祖。一時乘願入泥犁，羽水介濕不勝數。五年天游傲化人，自分道心猶未腐。坐隨緣法會重來，暫攝無生容卓塵。

黎壑泉寄甲午除夕詩索和章

竊號臣佗祇自娛，千秋逐客竟何殊。江山乍覺春來動，花柳閒從靜處蘇。今夕年光隨物逝，幾回詩夢喚君俱。相從瘴海猶相勉，肯作訶林一腐儒。

補介鄭韶覺翁入秩膺入生辰

華屋懸知海更桑，千春聲叟信南強。吟箋歷歷猶酬客，筆陣番番夙擅場。收拾勛名貽燕翼，從容世路忘羊腸。侵晨更進伊蒲粥，蘇晉齋前別有香。

瀏陽唐將軍挽章

上將兜鍪重，中原禮數尊。克家知令子，變法殉殊恩。多士趨行在，三軍振國門。乍聞

傳節綬，挾纊有餘溫。

佐命開新運，收兵掌集團。花迎鏡吹競，斗壓劍銜寒。宿衛矜持節，廷爭數免冠。元戎終就第，密記贖金鑾。

落落身如寄，休休道漸深。不曾親阿堵，偏欲散黃金。俸薄多供客，醪稀亦賞心。門難容駟馬，花竹自成陰。

老作南疆客，猶縈北雁書。海隅看落日，湖上比騎驢。癖酒身爲累，憂時淚不枯。丹旄誰與篆，隋葬卜幽居。

唐將軍與余結鄰三載，輒共觴詠，感舊惜逝，情見于詞。

層樓楚楚柳東西，翦燭嚴城注滑稽。劍佩雙龍揮斗柄，丹青尺繭出金題。厭兵忍聽寒蛩語，負氣微傷慄馬嘶。猶憶坐更霜月夜，梅花山畔草萋萋。

乙未正月二十四日汪希文修祀事敬賦

宋子存殷祀，周黎述古公。一時紓浩劫，克日奏膚功。弓劍千山渺，敦槃薄海崇。十年詮往跡，猶許訴孤忠。

王會真贗錄，嘉猷秉止戈。興元終復國，寶佑慶登科。上將三臺令，斯民五袴歌。至今

餘父老，述德頌魏峨。

忝祿加車服，從征視裸將。六街花似錦，四野戟如霜。笑下絲綸詔，歡騰陞楯郎。夜鐙焚細字，方略取收藏。

忽忽山川改，迢迢歲月徂。人心思漢澤，野紀廣虞初。尙及衣冠盛，難教習氣除。吾徒猶好問，經野近何如？

乙未元日姚莘農伉儷招飲屠蘇張大千吳子深父女作畫爲壽屬余及楊伯

平題識

元日杜門多謝客，我復無家更安適？主人好事娛衆賓，新釀屠蘇感肴炙。酒酣振袂起致語，乞共清緣存雅澤。座中四顧誰支頤？倏忽風雷出肘腋。延陵拔地寫松翠，老幹細鱗破天脊。張髯莞爾一揮灑，飛瀑千條界白石。遙看頗得象外意，古媚正出墨痕藉。圖成抖擻殊自喜，餘子銜杯皆辟易。偶然嬌女起檢衽，尙信簪花有巾幗。近承家學盥粉赭，時檢青箱臨勝蹟。初生犢子不畏虎，試植筠簍補松隙。麝煤著筆不須多，數葉已能見風骨。婀娜剛健各有致，疏密陰陽矜創獲。此如公孫舞劍器，善攝神明入方尺。一時觀者盡歡呼，主人屏息手覆額。翦裁垂定待潢冶，餘事眉端記年月。

唯唯四座競推許，我亦老擅煙霞癖。手盲縱不諳六法，盛會每復廁裙烏。心驚目怵  
竚不語，細字何堪肆唐突。扶將酒面就案隅，奮挈毛錐如健鶻。書成爾許不自省，春  
蚓秋蛇安足責。楊侯別爲致吉語，草隸斑斑名藉藉。持茲介壽壽萬千，何況題名同  
莫逆。一觴一詠備掌故，異日相思資玩惜。伴君毫畫逮期頤，歲歲摩挲珍拱璧。更須  
鄭重詔賢郎，楹櫝深藏莫輕擲。

鄉人王南平出示所藏乾隆題南田畫冊

寫生孰不師徐黃，繼起吾宗惟趙昌。由茲寂寞數百載，雲溪晚出揚其芳。布衣名姓  
動京國，筆精墨妙何琅琅。流傳獨惜多贗鼎，千家癖嗜藏巾箱。偶致雋品比方物，儒  
臣進御南書房。遜朝文翰感天府，好事第一推純皇。每拈宸藻紀歲月，媵以絕句樂  
善堂。斯篇尤復三致意，題詩先後森成行。快心縱許會清賞，惡札徒自玷球瑯。興亡  
忽忽歷幾劫，籌更滄海移紅桑。此本亦更墜海國，藏者懷寶疑迷邦。深緘固鑄輕勿  
出，鐵函難與遮光芒。吾衰幸得一平視，摩挲神物心爲張。山水靜遠彌有致，花鳥活  
潑澹生香。天機動處得清趣，妙手微觸相軒昂。平生所見逾百事，屈指此誠冠縑緗。  
亦知尤物終不晦，鎮庫欣屬吾鄉王。

乙未清明不獲上塚北望感悵

孤兒別母且卅年，孤兒別父垂廿載。不忘總角撫兒時，頗逞聰明嬌作態。少年漸涉世，忠孝殷殷尤見誨。如何日月不少假，每念庭闈輒心碎。浮雲世事早百墓空嗟，犯衆喙。白頭窮島偷一息，敢信遵時資養晦。松楸故國念不置，喬木室未逮。一盂麥飯失祭拜，千劫慈恩慳報賽。豐碑歷歷尙穹窿，饗殿沉沉疑積穢。萬里越關山，此心百歲不少貸。卜歸竊願安首邱，負土誅茅親秉耒。先持此音女，他日隴頭蔭遺愛。

靜宜報書具述蘋蘩薦享之盛喜和前韻示之

南天幾度枕榔開，屈指輕裝乍七載。田園寥落不歸去，徒遣夢魂役形態。偶逢益淒悵，孤露岡阡感訓誨。輒愁木壞更棲崩，復慮瓦全還玉碎。閣中喜報雙鯉，我悻悻毋置喙。持門卅載凜職守，展敬千秋遵朔晦。蘋蘩馨潔奉上祀，牢饗汗不逮。雜花芳樹亞簷低，膝畔隴頭儼春賽。扶孫掃徑試刪籬，引井汲泉時滌穢。羈客少安藉，獲罪通神許小貸。更乞閒緣天借與，他日躬耕容釋耒。麥香風送時，白髮相看矢敬愛。



已丑四月四日泛海南來迄今適七載孤旅寂然漫吟以紀歲日

七年去國難爲憶，四月圖南夢尙縈。相見兒童驚久別，乍新風物伴餘生。酒腸不信枯猶腐，詩筆還期老更成。屈指紅棉開又落，幾時雙燕送歸程？

故宮院長馬叔平過從夙密茲溘逝矣作挽詩示介弟季明

坐領觚棱二十年，黃雲紫蓋送華顛。客星曾犯璇璣座，祕殿同烹小鳳園。陽春飽看太平花，三月東風浣晚霞。記得留連詩酒好，不知門外是天涯。圖書東壁窮山海，彝鼎西清絕古今。脫略萬幾專爾雅，羨君青瑣送春陰。北訊驚傳信卻疑，生平樸學失餘師。青藜太乙猶殘夢，我爲斯人淚滿頤。

挽王十述勤內兄

京雒溯風標，驚聞賦大招。文章尊內翰，旌節傲天驕。築室差旋馬，邀尊解贛貂。舉頭疑日近，徒自泣鮫綃。

奕葉承明德，平生戒激隨。衆欽人落落，自笑印纍纍。屢卻車書聘，閒吟歸去辭。此君真吏隱，應與勒穹碑。

卅年崇讓里，鐙火綺疏前。假館難尋夢，投荒欲問天。鰥魚知寂寞，雛鳳識蟬嫣。別久

慚書少，千秋更惘然！

乙未伏日口號

朝朝魁芋甘如蜜，夜夜書鐙細作花。直似東坡老居士，一時安置在瓊厓。  
經旬不廢青蒲扇，片霎遂融玉碗冰。磅薄無人先四顧，老夫怯暑卸吳綾。  
朱櫻重疊壓簷低，老幹槎枒傍水敲。想到西郊風物好，十年清夢一攢眉。  
迅雷一震羣峯合，驟雨千行萬馬奔。收拾隲囊去屋底，息機坐看戰乾坤。  
蝸居何自覓清涼？三伏炎蒸竄異方。應合免官關立德，鳩材重與建書堂。  
看猴觀渡意便便，倦暑無心作晝眠。人道天官三覺好，羅浮猶竚縞衣仙。  
綠天深處幾流連，坐晚移陰落照邊。不挂寸絲階下漢，願持此意答南泉。  
誅茆結制信清緣，斐几繩牀別有天。我已平生工解脫，卅年不學滄山禪。

壽喬二兄挽章

白眉羣季最，青眼萬流欽。上藥傳龍樹，春風遍杏林。不期淫末疾，竟爾戢輕衾。遙企神州遠，低迴慟不禁！  
哀樂中年共，流離百事疏。持躬真謹飭，蹈劫殉乘除。抵足湖樓夜，扶頭草閣初。卅年

蹤跡在，淚掩數行書。

羈累甯爲罪？圖功輒尙勤。綴箋敲短榻，思誤送斜曛。絳雪丹無及，唐婆鏡不耘。遽慚通聚窟，徒與擷芳芸。

少日矜同氣，衰顏惜遠離。亢宗推祭酒，甲第慶含飴。病廢頻通問，閒居偶寄詩。傷神傳隱化，風雨爲淒其！

### 禮沈崑三骨灰金塗塔

獨攜殘照對金塗，靄靄煮蒿寒海隅。終負同歸盟息壤，劇傷一奠薦生芻。蝶栩周夢人真幻，谷絕陵遷淚亦枯。卅載濤園風物好，清談雄辯更誰俱？

### 久不臨池偶檢得舊所作字爲之振奮雜寫數詩綴爲跋尾

平生風法華，見筆好塗弄。瞬息盡篋紙，手揮目不送。不排亦不勒，畫字輒駭衆。見者不敢收，收拾覆瓿甕。百年一轉眼，諸事比寤夢。偶然獲舊跡，真贗難自訟。龍蛇肆搏擊，風塵夙須洞。大鳥出檻車，吾慚王次仲。

貴賤爭路隅，倔強專可喜。一則氣相凌，一則怒而視。草顛真書聖，于此悟至理。吾嘗觀世變，萬里盡尺只。劫殺已連歲，成敗過隙駛。何獨無所得？疵累猶滿紙，明朝聚柿

葉，僧寺試棲止。鄭虔終窮人，遠謫海隅死。

先公授書法，牙牙方學語。亦嘗掣我筆，潑墨誤新竚。緣知非官奴，責咎督夏楚。此事關秉性，甯可罪毫楮。由茲疏翰墨，展卷每色沮。生平且強仕，南北不違處。偷閒再學書，漸始厲鋒距。投老無所成，聊事伴尊俎。

夏雲幻奇峯，常真得其趣。公孫舞劍器，顛旭獲神悟。始知學書者，豈盡重矩度。吾粗通聖解，指臂患不注。涵修力尙薄，涉世紛俗慮。聊能事波磔，還當藥沉痼。時復意有餘，每惜筆不赴。長負海藏翁，點畫煩指喻。

每或恨二王，書不得臣體。景初非狂言，豪氣出腕底。敬元與懷琳，屢作致醜詆。世間有真賞，品目初不昧。吾祇用吾法，探海識測蠹。歷歲費艱辛，及老徒撫髀。悍然終故態，無術就乞米。明窗棐几前，自珍比甘薺。

千丈八百本，江東散僧寺。結習猶好名，上座殊多事。吾則類季真，與到始小試。志機就客席，濡毫出墨戲。走豸與飛蟲，頗不嫌造次。更番輒棄去，未許收篋笥。淋漓困一甌，閒或涉古媚。何來硯務官，程材供器使。

囊頗好龍藏，風骨最娟好。漢隸固溫厚，兩爨患矯拗。亦嘗習墜簡，所得出意表。上復

追墟契，點畫計多少？萬靈集腕底，衆芳紛膠黼。不如全吾天，憂憂待獨造。嘉陵夢江水，結想間達曉。應師夜起庵，晚歲治章草。

東坡所常師，醉翁臨十本。漸復樞西樓，駿馬陟平阪。舒徐又馨麗，雅士被華袞。未容著奢望，自分指臂蹇。曾亦臨夏承，結構尙蟠蜿。似悟兩者間，舉一可三反。自青專絕學，流別識樞鍵。何當持此論，相質鐙窗晚？

孤桐愛拙書，題品出佳句。謂有晉人風，灑落多逸趣。此真相馬者，與世異好惡。牝牡驪黃外，冀北空一顧。泛泛鴻雁行，誰復別鸞鷲？世人重藻飾，真賞在玄悟。審音固應稀，老眼殊不誤。知君夙自矜，慎勿輕簡素。

時流學瘦金，摧枯似拉朽。骨寒更無肉，于法亦何有？道君天人姿，數運卮陽九。藝事冠古今，孰克繼其後？雲孫擬一試，見帖輒卻走。暝索更遐思，捉筆如擁帚。終于無所得，徒自傷沮忸。願以勉世人，幸勿曝其醜。

### 壽楊翰西八十

相違不信老朱顏，與到猶將舊句刪。已倦效靈安岳瀆，未忘有美葺湖山。丹青渲染松筠節，子弟嬋媯玉筍班。笑看中天明月好，幾時載酒伴君還？

壽王四彥和內兄八十

鳳池龍節自傳家，老去長安景物賒。入水不濡張渾脫，  
兔舟難誨人無倦就官衙。愛  
看花竹清和客，聊聽池塘鼓吹蛙。何啻散仙腰脚健，東門常種故侯瓜。

東坡與趙郎中相唱酬郎中輒自慨明年六十矣東坡作詩調之此與余有同  
感爲廣其義

明年六十奈君何？阮老去郎中輒放歌。幸得東坡差解事，醉吟酬唱與消磨。

客至迷余前監修淞滬海塘事惘然賦示

好風吹我大隄前，坐壓潮頭氣萬千。與水爭田非倖事，觀河奪境亦期年。麻姑空笑  
籌添屋，夸父終看日墜淵。遍野桑麻吾願了，投荒誰復識華顛？

鄉人錢湘壽治家庖炊餅見饗七年不嘗此味爲之解顏雜寫口號紀之

家庖炊餅勝珍羞，菘末花豬不點油。莫道牛心前日好，莼鱸萬里正難求。  
偶安穀食與鶉居，志意行藏自卷舒。鼎鼐鹽梅隨手絮，江湖蔬筍帶經鋤。  
端知腹不負將軍，詔令興元四海聞。縱使東南王氣盡，有人鼎鑊護風雲。  
膳夫經手錄成編，後起隨園繼昔賢。頗愧和羹無妙手，萬羊空負腹便便。

揚州所著食譜曰膳夫經

吾家亦有鍊珍堂，慈母親書食憲章。不獲九人傳妙技，夢回無語憶南陽。段文昌事

逢堯誰謂是癡兒？負鼎承明試論思。揀得莊州十年住，終教默啜侍彤墀。和建堯事

羊腔下酒正爲佳，夷食差同酒漬蝸。莫笑南人輕燕麥，起搜牢九足生涯。

穆滿西巡夙飲潼，此行歲歲盡千鍾。不如豆酪兼腴雉，喚取吳姬午夜春。

繡衣不許食花豬，唐律森嚴祇飯蔬。我是馬周嗜雞肋，儘他小吏訟苞苴。

平生亦嗜達頭魚，薑桂湯成薦晚蔬。曾欲題詩終斂手，梅歐道盡已無餘。

王郎鋪啜異當時，海月真教敵荔支。嘗遍南疆千百味，黃梁猶乞佐鹽醯。

小鮮終自愛江鄉，大國侯鯖亦遍嘗。投老始能傳老學，漸知無味最甘香。

初夏泛長洲訪周大志輔迷道久之始抵新居述京朝音政故事將續纂刻劇

話也。

偶揮塵土入清空，坐對朝曦挹曉風。山色高低隨泛舸，客心牢落逐飛蓬。傍村先與

尋歧路，壓座何勞費一虛？近方病胃止酒故云話到開元人意倦，無多霜鬢付明僮。

觀雜技團

華蔓不滅故園春，乍湧甞能出化身。帖地蓮開真鎖骨，凌波鶯語自傳神。竊驚海角天涯路，猶著荒山蘭足人。留得琵琶懷賀老，定場幾度落梁塵。

飲中九仙歌用子美均示勺波

勺波甞能泛觥船，盈尊厭厭倦欲眠。獨謂醉以樂其天，汗出如瀉口流涎。譚語疊出如湧泉，空負何曾費萬錢。鯨吞虹吐瀆玉川，側目失色動諸賢。壯心烈士傷暮年，萬一不獲全於天。玉山頽然奔雷前，虎頭燕領仆當前，奪境立參茶毘禪。空貽雅故傳簡編，聲名百世人長眠。倖渡孽海具法船，目光巖電出散仙，驚呼一聲四座傳。裙屐鶻起掖之前，大難遽脫破塵煙。狂奴故態復依然，明朝攝衣趨華筵。

夏日飲薑汁美而賦之

冬日飲湯夏日水，千百年來傳妙旨。苦荼薺香出稍晚，坐使熏伐竭膏髓。後人有作更眩感，佐以鹽梅或菊枳。味回遽奪舌本甘，價重徒資利津市。平生好酒不解茶，難辨滷溜判珠莖。南來消渴苦藥轉，斷酒戒茶絕渣滓。偶然發尊得薑汁，乍感通神恣錫咳。水枯聊以解寒毒，醇厚竟能潤吻齒。一鍾便自起衰屨，雙井那能當壁壘。初嘗涓涓漱素澗，縱吸潼潼謝玫紫。芳馨雅勝末利澱，倩潔直引惠泉邇。霍然解醒便有



餘，倏爾湔腸益可喜。炎方倏已患邪濕，只是梅酸差足抵。不如琉璃盡一卮，臙馥猶能鬪蘭芷。天生雋味屬蔬芥，士夫風味屏鹿豕。豈容唐突譽龍團，願奉花磁侍玉几。



# 高梧軒詩卷九

武進 趙尊嶽 叔雍

潘梓彝夙居江南近返南越復構岑樓招飲索詩

舊聽靈修

何靈修撰夢痕錄述其往事

說夢痕。乍攜笠屐過頤園，紅塵自隔幽棲迥，碧海初空萬籟喧。易地南強爭北勝，平居故國望中原。雲煙總是宜詩客，何處繁花不滿軒。

丙申十月九日招天笑孤桐兩老小飲回溯光緒廿九年癸卯兩老方共事筆

硯於上海文字切磋飲博徵逐無日不相共乃自後睽隔逾五十年此夕重逢賡酬雅謔爲樂不減疇曩且約互贈詩篇用志嘉會觴生以齒幼獲主東

道先申隍引

天開雲氣壓重溟。太史從容奏德星。莫道遐荒常落落，試看松菊自亭亭。

煦沫惺惺五十年，優而不見並華顛。何須細數貞元事，一度紅桑一惘然。

霜侵北客黃師鬢，雪滿南州處士頭。各事休明承鼓吹，更欣簪盍會瓊陬。

白袷尋春兩少年，墜鞭放子著鞭先。迴車淒斷稽山土，雋語難忘畫閣前。

恭維夙當年力編區桐嶽

高梧軒詩

表以爲美人青睞所及先  
加兩人至今猶以憶其語

爪印猶留雪上鴻，黃雞

像示人  
通覽

十三走筆賦高軒，垂老

晴雲夢雨琢新辭，乙乙

步

東坡子野每論詩，鎮日

海水羣飛歲月淹，扶餘

石家鮑勝湯  
著故賦此

汝南月旦舊知名，博覽

海上連  
類有優

姚莘農東游以下

爲韓幹手筆遂

龍文虎脊尾委垂，撫鬚

毛欲動，挾策亦輒干雲馳。自分平生極此樂，嘶嘯豈受鞅與羈？誰信過隙瞬卅載，野馬幻出玄黃奇。仰秣伏櫪飽更故，終使知雄守其雌。今朝神駿疑返視，海南何緣重見之？張髯兼金致韓畫，倭客手鏤漬桑皮。吳興蓬萊矜賞獲，清祕不許凡夫知。今而後吾真始信開老眼，支公心印無餘師。

再賦前題

大鵬海東雙翼垂，扶搖曳尾煙如絲。羊農以飛機行故云歸來不獨致神駿，騰以玉川之毛錐。神駿寂寞千載上，飲陸差勝揚鞭馳。屹然駟卿侍左右，相靡交頸弛鞍羈。緣知任性馬自適，義臺路寢甯足奇？伯樂多事倪復扼，叔敖不辨雄與雌。凡茲妙悟通至道，韓幹一一乃得之。少陵何爲致苛責？謂但畫肉遺其皮。吳興持示有深意，鹽車峻阪吾能知。只今展卷敢逼視，猶恐見訶鐵面師。

三賦

雙耳批風聳不垂，驥子色潤如純絲。將軍身手突健鶻，足踣扣股猶堅錐。歸來百戰解金甲，論功正復事驅馳。溫顏親爲去檄飾，首藉飽飼馳銜羈。靜如山岳動脫兔，見者嘖嘖咸稱奇。英才俊物天所縱，長嘶浩氣奪覽雌。曹韓相繼窮妙態，何幸丹青能

傳之。世人不察傷至德，燒剔刻錐徒傷皮。莊生一語真破的，盜馬罪惟伯樂知。從今一笑釋曼筴，昂首天外吾當師。

四賦

茫茫平野天四垂，古塵靈簡紛蛛絲。髯翁於此獲至寶，流佈不假氈與錐。謂出李唐韓幹手，心想目追窮飛馳。寫動更不若寫靜，銜枚何似脫塵羈。鷹揚牧野竭汗血，止戈應繩桃林奇。又聞張唐造贗鼎，撫勒撲朔迷雄雌。縱有大力挾以去，風雷隨起天妒之。此卷差勝水府舊，千金市骨何論皮。不須好事辨真偽，色授魂與吾自知。世人紛紛妄穿鑿，不見曹韓李趙相承師。

張唐偽作韓幹馬事  
見張文潛明道雜志

日浴寒泉嚴冬不輟作詩以快吾意

天時人事真草草，對鏡漸漸鬢髮皓。邇來貪手百不聞，首藉空勞致一飽。杜門將命戒賓客，鍛鍊猶存元氣浩。讀書學劍兩無成，日涉寒泉試濯澡。叢爾陋茲湯沐邑，僅事容身潛石璫。壺公無與共酬對，巢父何似陷潢潦。解衣瑟縮若有聲，濡首痠瘰先合抱。洋洋泔泔終自得，鯉躍龍驤挹東杲。爬搔剔抉未移時，居士無垢無煩惱。天生傲骨肯自餒，頗喻黃花紛翠葆。賦形不須誇獨厚，奇癖黎明矜玩好。功深積歲亦尋

常，姑射仙人差近道。友生竊笑徒自苦，室人詬謫憂心擣。羣兒無日不煩言，深恐窮陰漬肝腦。凌兢當風輒自哂，紛紛誰識浴德好？日新底與怯寒威？我有純陽澤枯槁。中原萬里踏已半，垂老風帆落嶺島。海桑何啻閱三遷，瘴厲終教付一掃。若非漱石勵千秋，安得浮生容再造？十年冰蘖戰膏梁，此語平生真絕倒。

和孤桐謝壽

衛公行兩喜重來，坐聽春陽破蟄雷。孟獲終教遵漢臘，邱遲畢竟是清才。八琅翠管宜高詠，二月紅棉正盛開。何事岑樓慳一醉？朱霞長護棟梁材。不須呵殿出南城，喻蜀相如此遠行。藁館微傳寬象魏，島夷會見貢珠鸚。要荒此役開藍縷，湘沅重經掇杜蘅。莫道勾當些子事，止戈萬戶祝長生。

丁酉初夏冒瘍初愈漫賦

平生右文天所鄙，封侯食肉差可喜。動如驥足蹈雲漢，矯似獼猴擅竿伎。堯肩斗酒盡一霎，春蚓秋蛇倏遍紙。凡茲稟賦忤性命，坐使氣化竭肺腑。二豎終入隱膏肓，三彭益復肆姦宄。十年天府受荼毒，一旦腕膈決瘡痍。沉沉乍似鯁在喉，滴滴初遺血盈齒。立致桐君徵上藥，鎮日鄂君張繡被。鍼經甲乙索歧雷，食譜華夷屏糠粃。太牢

大武作羹湯，蔗漿崖蜜奉甘旨。薄裁牢九礪剛炭，少著粉乾淀清泚。失時饑飽難自省，瞑目醉醒呼不起。客來囁嚅就角枕，東到躊躇答牀第。圯橋坐爽黃石約，畫檻徒追白雲邈。冰壺入抱不勝寒，磔雪點茗聊復爾。浹旬鐙火始涉眼，比屋箏琶漸入耳。孱軀款款試扶頭，仙骨珊珊猶撫髀。丈夫畢竟載祿食，健者復又倖生理。修途未遽委鹽車，臨墓終當誓江水。衛武秉燭登大耄，之武繼城亦暮齒。吾頃伏櫪了莖豆，不更拄笏累薏苡。功名意氣舊如雲，衰病襟懷今敝屣。玄黃與病卽與閑，春夏讀經兼讀史。獨除宿忒屏尊疊，陶賞風光娛杖履。飯蔬飲水亦可人，坐看大千闢紅紫。

李彌庵以尊人所批亡女所錄虞山舊詩屬題余亦遍涉破山三峯諸勝且於三峯值禁語僧事且卅稔歷歷心目比者同客海隅讀之不能無感爲書卷

尾

寸楮卅年消百劫，微吟萬里尙餘哀。老僧禁語吾猶識，弱女臨池事已灰。莽莽山川繫故國，萋萋朱屨夢南陔。相看同墜人天淚，窮子思家又一回。

監諸生校試三日戲作

舊讀東坡詩，海南賦棲遲。青裙脚不韞，今日誠見之。男子咸髡髮，女兒髻束絲。手持



桃榔夾，卷籍以自隨。今朝應考秩，中式庶可期。莫謂事力學，干祿遂其私。

孤桐刊南游吟草余爲將事經歲告成索詩爲酬一夕作三十韻來和答

十年去蠻陬。屏迹類窮谷。繕性非所安，幸不物於物。闊別迓高軒，相見膝相促。清尊以侑茗，轉語每卓拂。益自笑狂簡，平生負誇讎。滄桑幾更故，始悟黃梁熟。猶難棄結習，未易卽諧俗。知此莫如公，綢繆及堂屋。壯繩意氣盛，晚就江潭卜。凡茲語絮絮，夜深逮剪燭。又許拜嘉章，鏘金間鳴玉。輒懷鴻爪舊，偶遣貂尾續。因請傳萬本，玄賞不遑獨。旬日頒稿來，鱗秩積盈束。龍蛇校草法，篆籀字循逐。別爲綴次第，暉序定綱目。留真欠良工，胥史付過錄。三篇物就緒，勒板聚珍局。由茲宵復旦，讎勘困栗碌。彌恐有散佚，佳句不可贖。風來吹亂帙，先且鏹諸櫝。經月復經歲，卒以償所欲。綴章已垂備，布席更細讀。盥手濯薇露，含茹益驚服。索詩僕辛勤，步武謀繼躅。槃槃三十韻，深思勞一宿。用以報胼胝，將命幸不辱。亦知汗簡精，行必貯天祿。吉人寫精華，附傳比推轂。爓美臨安陳，大足快心曲。

丁酉嚴冬靈修約赴青山試野餐聽樂曲沉陰爲之一開蓋久輟郊游忽已新  
元改騰蹄路馳驟落照中樓台重疊尤似西子湖樓外樓頭也爲賦兩律

故人作計蕢清游，便許晴開凍雨收。徑曲恰宜安竈井，亭高差已傲培樓。雲能駐景依豪竹，海不揚塵度淺流。莫負經營窮八表，夕陽深處更凝眸。

已怨重來隔歲遲，梅花待我放南枝。草青初動階前屐，窗淨猶懸壁上詩。入畫風帆迴落照，釘盤蝦菜試新炊。依然樓外樓頭路，破戒平生酒一卮。

何焯賢兄索詩且約居青山休沐

邵公鍼左終傳世，水部吟梅自可人。萬里雲天窮溟渤，卅年京國話艱辛。明朝赤縣功名遂，近隱青山結構新。莫忘一尊酬永日，對牀風雨更相親。

許頌年挽詩

迢遞滄洲外，逍遙瘴海邊。高樓春寂寂，夢雨夜濺濺。久病終疏客，焚身不礙禪。心齋誰更共，徒與憶重泉。

莘農設琴會余所識鄉人吳因明蜀人吳浸陽均操縵入神因明自蜀歸侍母

治淨業洵後起之秀也督作詩記感因和唐人司馬逸客雅琴篇

吾衰頃已感，大雅不可尋。十年走南服，屏跡似禪林。偶復二三子，相偕涉遙岑。遙岑無所適，嘯傲彌難任。幸得預簪佩，嘉會聽鳴琴。清心如漱玉，古趣同吉金。一洗箏琶

陋重諧正始音。操縵因明子，閉門欲傲陳無已。萬里相逢海角初，延陵況是同鄉里。久羈巴蜀惜風塵，近侍金護市隱矣。猶存韶護護雲山，不廢丹青窮畫理。坐忘好事主尊俎，姚以坐忘名大張南榮四座明。熏風乍扇衆斂衽，紛開綠綺肅且清。循徽調軫試指法，天籟人籟遂交聲。陽春進一解，孰不忻忻者？改絃閏徵出清商，挑得琴心感新寡。繼之問答出漁樵，直似幽棲遯林野。三闋兩闋奏未央，鈎挑抹點咸成章。韻高太古涵金石，屏棄俗曲甯笙簧。士林才女越流輩，羽客亦存老浸陽。坐馳羲和且轉轡，駐景樺燭延晝長。烹鱸魚鳳奪滋味，玄酒太羹斯足貴。羣賓飫德兼飲和，珍重主人今夕意。繽紛花雨墜諸天，潛魚出聽雁驚絃。嗟余樂亦同仰秣，神游絳闕不知年。

過李彌厂絮語翌日奉詩依均答之

白駒過隙春如寄。平生諱老老已至。一朝散髮弄扁舟，坐棄中原如敝屣。頗嫌空桑有餘戀，賓從歌呼入夢寐。鍊形縮地效奇肱，馭氣排闥遽振臂。差同遼鶴返華表，尤喜山川無異致。烹羊瀆藿盡可口，怯病尙容謀薄醉。玉簫檀板水紅裙，妖嬈闌干開十二。清茗斗室更足樂，談藝論詩擅餘事。圖書四壁恣近取，珠玉九天驚遠被。風塵海內置無言，魚龍域外偶作戲。惟君好客耐靜聽，移榻文窗迷日墜。解頤應不笑溪

蠻，徒笑投荒猶煮字。

時有海行之約

癖兒來書述讀越縵日記有喚起同光百感來語足成絕句

喚起同光百感來，兒曹亦解識金臺。當年祖父迴翔處，重見南城踏馬回。

夜飲示客

圍雪春融座，圍花夜映鐙。綠杯消酒釀，玉碗上蘭蒸。似識平生意，誠知不足矜。明朝重有約，海市錢詩朋。

夜午初聞漏，杯深再淺嘗。西涯蝦菜好，南國稻梁香。廈語粗能解，新辭道勝常。海天千萬驛，莫更說他鄉。

曾履川刊其十一世先集合編徵題用梅泉舊題韻

歷劫侵尋書未佚，同時異代珠璣出。蚩尤守藏誠足奇，累葉雲初更罕匹。晉江一脈紹南豐，咳唾清芬自堪挹。主人繼志更繼威，惠我叢刊勝百鑑。夜鐙盥手起披襟，漏盡挑鐙讀不息。重詩益重主人意，直使汗顏徒面壁。惜香咳餘亦有生，收族敬宗苦無力。南溟萬里望中原，敢識瓣香附瑤席。

夜行

迴眸風細帖池塘，疊疊微波弄麴黃。林樾初陰涵夜氣，闌干浩態戢狂香。新來靜覺山川迥，小駐徐驚歲月長。已是鬢華霜欲遍，不須重說鬱金堂。

和藥農兄病起寄京師病中猶工楷可愛非所能及

浮生閒處好。佳趣靜中求。相望水千駟，長懷綠一樓。簪花終斂手，讀畫怯扶頭。清賞雲溪在，松風襲乳甌。

舊游絕句五十首

罷官且二十年述杭游乍憶蘇詩

十去杭州思渺然，希蹤二老兩隄前。試將清福從頭數，我竟休官近廿年。

先妣自營壽兆于孤山旋格于禁例廢去之

板輿笑侍孤山路，泐趾刊碑補矮梅。誰道千秋陵竟谷，玉階金闕失崔巍。

與藥農兄夜歸微歎兄隨地采藥今大隱矣

霜月嚴冬午夜還，山山重疊昱陵關。卅年屈指如流水，采藥無人淚暗潸。

由花塢丁布衣墓後繞靈隱出眠雲精舍

精舍眠雲出北山，參差花塢路環彎。布衣高致真猶在，夾道喬松五里間。

西溪菱蘆寺看蘆花。樊榭翁故宅。姬人月上粟主猶存。

荻雪成堆一望中。破祠想著老詩翁。更因月上尋遺蹟。粟主斜籠彙網蟲。

鴛鴦湖登烟雨樓背誦梅村曲

信看柳雨更桃煙。益覺才人筆調妍。獨惜醉中無好句。不容後起勝前賢。

自通州至海門觀棉田

真教斥鹵變桑麻。一老提封十萬家。我自七隄隄上去。飽看明月照棉花。

通州狼山訪駱賓王墓

傳檄題門兩極工。逃禪未許是英雄。狼山荒草殘碑圯。不敵金輪日尚中。

金陵半山寺荆公捨宅

捨宅緣知已後時。蔣山策蹇幾尋思。不須酬答東坡老。三畝誅茆十載遲。

游莫愁湖歸訪瓦舍

三面荷花擁一樓。水西門外屋如舟。南朝風景依稀認。歸路淮清訪莫愁。

瑯琊寺下至釀泉醉翁亭

策蹇徐徐上翠微。老僧伴客證禪機。水聲山色千秋永。不見仙翁醉裏歸。

游鎮江鶴林寺杜鵑已盡施僧五十金補種之

我斥青銅五十千，鶴林勝景足流連。上人頭白無多語，祇逐來年看杜鵑。

焦山海西庵見梁髯捨書

定慧迎人壓水低，茗餘拾徑上山梯。海西庵子今猶在，物色髯翁短句題。

應雲蘭閣約游金山寺觀東坡玉帶

嬾因鐘鼓散天花，獨坐僧寮學結跏。玉帶摩挲幽致好，蜀僧真已忘辭家。

北固甘露寺傳爲大耳郎就婚處寺前有很石

很石槃陀委草萊，層楹甘露對江開。半欹鐵塔殘銘字，曾見孫郎不世才。

揚州看芍藥歸過禪智山

孤負當年金帶圍，花田舟載小車歸。輕風送暖垂楊外，禪智山光映落暉。

揚州富春花局茗酌看花

花局移春五百盆，依廊繞砌足溫存。解頤隔座聞傳語，鱗背天心酒半溫。揚人治鱗精勝客索鱗必

日鱗背取其腹索者肉必曰天心捧取其肥滑適中索酒必曰不過燙損失味也

揚州登平山堂

有無山色遠連天，遺趾歐蘇九百年。更向後園尋水脈，誰人解飲在山泉？  
莫千山就黃膺，白白雲山館。茗談時已休，官咄咄矣。

環玕萬綠掩疏籬，指點羊腸問所之。山館白雲迷去路，賦歸始信已多時。

敬侍 先妣參普陀

五十三參弟幾參，潮音山色兩渾涵。塵心未到應刪盡，方許從師證鉢曇。

留臺灣一日游

北投行散服琉璃，句漏丹砂一例嘗。熏沐從教換仙骨，勸人早繫絳紗囊。

紹興東湖治茗陶氏別業，山壁湖陰清麗絕俗。

斧擘居然見北宗，翠崑如削俯溶溶。陶家庭館依迴處，石墨苔花間紫茸。

循鑑湖游蘭亭

一亭寂寞托山河，禊事容能說永和。今日鑑湖三百曲，茂林修竹已無多。

宜興罨畫溪俗稱東西沈

煙水真成罨畫溪，持筇更擬涉龍池。買田陽羨非吾事，贏得東坡海外思。

宜興游善權張公兩洞



造物無心自出奇，淵深洞古石懸欹。今朝一踏芒鞋入，忘卻卿雲爛漫詞。  
宜興碧蘚庵見梁祝讀書處碑記

華山畿又義興庵，見愛成魔死亦甘。多少世間兒女子，自傷絲盡困春蠶。

溫州江心寺有回頭泉，謂飲者必重至其地。宋王十朋撰長聯，尤妙語如珠。  
渴飲清泉不釋懷，江心祇是待重來。楹聯妙句吾猶記，雲散潮消日幾回？

廣州白雲山應陳伯南約陳方率師有圖中原意

郊行不祇爲看山，燈火迷離指顧間。笑問臣佗無恙否，幾時齊奏凱歌還？

荔子灣縱啖鮮荔

艇子徐徐泛碧流，絳霞一片簇芳洲。老饕方識東坡意，到此誠能忘旅愁。

香山唐少川約去共樂園

嘗客香山共樂園，題襟捉麈負初醴。朔南一例知君實，笑看羣兒上短垣。

浙江平望鸞脰湖張子和隱處

尙是唐家識任人，朝廷遣使覓玄真。而今滄海橫流外，鸞脰何妨萬里春。

湖州道場山拜況蕙風師墓

曾向何山謁本師，玉梅風度更誰知？斜陽斷隴桑麻外，掩淚低聲讀舊詞。

蘇州拙政園懷同游故友冒鶴亭吳董卿

一邱一石儘風流，十畝荷塘滿苑秋。秋士盡騎黃鶴去，藤陰空罨屋前頭。

正儀訪得黃幡綽墓

流落江南賸一碑，白楊颯颯野風吹。商聲似譜淒涼犯，說到先皇便淚垂。

崑山謁劉龍洲墓

英氣猶存一卷詞，道人寂寞傍要離。南朝無限興亡感，斜日疏烟聖得知？

靈巖響屨廊故趾

箭徑酸風照眼明，吳宮花草怳三生。琴台麋鹿樵蘇後，何處重聞屨響聲？

蘇州上方山支鋤寺轉輪藏宇內所存闍祇三處下卽五通祠

閻浮世界如輪轉，到此應尊大法王。何意妖神猶窟宅，萬家香火拜娘娘。

歲暮登匡廬牯牛嶺小息周顛亭

無因鷹尾訪廬敖，九老煙雲作怒濤。闕向周顛亭下望，天池一徑沒蓬蒿。

南昌百花洲時滕王閣遭兵火已廢

倉黃戎馬出南昌，高閣臨江賸壞牆。徐向百花洲上過，夜鐙如豆映新霜。

武昌黃鶴樓張文襄劫後重建題輿略樓

輿略當年著盛名，能平陳宋卽干城。遺黎愛說前朝事，日者何期是老兵？陳宋事蹟東南後保

無錫鼇頭渚畔有項王祠

鼇頭渚畔有荒祠，金甲依然出陣時。父老猶知崇報賽，項王終是好男兒。

富春登桐君山張睢陽祠

富春江上翠峯曉，斜日輕風壓晚潮。采藥仙翁吾不見，睢陽祠下一停橈。

省伯姐于石門以脚划船去其地水程以九計里

脚划艇子去如飛，曲折斜塘趁落暉。三九水程頃刻到，蒹葭深處卻忘歸。

八月十九潮生日海甯看弄潮

吳兒雙檝犯馮夷，萬丈濤如萬馬馳。砥柱中流吾遜汝，海甯隄上奪紅旗。

石門洞劉文成讀書處

九都居士舊書堂，山翠林花映瀑廊。誰信功名心事切，天台終不住劉郎。劉爲青田九都人

雁蕩十八潭通海傳爲建文奔瀆處其地有迎春橋亦建文書

遜荒甘作老頭陀，間道潛行狎海波。細看迎春橋上字，倉黃著墨正無多。

靈巖寺觀老人登天柱峯采藥

天柱峯前繫獨繩，老翁納氣便徐升。初芽石斛仙家藥，輕舉遙看信足稱。

由松木場赴西湖舟人駕舟過岸曰拔壩

殿脚隋宮說汴隄，此行不道是西溪。晚歸松木場邊去，坐當浮橋壓水低。

長洲島訪周大致輔談曲藝

平沙習習繞漁村，山色蔥籠水半溫。此地恰宜高士住，讀書理曲杜衡門。

夜登山巔與葉梁兩客偕行

峯巒突兀樹周遮，殘夜初程試纜車。秋意中人渾欲醉，凭肩笑看霧中花。

# 高梧軒詩卷十

武進 趙尊嶽 叔雍

戊戌臘日南州試筆

平生輕作客，垂老悵無家。十載更千劫，重溟泛一槎。故園書帶草，別館玉梅花。歷歷懸心目，停雲未易遮。

示彌厂希穎

黃能真出羽淵來，地迥天迴萬劫哀。已拓南溟開氣象，微瞻北渚隱風雷。巒陬寸寸皆金穴，蠹簡沉沉賸玉杯。不耐消磨容砥礪，幾時義御卻重迴。

寇萊公幼作有到海祇十里過山應萬重句迨貶雷始驚爲讖兆余家舊在南洋路茲垂老投荒毋亦類是耶悵作絕句

到海真疑十里遙，萊公詩讖又今朝。圖經忍淚行行檢，驚指南洋舊路標。

游柔丹蘇丹園蘇丹于百年前以數萬元售國英人淪爲虞賓累代矣  
輕車送我上初程，驟雨重雲鑄晚晴。賣塞百年嗤大長，迎門雙闕賸殘兵。溪頭灼灼

花如繡，樹底盈盈日似鉦。一例河山消永晝，風光端不負南征。

戊戌除夕

縱非萬死已投荒，莫遣三生說故鄉。歷歷冬藏驚夏暘，微微秋氣扇春王。蓬門巷底泥金帖，柳寶尊前璧玉漿。權作椒盤資獻歲，天涯漢臆未全忘。

漫書

獨凭干闥送夕陽，繞隄雲覆綠千章。更無人識京華客，短髮青衫下太荒。風情漸老漸衰頹，坐對青山廢酒杯。無賴文園消渴甚，祇餘柳寶榨新醅。風光猶憶別淞江，稚柳疏梅上小窗。一覺十年人萬里，鄉心英氣兩難降。

孤桐七九壽詩

龍飛歲躔溯壬子，四十八年一彈指。趨庭束髮接光塵，春柳靈和正秀峙。偏工口誅兼筆陣，博浪風雷敢逼視。亦師黃石拜穀城，決基開基冠多士。元獻真能識鄭公，門館東牀真類似。凡茲聲華銘肺腑，直欲摳衣取進止。惟公敷歷走南北，不獲相從更相俟。下元世會日激蕩，黃天屢立蒼天死。鯁生遭際滋悔吝，奮臂公爲判蕙艾。十年差幸奠海岳，千禩粗教宏治理。相逢勾當下蠻陬，當日少年今園綺。喜公德業日鼎

泰，視公顏色益潤偉。問公鶴算徵上壽，老畫方張無極紀。清思逸興老不衰，好句貫珠猶累累。東坡生平不善飲，頗召青州侍尊簋。題襟促韻每相及，感舊懷人動移晷。自慚輕別又重溟，薄俸廣文困糠粃。檳榔椰水亞峇屋，復闢玄言疏妙旨。間從邸報覓消息，不見嘉名署牘尾。益知至德在無言，默轉鴻鈞勝弩鎧。止戈卽此振祥和，澤暎生民播遐邇。神明朗固腰脚健，天德報施應可抵。貞白高閣挹松風，鄴侯煨芋隱沅澧。同徵仙骨傲方瞳，共佐明時襲因壘。清餘拂墨補諫草，暇日臨池競餘技。太平山色最宜人，卻杖乘肩娛法喜。受塵假館謂已足，旋馬不煩容尺咫。公真閒氣出鍾靈，我愧大荒傷撫髀。乍瞻星斗曜南極，絮述陳言付驛遞。拈髭想見展蠻箋，領首胡盧破隱几。

己亥八月廿八日壽婦女

老人屈指數生朝，大好秋容八月潮。祝爾前修潮共長，銀濤澎湃接青霄。回頭汝竟已中年，比翼團圓儼綺筵。更聽江南好消息，春風弟子亦三千。

夢回聽驟雨，大似東坡儋耳風。光取和元韻，應知老去蠻村六十二歲與之同符也。

岩礁出瀛海，星羅布寰中。或則圓似卵，或則欹如弓。一島突挺出，曝背龜當空。坡陀繞泥潦，鬱莽森無窮。蓬蒿橫榔間，自笑著此翁。日長裸不襪，坐嘯誰稱雄？汗浹汗快雨，閣晚延清風。方其風雨至，淵鼓應宏鍾。破睡不盈瞬，鏗訇倏已終。回頭望雲氣，濃掃山成童。漸幻雙彩鳳，冉冉復翔龍。極此百態變，詩筆難爲容。平生狂且傲，于此皈化工。直欲破雲上，攝足太清宮。

金馬倫山在彭亨州境高八千尺其五千尺爲平原暇日往宿尋看瀑布用東坡海南泂酌亭均記之

窮愁嗟惜人，膏肓尙泉石。偶從塵中來，襪被送駒隙。舊聞羣賓言，有山據高脊。鳴泉懸匹練，隱壑深伏蟄。犯險五千尺，此景莫輕擲。飛車金馬嶺，眩目驚迅屨。瀑瘦不足觀，山勢亦患窄。清趣別有在，擁火坐寒月。

檳榔嶼極樂寺前溪亭坐雨溪細亭低乃微似靈隱佳處用東坡通潮閣韻  
濯纓卓錫任逍遙，亂石當亭疊小橋。亦有冷泉泉上意，微嫌吳越不通潮。  
棕椰幾樹壓窮村，細雨濃氛足斷魂。夢到杏花春二月，斜陽疏影樂游原。

渡海投荒倏已經歲用東坡示子由均示從學諸生



少年意氣出湖湘，垂老書劍擲遐方。蠻煙蠻雨共朝夕，林樾阿答窮微茫。十年辭家萬千里，夙已京國遺行藏。諸生亦有姜黎輩，尊酒促膝訴短長。中原明媚話風物，盈篋猶展丹青望。浮漚芥蟻喻良得，海天極目泯興亡。丈夫率土可投足，壯游何自輕南荒？胡牀小坐徵往跡，虬髯未必悲殊鄉。

東坡題水晶宮鮫綃詩詭誕恍惚意有所指則一問尙未達耳用其元均爲下轉語重泉有知以爲何如

抱膝南海南，海孰與我大？螻蟻涉滄溟，面海當下拜。海水太有垠，充類畜靈怪。何如吾心神？方寸足自快。靜可窮杳渺，動且決澎湃。古今齊萬禩，上下奪三界。所欠祇些子，酒朋與詩債。

東坡爲餼子媪題絕句余來此遍嘗糗餌似均不及吾鄉兩面黃用韻戲和  
淺綠浮黃色色勻，椰漿崖蜜餡含深。細嘗終遜江南好，湯餅輕炆兩面金。

南人祀三寶太監彌虔一邱一壑必附會其踪跡內向之殷如此因與二三子泛海話及以東坡得酒示過韻述之

涵光波不動，舟小載愁重。披髮弄扁舟，輕風解迎送。戒游具行事，宿昔勞諸仲。鱗託



何祇霜華鬢已童，衰顏誰識老詩翁？猶堪十丈扶筇上，笑指巒崖喚黑風。  
覓路披荆奈若何？歸來詩料不嫌多。絕憐塵莽汗顏色，十五盈盈已阿婆。

東坡謝葛延之龜冠有詩此地俗多不冠爲用原韻進一解

百年涉世勞且苦，一旦免冠色然喜。孰通此理作閑漢，入聖便能證不二。穿衣吃飯  
本多事，龜鷄鷄鷄煩手製。天教笠屐已可人，沐猴何必儼顧視？

惜陰堂舊植曇花十巨盎盛時同放二十餘蕾輒有客至延賞至再南來不過

見一兩枝地氣不同者如此舊和東坡園中草木十一章茲續和其桄榔杖  
韻

龍戰羸劉一例亡，山川迢遞意微茫。客亭秋又三年老，瓦盎春猶片夕香。聚客芳尊  
迎乍送，飄鐙珠箔卸還張。兩開他日留佳句，重續園花十一章。

聞雨用東坡瓊州本題韻

片雲真逐夏峯開，淨洗塵天綠一嵬。乍惜南柯隨漏逝，漫期北客有書來。堂堂春去  
纔經歲，緩緩花前又幾回？猶說輕雷池上動，十年心事未全灰。

余夙有睡癖南來尤耽午枕用東坡海南贈息軒道士韻

夜睡初不遲，晝寢猶半日。惡癖不能戒，歷歷逾六十。偶然破曉起，坐擁晨曦出。金雞搏玉兔，信似駒過隙。心澄萬慮杳，酣癡了今昔。圖南誠異人，安敢與奪席？且先師達摩，窮年面山壁。

己亥九日和東坡惠州九日韻寄彌厂希穎

秋高氣應爽，何復聚溼雲？穿雲覓雁字，貽書且致君。潤我青玉管，布我碧羅紋。托興勉翰墨，揮灑徒瀆云。猶欲綴短句，慰君相思勤。炎威壓波磔，糾繆遂難分。起去命巾車，遠之野水濱。惘惘若有失，終患雁失羣。卽此述微尚，見者當欣欣。硯田乏佳趣，何足事耕耘？

同日再和東坡獨客韻

自吾作遷客，四海久無家。攝心入斗室，纈眼傷空花。令節夙志置，輒咎意緒亂。謁從戊戌歲，更泛海南楂。忽忽日趨老，真似赴壑蛇。九日祇枯坐，撫膺興咨嗟。窺園無霜菊，盈野無桑麻。更無白衣至，供我酌流霞。隔林對阿答，何以遣有涯？南鴻久不達，空自望神鴉。

偶夢京邑用東坡海南人不作寒食韻

一念能勝萬劫灰，經年窮海亦優哉。蜃樓宮闕崇朝見，花市鄉關此夜回。不信遙天成獨往，且從雙穗卜歸來。兼程臘鼓催春裏，傳語寒梅著意開。

一念奪劫用東坡儋州夜夢韻

偶然一念悟如如，不待終卷拋詩書。氣似續絲又有餘，神游遽返太古初。百體自縱佚以舒，已不知我况知魚。孰竟使我奪萬緣，乍得其全去其偏。不暇計日奚窮年，正如徒跣行纏。背塵合覺泯愚賢，攝心入滅信超然。此樂豈易著簡編！

閑居用東坡得子由書韻已亥秋分日

絕域重溟外，安心不妄求。拋書長結夏，翻歷始驚秋。磨蝎原三命，囊螢賦四愁。一時風雨合，莫莫更休休！

忽憶西湖別館用東坡過嶺憶天竺韻

忽憶江南風物外，聖明湖畔舊吾家。枝涵露萼雲開錦，徑剪葑泥草似蛇。午枕據梧千日酒，夜鐙臨檻萬叢花。此情夢寐難忘處，信手拈題淚已斜。

習靜空齋和東坡白鶴新居韻

南來已覺塵能辟，鎮日幽居不掩關。病樹漸低朱檻外，新蟾微綴綠陰間。風催溽暑

橫炎海，雨破沉冥洗遠山。三歲此情曾飽領，會當一舸載詩還。

前題次解

遲遲餘晷揮千韻，耿耿中宵負一鐙。隨分舊游歸莞草，自蠲殘渴瀉壺冰。初嫌白事新來客，靜到無言入定僧。京國西湖渾忘卻，心齋此夕庶吾曾。

閒居用東坡惠州遷居韻

東坡謫惠州，風物尙晴麗。惜無寸椽屋，用以庇家細。坐使一朝雲，溘然從此逝。我今千載後，泛海外小憩。亦殊嫌老屋，沉晦難作計。古榕癭當戶，蔓草亂緣砌。所幸斗室間，蕭散免簪髻。孑然至忘我，顧盼似脫蛻。渴則飮雪茗，飢或饜丹荔。欲戢心目間，聊可避末世。不需事梵誦，泯智便斷際。獨難遣吟懷，諷咏猶聚納。

由關丹而文冬而勞勿繞澗上福隆港雜書

錦苞虎箨綴龍章，拔地穿雲似劍鏗。此景輕貽文與可，鵝溪萬丈不嫌長。絕澗風迴萬籟鳴，輕車繞壑一程程。看山到此應無恨，綠送紅迎第幾生。甘蕉丈葉掩前山，日色西沉促客還。漸見林梢出鐙影，羣猿知在翠屏間。山開霧幕五千尺，樹擁霜皮二十圍。移作階前清景好，坐茗到晚自忘歸。

閑身真豈是潛龍？長有慈雲護太空。晌日炎洲非我好，坐期鱗甲鼓春風。  
橫琴待月小樓前，坐吻鳴泉漱玉澗。誰省歲華出空谷，一枝濃挹露華鮮。

娘惹匆匆馭晚晴，鋒車逐客作郊行。細風夢兩端詳處，輕薄紗籠別有情。

士人呼女子曰娘惹所衣

紗籠

青裙不襪小腰支，偏繫明璫疊疊垂。自笑南柯疏鳩舌，但消眉語不通辭。

### 福隆山房

翠嶽穿堂草，精巖闢上方。滄波出林樾，宿霧擁山堂。頓悟浮生渺，能拋客思長。此來真與會，不信在遐荒。

### 夜坐山房

一鐙天半盡，萬壑靜中閑。坐久花涵露，寒凝酒盡杯。蟬鳴廣獨詠，月上肯輕回。忘却塵寰事，明年卜再來。

### 己亥臘日移居萬緣陰中頗饒清趣用東坡白鶴新居韻

陋室辟甘榜，傑閣出精麗。丹堊紛棟桷，戶牖判巨細。雨來足禦濕，風至不輕逝。老夫空桑下，于此獲良憩。本是乘槎行，權作歸田計。官道圍巷陌，雜花出沼砌。浮雲蔭萬

綠，宛若黛簪髻。閑居玩氣象，意境倏解脫。撫掌展卷帙，得意肆甘荔。謂此一塵中，真足以遺世。吾生久蠱處，泯塞天人際。從今慎誓戒，欲避蟻蚋聚。

再用東坡新居韻

樹高已參天，日色淡無影。炎荒苦蒸溽，何意關清境。得此頗自矜，俗念可絕屏。不妨計終老，琴書娛晝永。區區囊底智，不復思脫穎。浮生縱百年，俯仰悟俄頃。

新居速客來游用東坡貧家淨地一首韻寄彌厂履川

播遷三易歲，僦居南海頭。新楹殊愛好，精舍足自修。更亦懸高榻，佳士曷少留。同來擴望眼，良時莫輕媮。意氣礪金石，流別嚴薰蕕。乞君命梯航，啓牘勿深廈。

東坡遷居之夕聞鄰兒誦書欣然有作余舍後海南吳生子弟夜誦精勤且來

問字用元均賦之

置身入林樾，破靜祇鳴禽。禽聲千百轉，亦作侏儻音。諦辨良不謔，朗誦有青衿。方其得佳趣，更調忽長吟。夜分尚不寐，甕窗開牆南。此韻不知東坡何以用兩字未加借易姑仍之玄思通要眇，雜書獵古今。風竹相酬答，月落俄橫參。悠然真有人，學淺意良深。對之殊自愧，苦茗一再斟。蠻陬聆大雅，何似雍門琴。



李相厂隔歲始得咸陽獲孫訊徵詩次答

佳音異域不嫌遲，詩札從容遣我知。  
隴右麟振鍾地望，歧陽雪霽識天時。  
于菟塗麝徵雄俊，蘿蔔生兒好護持。  
他日梁松牀下拜，烏衣弟子慰烏私。

庚子消夏絕句

攤書便住華胥國，躡屣真窮括地圖。  
夢去中原刑白馬，醒來南海采明珠。  
過隙驕陽信白駒，移陰茂樹動成圖。  
老夫天驥猶能控，狂草千言墨未枯。  
林梢綠動疑雲逝，階下紅殷識雨過。  
習見江山參造化，不傷萍泊足消磨。  
萬重陰合綠周遭，坐聽風狂作晚濤。  
枯吻十年忘止酒，又斟冰液釀葡萄。  
坐看圓月上層霄，海擁山圍百樣驕。  
似此海山誰管領，興來我欲戲蘭苕。  
十洲三島問與居，細字蠻箋疊疊書。  
兒女征途千萬驛，何當老子上籃輿。  
占取椰林五畝園，欣欣花木繞遼垣。  
平生馬足車塵外，不意殘年尙過番。  
平泉不住住朱崖，亡國端由黨議乖。  
此去朱崖猶萬里，赤坎遠笑聒羣蛙。  
夜深鐙火弄新涼，試檢殘編就竹牀。  
心法丹書渾置卻，虞初徒與述遐荒。  
覓句何須更閉門，花村猿鳥避驚喧。  
偶然咄咄書空語，坐答清暉一櫛恩。

### 南蠻竹枝二十調

廟貌羣尊大伯公，百年不忘草萊功。堂堂華胄開南服，文物猶沿上國風。當地祀南客先輩曰大伯

公街頭巷尾在在之足見其不忘本也

竟教土地合唐番，萬國車書共一元。設教中朝真遠慮，隻雞斗酒撫羣藩。當地祀土地神多作唐番

土地淺人或以為不學不與實誠出智者混一之遺謀張同化之盛德行見囊括三界于積漸之中可必耳

花冠繡服佩珠玳，簇鼓傳歌出澗橋。知足齊人作贅壻，伴郎三兩挾衣包。番俗就婚女家期月始返

新郎盛裝佩劍步赴女家伴郎則隨後挾衣包以從鼓吹亦甚盛

雙雙脂粉坐牀沿，客湧蜂衙斗室前。祇露歡容無片語，含羞不出主嘉筵。新人進施脂粉據林受賀

賓客圍繞迄設宴亦不出作主人

今朝屈指是齋期，碌碌腸鳴肯忍饑。解事簾遮窗下座，相看一笑盡相知。大食散齋期終日一餐番

人均不能耐坊肆違恃懸簾窗大使街人不得窺見以便就食入則盈坑滿谷均透齋之人相視一笑逾期坊肆亦撤簾矣

椰林百尺海東頭，旬月纍纍告有秋。遠見長繩緣樹上，從容擷取召獼猴。土人蓄猴

少婦顰眉訪降頭，喃喃私禱乞神庥。新來微覺郎心變，向索花枝插小樓。降頭治巫術尤善通男女

情好門庭雲集多棄婦妓女出賣巧行術貽花枝使陰置男女樓前門外謂可償所欲或溫善情頗有驗者

不衫不襪祇紗籠，卻手翻腰逞舞容。真似浪迎兼水送，髻雲鬆處露華濃。土舞日浪迎亦復曼妙多

委夜間男女多就林下通情好

蠻歌淒怨不勝情，娘惹歌時更自驚。驚見簷前郎側目，陬隅揮手第三聲。蠻歌多幽怨其俗夫斥妻

去三言則婦即大歸無異辭俗又可納四妻因之怨婦盈野即所殺亦極哀怨幽眇之致

南鄉真足供流連，珍果嘉名敢試鮮。我是老饕甘異味，從容玉碟食榴蓮。土果味厚重非旅人所堪

或以見誰余從容食之主人曰真可以流連于茲為僑人矣

高脚長寮樹影深，一回負手一沉吟。終朝坐伙饕殮廢，近摘甘蔗當點心。土人奇懶終日僅臥高足

椰寮中旁植果木則隨手擲食不欲一舉足也

酬唱濤聲大海東，驚蟬夜噪月明中。香車勝賞長隄上，我亦追隨去吃風。當地稱郊游日吃風夜車

循是觀海蟬鳴月朗別有奇言非中原所鮮有

截竹焚枝煮泮當，蓼鹽細點便充腸。林間鎮日扶頭睡，數汝黃梁一夢長。土人攜土米日泮當者截

竹為管納入至林間焚草熟之旋出所攜鹽花樹瀉水和食食已復睡不願少任力役

椰黃箬綠解新苞，煎餅微糝波律膠。入市侵晨作負販，每留殘夢在眉梢。土婦家製餅餉侵晨入市

售之亦尚可口

笑說開齋作感蓮，沙爹束束醮濃鮮。貴刁最愛南閩好，爆竹聲中不夜天。土俗重開齋佳節即食煎

牛肉羊肉條日沙爹佐以閩中米粉麵線為美味又必張燈放爆竹車效中朝禮數矣

街頭一片大牌檯，風送珍羞百和香。三五圍檯三五客，夜深清露漸沾裳。街頭使食深夜不覺

渠渠夏屋掩林陰，茜絳裁簾日影深。十載重洋收外妾，離宮望幸碎芳心。柔佛蘇丹特英女為妾特

建英式夏屋貯之終于不寄屋在至今供人游覽

諸生訪古入叢林，天地神祇恐見侵。延得神巫先戒遣，五丁方許鑿山深。大學生入林訪古先拜神

巫祭

鬼瞰甯必是高明，龔舍中宵嘗影生。係氏未能驅厲祟，神巫伏卯拜長庚。學校夜有鬼擾于是番人

校長召巫埋七卯于一復下園地誠可動地如是數日竟不樹有聲息

天風夜夜卷狂潮，急雨時時帶怒颺。為作欄屏三兩丈，高懸疑是布帆遙。東海岸土人結欄為巨屏

樹之屋前以避風災為所僅見

許雲楠治東南輿地政教之學甚精必著柔遠之功詩以勉之

拋書我困刑天舞，涉足君循括地圖。談笑東南歸掌握，聲名吳越重連湖。閑航風雅稱詩客，暫擁皋比學腐儒。他日殊勛收異域，應知柔遠出潛夫。

饒宗頤和前和蘇詩韻再賦答之二和

著書輒窮年，焚膏以繼日。真復天下士，問一可知十。短章偶遣興，噴吻珠玉出。同和東坡老，南海共塵隙。蕭條八百載，清趣縱非昔。猶有桄榔園，繁枝蔭片席。速君再題箋，待我張素壁。

行翁復南來勾當寄絕句七首

海角祇祠見蓐收，傾宮歌舞會將休。鳴條不待行雷雨，微服誠能壓萬騶。  
好將度嶺作生涯，社燕秋鴻處處家。想見維城燭之武，十年前出白門斜。  
欣看法喜就南轅，收劫殘棋坐晚暄。莫笑鬢絲搔日短，尙餘一髮繫中原。  
雨後高樓夕照前，微熏嵐氣鬪茶煙。會心握管沉吟處，點定飛箝第幾篇。  
歸心乍已隨雙鯉，快舉期能挽萬牛。不許神山頃刻到，南溟夜夜夢岑樓。  
三載投荒興早慳，蓬蒿環堵辟諸蠻。足音縱自千尋隔，空谷初聞也破顏。  
柔遠應先制遠謀，雄藩坐大亦堪憂。他年祠祿從公返，抵掌能詳贍部州。

三和前韻寄宗頤及坐忘齋主人姚莘農

炎荒苦鬱蒸，廢書輒累日。爲學虧九仞，一篲不及十。酬詩消永晷，再四乘興出。正如

接短兵，深恐踏瑕隙。此樂不易致，高會溯疇昔。開尊翠微間，揮麈坐忘席。三年勞夢寐，嚳語贖疥壁。

四和幽居

斥鷃笑鷓鴣，誰謂有今日？水程倏九萬，世慮屏百十。收真學返視，閉戶不輕出。亂書積案頭，雜花當庭隙。楚楚亦可觀，清課等曩昔。扶頭或命酒，拄齋每側席。了了杯中蛇，弓影知挂壁。

五和夜讀

蠻居集百憂，困學苦無日。讀書忝士林，合一未推十。猶從囊簡中，力扶新義出。直似讎古人，必欲抵其隙。翁老未遽衰，倔強更勝昔。青鐙差自對，深夜據篔席。曉雲已出岫，餘輝尙映壁。

余好飛行兒子來書問何日更事汗漫

恩恩擁席已三年，坐厄青林瘴海間。細字不妨清亂簡，小詩隨分付新鐮。文園論蜀無長檄，通德傳經祇斷篇。煙水迷離人意倦，幾時重許作飛仙？

陳育崧治史劬學家藏回紇文珍藝每以茶果餉客余胥甘之

疏花庭院四時春，疊架圖經乙部珍。浮海遠猶存舊注，休官早與乞閒身。盤銘回紇翻誅字，山果榴蓮荐翠珉。記取君家共晨夕，龍團細擘落香塵。

六和前韻書事數章

隻身竄南荒，密箐蔽天日。簡書斷猿鳥，世事九忘十。直同返太古，惟見獠狂出。脣朱膚似漆，隱約度林隙。雙丸奔且馳，且暮亘今昔。未必無魑魅，夜鐙來窺席。窺我青林中，蕭然徒四壁。

七和

龍蛇戰玄黃，往事如昨日。石開金亦焦，舉首日有十。從容老夷父，攘臂鄧林出。勇沉智更深，終獲乘一隙。惜哉補天手，瘖還忘夙昔。棄擲南海南，揚帆著片席。莫道沉虞淵，輝旭復動壁。

八和

老去不任事，吟嘯送佳日。興來揮百篇，存稿不逮十。思誤信足樂，轉喚佳句出。凝神釋萬慮，駒影付過隙。瀕洞條三載，俯仰渺今昔。有時忘寢饋，夜坐不帖席。百廢僅贖此，文字拄腹壁。

尤和

真同粥飯僧，一日復一日。南船北馬間，寒暑歷數十。未能屏文字，脫手彈丸出。所好貴舒徐，所病在纖隙。每試欲滌蕩，積習終似昔。幸處蠻荒間，遯世可避席。柴荆設常關，跂脈任緣壁。斯場也見東方外傳

十和寄宗頤

開緘自開顏，裁答不盈日。隔海恣唱酬，疊韻倏過十。坡翁縱笑我，倡舉實翁出。經營擅意匠，毫髮絕間隙。和陶客僮耳，今亦猶視昔。胡爲千載下，不許奪此席。鑿詩比鑿兵，膝行笑觀壁。

十一和

投書掠海隅，匆匆逾旬日。報章無多語，一紙可當十。珠玉湧新製，妙解每笑出。精嚴更朗奕，百抵不得隙。闊別如覲面，氣類豈異昔。迴環供咏諷，痺廢起衽席。從今須斂手，降旛出詩壁。

庚子十月六日夜夢與統兒鬪車水濱醒爲泫然十年生死之別矣

碧海盈盈正好春，繞隄勝手鬪雕輪。笑如可掬穿花竹，健尙多姿識鳳麟。萬里久疏



泉下土，十年初見夢中身。此情衰鬢能禁得？老淚無多濕枕茵。

南藩十月爲雨季，冥漠中得靈修寄示行嚴翁答潘曾西湖兩詩次均答之以

堅來歲之約

濕雲溽雨壓前山，羈旅何時獲賜環？地迫撩夷多側目，書來珠玉一開顏。早知甌破無勞顧，近卜丹成漸耐閒。惟有聖湖難奪境，襟痕猶著酒爛斑。

前題

乍習幽悽試忘年，榕癭樞老任年年。圖疏九局心垂竭，書贖三餘手自編。大隱欣承翁矍鑠，上元期共月團圓。相攜好入何郎座，有酒如澠吸百川。

十二和前韻答履川和作初至

久不獲新詩，相念累月日。獨居無可語，課佛惟合十。一朝黃鵠至，秀句溢函出。清光蕉柅間，仿佛入簾隙。此樂彌不易，縞紵緬宿昔。論文或聚訟，把酒輒促席。轉眼恍三載，夜鐙廢東壁。

十三和答履川行賦歸矣

餞歲迓東皇，屈指卽來日。駘蕩東風間，韶光樂九十。此行自相見，命駕且同出。優游

二三子，啜茗夜窗隙。高論不入時，清思不減昔。或爲狂夫言，或忝經生席。興來再琢句，縵紗待籠壁。

十四和卜歸

三日不能去，五日或七日。竊自比冥頑，展限不盈十。從茲北遵海，憑陸始復出。果腹饜膏腴，肆口抵覺隙。平生尙快意，跋扈老似昔。昌黎駟纏歸，纏正欲避席。蛟龍本同性，孰願疥藻壁？

十五和束裝

今朝謀適越，至則以昨日。鯢生每思歸，心緒亂百十。方悟惠施言，湛湛至理出。神馳先行役，何祇越駒隙。奪人不奪境，宇宙付一昔。豈必待天吳，扶搖送颿席。庶亦師異人，凝想就素壁。唐人諷邵思家切者得觀異人指壁間山水畫錄以得歸與家人相見他日述詢家人果夢晤之

十六和新歲除夕奇熱守歲蓋庚子十一月十四日

圓月燦除夜，炎威扇元日。客自中原來，奇景一抵十。亦聞爆竹聲，隱隱林際出。驚啼兒掩耳，憨笑奴窺隙。甯非瀛海外，躔度誤今昔。守歲強不寐，蚊蚋起爭席。不如發新毫，泥金試揮壁。

飛港晤靜宜闕然十載矣

碧海千尋送我歸，青鸞雙翼控雲飛。殊鄉異域身終客，殘臘凋年事久非。劫夢依稀容細絮，詩情宛轉待重揮。祇嫌明日陽關路，又見征塵浣素衣。



# 高梧軒詩卷十一

武進 趙尊嶽 叔雍

## 南遷雜詠十截句

宣公南竄屏絕人事狗竇度食與元之功又誰憶之耶

宣公草詔竄南賓，再造興元跡已陳。狗竇朝朝度飲食，蕭條萬里百年身。容齋隨筆

李平泉之功貶死出黨禍而已

一品題篇志會昌，贊皇功業冠中唐。誰知風月平泉好，輸與南方草木香？

盧多遜朱崖之貶殞天慶觀道士練惟一夜聽鬼詩

南斗微茫北斗明，孤魂猶愛讀書聲。此情直自堪移詠，風樹蕭蕭近五更。龍水燕談

非萊公檀淵之盟何以致真宗天書之貶卒以廢死

淚竹斑斑說相公，柘枝不再倚東風。檀淵功罪分明在，贏得天書下碧空。燕水燕談

晉公當政日自謂功名或如劉參謀一夢已而果然

劉參謀醒已多時，不道當筵致讖詞。我亦子身成逐客，忍揮春夢綰游絲。龍水燕談

道士劉遁以泛海詩示丁晉公終于海外相見爲語識

真同跨鶴游滄海，劉遁何時許再逢？証取仙游亭上語，海雲深處一張蓬。名賢詩話

東坡謝表有魑魅逢迎于海上句又有六無帖

差勝漫崖說六無，此行更到海南隅。逢迎魑魅猶能制，料理琴書足自娛。

洪駒父南竄詩關山不隔還鄉夢風月猶隨過海身

還鄉夢不隔關山，吟到中宵淚點斑。奪境絕憐洪駒父，寸心飛越海雲間。

少游南遷桂州遇下第士子題壁有名爲累子還憂句

南來點綴佳山水，強慰秦城謫少游。更去秦城千驛遠，有人編管到窮陬。曲清舊聞

中朝禁東坡詩賞八十萬所傳益廣不知者以爲不韻

過海爭傳海外詩，不知不韻更奚疑？累人或致八十萬，許待償逋相見時。曲清舊聞

續舊游絕句三十首

洛陽禮白馬寺竺法蘭摩騰塔

牆陰僧塚草如煙，方塔垂危亦道邊。轉眼二千年上事，壞空成住一流連。

過洛陽不見對門女兒僅藥店壁樹有桓侯鎗孔

對門鐙火夙無存，卻見空墜出樹根。人道桓侯當日勇，飛龍藥店夢難溫。  
潼關過風陵渡

風后遺書識握奇，三千年事漸迷離。至今邱隴無遺迹，正恐長河岸亦移。  
逾虎牢函谷入陝爲溫侯立業處昌谷有詩

虎牢函谷路千重，一線丸泥信可封。想見美人旗下舞，將軍神武亦雍容。  
歸化看高宗御甲蒙語稱寺爲招轉青塚

青塚歸來撲面塵，大昭合掌拜金身。神爨世守連環甲，誰信忽忽二百春。  
過賀蘭山入蒙旗途中多楊氏焦氏古跡

征車遠陟賀蘭山，冰壑陂陀九折艱。偶見殘基認祠宇，楊焦遺烈鎮諸蠻。  
過靈石不及一宿尋李郎故趾不意虬髯真入海矣

李郎一妹近如何？未許從容繞郭過。今日虬髯真入海，儻承漉酒意良多。  
循同蒲路入太原飲清和元三百年舊肆

當年使酒博狂名，單騎衝寒賦北征。曾作清和元座客，一杯一石伴傾城。  
過太行山甫在兵劫倥傯之際

此生幸識太行山，三晉巖疆片刻還。足庇風霜掠雲樹，眼中樓閣付榛菅。

大同瞻金建華嚴上下兩寺

丹楹疊草出金源，上下華嚴繞短垣。奪境難忘輕破戒，定中猶自望中原。

大同游雲崗窟

武川涸水繞山堂，億萬金身湧道場。到此渾疑登極樂，一回海印一生光。

洛陽游龍門窟購碑拓蓋木板偽製攜窟欺人者可笑

香山寺對龍門窟，溝塹沮洳是涸伊。買得殘碑十三品，不知板字刻門楣。

京師數游香山熊秉老嘗款余養疴歡喜園卽雙清別墅前夢感泉上

老成謝事惜餘春，獨樂園中自在身。更許孱軀同一樂，雙清掃徑迓清塵。

由大覺寺玉蘭院發大公看杏花歸洪山口

大公歸騎過洪山，古刹留連一嚮間。百尺玉蘭西院雪，正堪相對半酡顏。

再尋南海豐澤園頤年堂衙齋

疏狂不再好論兵，忍事天涯已老成。自笑頤年堂上客，海棠花下屢尋盟。

湯山宿行宮浴溫泉



溪堂老屋早荒涼，猶噴溫泉倚石牀。舊是天家游幸處，寒鴉日日送斜陽。

去無量大人胡同每憶綴玉軒其石筍余舊贈也（梅蘭芳舊宅）

裙屐朝朝綴玉軒，主人相對或忘言。閑翻四夢尋聲譜，玉筍枝前獨負喧。

### 江亭望西山

江亭凭檻挹山眉，林外斜陽抹淺脂。清趣有誰能更識？臨風無語一支頤。

### 獨游西郊極樂寺看文官花

西郊破寺一徘徊，花好無人便獨來。忍說乾嘉全盛日，國花堂上日傳杯。

### 法源寺看丁香

白雲如雪壓春陰，古刹城南一散襟。頗欲細尋碑字讀，劇嫌苔蝕土花侵。

### 游廠甸書肆

百寶千坊照眼迷，都人元夜踏春泥。偷閒背向書叢坐，緗帙芸籤玩舊題。

### 明南內梨園玉熙爲今北海書藏故趾

書樓東壁自巍崇，寢饋傳鈔興不窮。夜靜微聞絲竹動，移情疑在玉熙宮。

### 松花江畔食白魚返奉天晤張漢卿

松花江上縱輕舟，一日清歡記勝游。餘味河魴能細述，高牆白了少年頭。

濟南訪金線泉漱玉古跡

明湖垂柳細如絲，駘蕩東風著意吹。合有佳人賞清景，易安居士琢新詞。

自青島九水望勞山上清宮不及一謁鍊師傳法

宸居紫府許逡巡，面海三清迥絕塵。歸去應慚傳道法，穿牆徒博額麟岫。

中秋青島歸航憚功甫王漢倫放歌賞月

屈指應過二十年，中秋黃海月常圓。歌聲早逐行雲逝，霜鬢天涯不再玄。

大同德勝樓傳爲武宗幸鳳姐處

不待風流說豹房，希承恩澤事難詳。祇今德勝樓頭座，猶見擎盤小窅娘。

大同逾河游曹公廟廟祝設妝閣謂曹富侍女公子處

武川涉足過溪流，像設當前出矮樓。點綴深閨猶楚楚，緣知廟祝善科頭。

京師十刹海有西涯名勝蝦菜亭其一也至今猶有酒肆

當湖六扇畫屏開，雪藕冰絲次第來。嬾向西涯參淨業，且將蝦菜佐銜杯。

香港攜客登山

峯巒夾起樹週遮。殘夜初程上纜車。秋意中人渾似醉，凭肩笑看  
續南遷詠十絕句

辛丑仲春馮列山御車迓觀哥打丁宜瀑布

浮生北馬更南船，老去成連亦爽然。難得舊游堅舊約，錢春迓客  
巾車向曉出郊原，夾道葱蘢椽子圓。微聽潺湲趨斷壑，已知不遠  
畔道差同世道歧，迴車問路且尋碑。縱非父老陰陵遇，卻聽高人  
崖陰涼氣襲征裾，纔隔紅塵百尺餘。已證背塵能合覺，不殊初地  
急流三澗拓溪塘，別有滄泓蓄上方。容易逢源難覓路，千秋荆棘  
銜峯齧石水如羅，濺玉鏘金影似梭。攀磴欲窮橋外徑，遽憐濟勝  
匹練原知挂九天，叢林密箐亂雲煙。溪蠻不解溪山好，築閣通潮  
曾向龍湫踏月回，又教垂老攬崔巍。新來止水心如鏡，莫問橫流  
卅年霸氣消塵劫，萬里滄溟駐客程。縱我餘生甘寂寞，濠梁猶愛  
多君小隱罷心兵，尊酒天涯各老成。泉底織綃今更悟，出山泉濁

十七和辛丑上巳雷雨交作

陰雲倏迷天，瘴雨不見日。佳辰卜修禊，此願九失十。既鮮賓客至，嬾逐巾車出。徒自疏櫺間，沉沉窺榕隙。樓臺雖錯落，江山非故昔。簡書雜几案，蕪穢奪茵席。一切置勿問，假寐且倚壁。

十八和同日作

奮飛困炎荒，願言思往日。勞節最繽紛，壯歲溯三十。京華作禊事，俊侶連鑣出。南城上江亭，西山壓眉隙。清言共娓娓，歌韻鬪昔昔。流霞漸西馳，樺燭繼飲席。興來揮素毫，飛白上粉壁。

十九和同日作

蒼天胡夢夢，置曆忘禊日。歲序逡巡間，行春祇九十。竟使聚陰氣，幻作沉雷出。繼之風更雨，怒電犯簾隙。窮陬非中原，游觀異今昔。羸糧行賦歸，家徒安四壁。

二十和從林鍊師書英習靜

餘氣泊浮生，甯復有幾日。惜能洞此理，千百不及十。但須辟老病，毋使三尸出。林子工導引，餐霞通竅隙。不吝結有緣，武當紹往昔。今茲課習靜，當榻光布席。黃芽養我真，精鐵衛我壁。

二十一和行觀天法結趺納氣

習靜開初基，趺坐廢永日。服氣學觀天，調息必六十。緣替似有覺，暖霧縷縷出。尻輪御神馬，差欲越簷隙。冲舉豈易事，守玄方一息。吾衰頃日甚，深恐困衽席。試發天池水，先與潤腹壁。

二十二和李彌厂客歲沉疴屢往存視今必健起寄詩問之

春色上層樓，晴暖好風日。計君早健復，新詩又幾十。或亦命鹿車，郊甸對挽出。歸來滄清茗，子弟共鐙隙。此樂吾不任，獨客異今昔。怯晦廢讀書，慳飲每逃席。相思積深悔，賡韻撼堅壁。

二十三和同寄彌厂

別君當元正，對榻話竟日。陽春去如駟，迅奪驚駕十。上庠當返事，逐暝泛舟出。木棉賞喬柯，杜鵑攬山隙。清景夙同嗜，轉眼嗟異昔。蠻荒百無賴，祇乞夢安席。夢去舊旗亭，命酒數畫壁。

二十四和寄曾履川曾和至三十四首

久別喜重見，情親正冬日。錢歲無多言，出詩過三十。異題同合韻，神理各有出。豈容

踵後塵，鼓勇再乘隙。惜哉窮海人，衰鈍不似昔。沉思綴斷句，苦語許接席。詩成卽覆甌，無待累坊壁。

和姊函述惜陰堂雙栝移植碧蘿公園悵然移時

突兀樓居終世棄，婆娑雙栝倖天留。老夫萬里難尋夢，猶爲鄉書一紙愁。

二十五和偷兒夜至無所得挾菸草糖餌以行作此諷之

巾車具勝游，休沐廢長日。歸來已就暝，酉戌會交十。竟有嘉客來，枉事祛篋出。去也開洞扉，來則越窗隙。恨無藏可護，懷寶迥異昔。黃標散早盡，青氈徒擁席。何足餐斯人，貽笑愧四壁。

二十六和同日作

泛舟涉重溟，落南逾千日。心力已百困，所願不償十。猗與梁上君，冉冉尙夜出。矯捷似飛燕，覓壘就簷隙。身手惜虛試，應怨時異昔。果飴不足飽，臬比空據席。勸君勉竊國，何取學走壁。

二十七和同日作

勞人困謀生，營營夜繼日。竊鉤亦絕技，十發可中十。惟此失神算，直同負手出。菸絲

復飴糲，甯足充腸隙？必坐誤虛聲，閱世忘今昔。須知素封者，誰復僭講席？當時應破顏，四顧仰空壁。

辛丑五月仲舉伉儷復游日本

平生幾度夢瀛洲，風引神帆去不留。江戶繡隄隄上立，阿翁羨汝又東游。

琵琶湖可似西湖？暝色山光鬪有無。得意試贖初日句，遞酬艣唱出菰蒲。上虞羅子經女所著初日

樓詞有侍父東游臨江仙結句與來我欲告山靈吾鄉西子貌視汝更娉婷爲畫村惠風諸詞老所激賞

十丈朱樓劫後開，故家喬木半塵埃。迴車應向西京去，銅狄摩挲更一回。

好景休誇富士山，月明積雪照塵寰。炎荒早斷清涼意，得信應疑醉壘間。

此游真挽鹿車行，況式嘉賓賦鹿鳴。人道奈良風物好，啣啣誰識燕歌聲？

卅年神往不如歸，不動堂開擁翠微。今日廬江無小吏，負他孔雀一雙飛。日說部不如歸哀態如孔雀

畫東南系本事

裁紅翦綠要相宜，韻事蘭閨角巧思。清暇何妨學花道，膽瓶歸插兩三枝。  
花冠雲髻步搖偏，皴石疏泉紙屋前。開卷殘唐周畫，莫輕文物一千年。  
一觴一詠儘多情，杯淺壺深細細傾。我亦曾聽三味線，曲中哀樂舊分明。

十洲天外雙飛翼，千尺峯前一角樓。開落紅桑知見慣，麻姑猶待海添籌。

二十八和得柳存仁書知彌厂閣中復病辛勤可念寄慰

乍傳柳毅書，法喜病有日。刀圭困醫樓，和劑且逾十。君輒就病榻，舟車晨夕出。課士已多累，煦暝覓暇隙。相依諧白首，伉儷篤似昔。貞義信可念，勿藥祝前席。恨我如秦嘉，酬詩徒掛壁。

二十九和彌厂病起自署餘翁此沈寐老舊署也

奉書欣復甦，闕報愧月日。否極泰自來，生一終成十。餘翁署嘉名，疑自寐叟出。學養天人間，相去正無際。沉沉海日樓，談藝侍夙昔。茗墨潑几硯，書史委地席。片嚮或無言，枯坐對面壁。

三十和寄舉東京

扶桑喜濯足，滄海竚浴日。此願不易償，投老望七十。知汝復遠游，興會亦傑出。抽箋寫短句，示汝倥傯隙。白雲舊相知，青山不改昔。促尊甘鱗介，就樹設幕席。此景誠可樂，寄圖張我壁。

三十一和李彌厂詩來述婦病新愈且改齋榜爲餘堂余請改榜益堂



已駸病婦吟，額手慶永日。急劫逾四旬，鶴算更幾十？餘堂署新榜，愚意別有出。以云  
衡椿菌，修短同寸隙。以云樂歲時，優游必勝昔。何取度餘生，應尙奮前席。請改題益  
堂，增籌塞海壁。

三十二和有懷益堂風致

益堂據岑樓，十載似一日。螺梯迂且晦，拾級且數十。忽然開洞扉，恍自塔頂出。驕陽  
絢光彩，萬象度穴隙。散仙好生涯，雅尙不減昔。喃喃韻上口，歷歷著布席。奪境不奪  
人，背塵同面壁。

三十三和彌厂書述益堂犯家諱將取東坡儋耳詩胸中有佳意海瘴不能腓  
語改署佳堂又謂九龍塘營構垂成卽用題榜喜答

錦鱗三十六往返備旬日。報我以佳章，計亦垂三十。周旋文字間，呼之端欲出。千里  
如對語，無異午窗隙。高齋何槃槃？夏屋同憶昔。今來收南服，山隩蹙片席。積習兩未  
忘，商量題楹壁。

三十四和前題

佳士有佳致，堂成行有日。佳堂勝餘益，精義一駭十。何祇輒心許，直掬肝肺出。吾方

客囚山，濕霧困山隙。不腓正自解，歸志負宿昔。望君如神仙，九龍繞几席。會當渡滄海，捧贄叩齋壁。

三十五和前題

樓東款春陽，榮南曝冬日。秋容鬯老圃，異卉盈百十。足跡未及至，轍夢已輕出。想見一癯翁，擁書滿樞隙。吾猶營神樓，構計日異昔。十年苦無成，徒遣續生席。胡盧每自笑，虛造真嚮壁。

三十六和謝卻彌厂屬書堂篆請屬曾履川書之

生平不工書，手盲溯少日。論書縱有作，糾愆一誤十。豈容輕示人，坐使噴飯出。敢敬謝不敏，愛我許逃隙。四海曾侯官，矯健猶似昔。願仍以相屬，濡染拓前席。必能振大纛，氣象煥軒壁。

三十七和履川書來狂草巨幅自謂廢詩如沒字碑答之

落南百無奈，長夏苦曝日。鮮獲故人書，經月不及十。侵晨走伴至，巨帙奪函出。春蛇復秋蚓，緣案似覓隙。諦譚縱數字，縞紵情逾昔。豈同沒字碑，字大正盈席。小儒駭失聲，恍對岫嶮壁。

三十八和前題

或則似秋霜，或則似夏日。君書真凌厲，草法窮百十。山川糾繆間，龍蛇蜿蜒出。淺學如鰕生，辛苦窺蠹隙。君真好事者，臨池尤勝昔。偶然揮一箋，幅紙丈二席。不吝付潢洽，風雨會撼壁。

三十九和答宗頤寄二十章

仰天望征鴻，屈指計月日。詩來溢長卷，和作且六十。陸離繽紛間，真有俊語出。醪絲味有味，竟夕就鐙隙。眼眊手欲斷，吾衰更遜昔。強試答短章，展轉同石席。詩成先自哂，墜鼓下懸壁。其聲不通不通然

四十和李釋戡大隱逾兩月始得實耗晚華亦卽世篤念香山舊游潛然有作丈夫重舊遊，老輒念往日。更堪追瑣細，湧現倏百十。最憶命疲驢，山館同晚出。梅邊試吹笛，浮塵落梁隙。此景已入夢，安得再致昔。江城亦五月，仙雲墜瑤席。萬劫付九天，雪涕祇面壁。

四十一和悼梅晚華

投老隱蠻陬，爲歡憶少日。烏衣識風度，壯齒未二十。朝朝會文酒，夜夜巾車出。方我

欲圖南，細語別樓隙。凡茲不勝記，一擲判今昔。忍哀對遺影，猶似蝨歌席。成連嗟入海，風雨動四壁。

辛丑生朝寫掌故自遣

臨風獨客畫堂東，倦燕蘭熏香一中。朱籜靜穿雲外綠，紫叢初放檻前紅。山屏徑曲無書達，海驛程遙乞夢通。殘迹釣磯傳掌故，籌桑開落又匆匆。

四十二和聞曾希穎習畫寄示

使酒興有餘，拈韻賒永日。才情抒不盡，意氣一抵十。毫端風雨動，腕底煙雲出。閭浮諸世界，竟忽現螺隙。樂山更樂水，仁智甯異昔。南疆老畫師，誰得與爭席。想見落紙時，松濤撲齋壁。

四十三和前題

畫水可五日，畫石且十日。經營意匠間，化境千百十。不聞扣華嚴，樓閣彈指出。吾殊苦鈍根，豈足窺涯隙。文酒溯縞紵，南北闊今昔。聲聞猶相思，書堂夢接席。畫成速示我，幅錦恢素壁。

四十四和辛丑雙十節文史館屬撰家乘作惜陰堂辛亥革命記八千言跋記

通變極千禩，得失爭片日。革除五十秋，至今慶雙十。吾家惜陰堂，人物幾輩出。阿翁笑拈鬚，問鼎批竅隙。功成身隱退，擲世傷一昔。逝者長已矣，生者冀衽席。輒勞徵往事，爲鑿魯殿壁。

再仿韓翰林體賦希穎習畫貽之

經營泉石遺晴陰，一片扶疏畫檻深。酒醖不妨人未倦，天遙微惜夢難尋。坐收霸氣歸毫素，小戢清才網碎金。九牧當前橫海色，不應徒具五湖心。

四十五和寄饌脯祝和姐壽

闊別歷年所，簡札滯月日。屈指徵上壽，積算且八十。炎荒乏嘉貺，言語愧空出。祝姐占百齡，良駟永駐隙。媵以乾饌脯，此味不遜昔。庶可助桃觴，聊足登俎席。分甘貽諸孫，慎勿局廚壁。

廣前星馬竹枝詞二十解

早收瞻部入蘿圖，望祭山川就海隅。筆路承床應報饗，同安南海兩名區。中朝舊制定于福建同安

望祭馬來亞嶽神于廣東南海望祭樓羅州嶽神具見邑志祀典門蓋流人闢此山林方莫厭宅吾徒繁衍或出險佑之功報饗固屬其宜且具括地收落之志先之以神祇覆載之誠亦從政者所應知也

五百年前事遠征，艤幢泛海下番城。一邱一壑題名在，勛業應堪勵後生。三寶遺跡不聞真偽隨地

有之創建者或以雄風所被足以激勸後人而為之耶

榜題行邸小花園，閱盡滄桑倚短垣。引咎敦槃輕禮數，不堪回首話征轅。庚子之役德

追事定清庭遺醉親王赴德謝罪途出新加坡英人以庚子之怨不加禮遇遂寓東陵李清淵宅用為行轅至今猶在當日行邸榜額猶懸壁間見者為之悚然

觸目驚心過市樓，壁窠書店署星州。黃公壚畔猶能記，牢落詩人酒一甌。日軍南襲時郁達夫方留

星洲旋去印尼被禍在星多有文酒之會嘗應人請作榜書其星州書店招額迄今猶懸鬧市

玄黃龍戰更何堪？檢證囚俘事事諳。噩夢重尋垂廿載，有人雪涕話昭南。日軍南襲易島名曰昭南

國人每以檢證遺囚殺至數萬人會訊之友好為述往事不禁泣然

海南子弟信多能，盧陸風流更足矜。閑向街頭瞻榜額，瓊華瓊美與瓊興。海南人于此經營茶肆者

遍于坊巷且必以瓊字為招額

盛典元戎序雁行，千旌列隊盡雄兵。不期互禮軍賓際，奏出桑間濮上聲。馬來亞立國制國歌主政

者舉民間樂歌當之鄭衛靡靡之音耳

不愛江山愛美人，青宮明鏡乍生塵。承華事略應增補，椒殿難容采女身。柔佛王子以妾倡女奪其

青宮儲貳之選

好逑遠賦海西頭，得意春風入畫樓。底事崇朝傷脫輻？真慚夫婿是通侯。馬來亞蘇丹子有娶英女

歸國者不數日即遣之大歸聞者駭然

莫輕湘女最多情，曳柳殘蟬又一聲。倘許開邊承化雨，汗青他日比文成。湘女歌姬柳聲老嫗馬來

人官內政次長者頗異其勉策漸移默化之功似唐文成公主之遠適西藏也

舊名爭識牛車水，勝地今開不夜天。百尺樓頭衆香國，春花秋月自年年。牛車水賭步之地絕無

十年崇樓巨廈日多瓦子烟花冠絕南部

慢撚輕描抹復挑，燈窗燕寢擁蘭茗。寸絲不挂南泉漢，也竟投荒入綺寮。披骨女以舞摩戒體爲業

頗足使人神旺寸絲不挂南泉漢釋家宗門語假用之

儼然眉語欲通辭，撲朔深宵出沒時。不意捉將官裏去，低頭方肯認男兒。布其街馬來男倡盛裝脂

粉以逐客

彼美西方乍許逢，春闈紅杏漏芳蹤。緣知不盡刀鑽夢，餘事巫山十二峯。西方軍眷有出牆者屢見

復遣歸

歌呼飲博作生涯，公館連翩似列衙。廣座當窗辜海色，持籌含笑兩頭家。俱軍部以公館稱多集乞

納街亦有在東海濱者客有擁厚資至無人與博者僅兩入對博爭勝或曰陳高兩雄也

傾資渡海禮天方，誦拜齋功守五常。博得街頭人讚佩，從今白帽任徜徉。馬來人之禮天方者歸紳

白帽見者  
咸敬視之

漫將綠柳榜行廚，風味韓江竟不殊。已罷詩人游地獄，不辭投筆作屠沽。潮人署爲丁者忽獲文牛

發政治酒肆曰綠柳其業甚盛爲丁意大利詩人以游地獄詩享大名領袖文壇

扶頭幾日染沉疴，上藥難將末疾瘥。空檢靈樞疏辨症，馬來亞女近何多？近多病迷替委頓者醫不

能治且不知病名昨年應徵選美女即赴美國登岸即病不得預盛會延名手診之均非所悉因即以馬來亞女爲此奇症之病名余友好頗有得病者聽其關月自愈

局鑄原爲大盜藏，莊生此語不荒唐。新來多事堪相證，夾萬朝朝委道旁。此間軍盜如毛至盜鐵箱

破扉而去括資即委之遺旁事已數見來萬粵人謂鐵箱以見怯懦篇之非寓言

萍梗生涯泛海來，故鄉消息夢成灰。吾家亦有唐山嫂，雁字天邊盼早回。流人謀生海外多不事者

屬留之家園粵人稱爲唐山嫂余來此且三年廣德室人一游堅不肯願復通問耳

桂軍文雁門解組，粥畫南游來晤投詩和答語次頗生撫髀之感

不輕秦政爲存韓，舊亦西行效說難。孤詣半生羈絕域，羣飛無計戢狂瀾。灰心霜鬢

驚初見，刻骨花箋待細看。羨爾學書兼學劍，丹青餘事踞詩壇。

彌厂營新居九龍塘榜曰佳堂來書猶繩故園薔薇品類之美之感馳詩申賀

盤薇和露寫新詩，夢裏蕃春剪舊枝。百畝嬌盈花似海，十眉選侍鬢初絲。佳堂近闢



龍塘路，胥宇重營燕壘時。省道詔光妍更暖，待張帆席酌金卮。

歲暮且再去吉隆坡看烏結先賦

望裏斜陽一抹金，歲闌倚檻自沉吟。沙邊水際人歸晚，綠老紅稠鳥語深。閱卜靈棋遲遠信，漫傾雲液泛清斟。安排明日尋芳去，南陌脂車乞半陰。

四十六和沈燕謀久闊來函祝春釐兼及疊韻事即用此均答三首時辛丑殘

臆矣

闕然無音書，瞬已積歲日。倏爾剖錦鱗，殘臘逾二十。春釐致吉語，細字更旁出。呵呵問和章，眼窄召譏隙。曾饒推宿將，豪氣不減昔。余遂困重圍，周旋乞逃席。何當更自振，塗抹遍屋壁。

四十七和頗憶春尊之樂倏又易歲矣

春宵共杯酌，恍惚尚昨日。轉眼且易歲，白髮添幾十。瘴海苦淹留，困翼不得出。桃符徒自換，泥金煥戶隙。卽此當學道，觀世泯今昔。猶冀溫舊夢，濠堂再展席。憑君話桑麻，乘輿命油壁。

四十八和懷通州舊游示燕謀

碌碌避蠻荒，堂堂看白日。作詩無好語，疊韻困數十。彈指歲云暮，蟬噪林間出。此景誠足奇，豈許蠹窺隙。解衣據胡牀，飛想輒往昔。呂四馳單車，有斐安重席。舊游尙有詩，觸處事題壁。

# 高梧軒詩卷十二

武進 趙尊嶽 叔雍

辛丑歲暮小除夕驅車赴吉隆坡觀險幸而毫髮無傷遂獨留度元日返星記  
此

一鐙羈旅百無因，屬客脂車試絕塵。天意有心懲覆轍，春光故我趁元辰。屠蘇曉酌形隨影，綵勝宵縈暫亦親。爲道此游真奇險，南荒重擲歲華新。

壬寅元日寄舉紳舜口號舜病瘡於上海兩姐亟往照料非常人所能也  
一陽春好運乘新，善保新痊劫後身。眼底無窮家國事，從容付汝作傳人。  
九死終能遣一生，吾家陰德啓前程。朝朝稽首醫王佛，祝汝重開酒滿斟，  
六合何如手足親？  
騷輪頃刻絕風塵。書堂竚盼佳音到，愧煞天涯白髮人。

## 四十九和記覆車

建歲維辛丑，馳車小除夕。客自瀛海來，壯齒甫三十。飛揚奮意氣，奇禍遂遽出。闕然觸橋柱，納輪入柱隙。未嘗仇智伯，驚起何似昔？踉蹌度元辰，偃蹇就賓席。屬杯徵襪

祥，七星方聚壁。

五十和壬寅元日七星聯珠爲宋孝宗淳熙十三年丙午八月乙亥卽陽曆一  
一八六年九月十一日後所未見目爲祥異而印度日者以爲凶徵舉國禳  
解翼日海宇宴然如故作此解嘲

紀歷當壬寅，春王書元日。七曜告齊元，盛事百傳十。梵天有日者，乃主災異出。中土  
傳前修，飽學探蠹隙。謂必是祥徵，感世不異昔。老夫擲治亂，無意爭一席。游心賞物  
華，玩圖且對壁。

五十一和前題元日適日食七星之慶爲東南人士所不及見  
舊讀緯象志，好事說歷日。吾衰棄有年，得一夙忘十。從教廢絕學，萬事聽天出。身毒  
七曜經，同亦委楹隙。忽忽屆茲辰，頗欲證今昔。覓書已無存，倦眼徒倚席。坐看換乾  
度，光彩晦奎壁。

壬寅新歲漫書

東南本是中華分，韓翰林句讀爲今日之南洋味之遂借作壁引莫怨窮荒際水涯。霧瘴朝朝懸蜃吻，神荼面面  
出獠牙。少存正朔行邊徼，略惜浮生付海槎。笑語漸聞鄰客集，隔離鐙影逗槎枒。

新春看花

春城真去探花回，寂寞三年夢未灰。細語臨歧堅後約，閉眉掃徑認重來。天方曙瘴疑初雨，酒傍梅疏更一杯。莫遣芳辰輕負了，鏡邊釵燕看玫瑰。

五十二和壬寅人日

花前且雁後，轉眼已人日。枯坐負韶光，往往逾九十。蠻荒不可居，蟄伏遂少出。秉筆就几案，坐俟日度隙。清歡聊自娛，索笑違往昔。紅爐烹藏醞，綠樹幕燕席。賞心誠難忘，奈此同復壁？

舊制紀游絕句數十首閒居尋索猶不能盡補成十截

流丹飛閣認殘基，笳鼓聲中渡水湄。一夜好風輕負卻，兔葵燕麥賸淒其！  
戊辰歲暮江  
南兵事方亟

余于役章貢由牛行鎮渡河入南昌訪滕王閣了不可得問之士人則江畔殘基而已

琉璃亭下撫殘碑，獨立蒼茫有所思！逃俗原為避弓檄，周顛于此信知幾。  
戊辰隆冬上  
牯牛嶺訪游

周仙碑亭洪武御製石刻猶存

空餘殘穴蔭疏枝，莫誤江南剔斷碑。贏得榜村人盡識，問它雷李更誰知？  
崑山真儀鎮  
十里外有碑

墓村蓋黃麻埠地曾往訪之殘穴前短碑題名僅較雷海青李龜年略留名字而已

安樂窩瀕獨樂園，土歌擊壤尚喧喧。杜鵑橋上驚心數，作相南人第幾番？

渡洛水過邵村土人謂安

樂窩獨樂園均在此至今猶邵姓居之頃建大橋俯仰杜鵑聲裏不能無感

太平山上亂離人，權拾茅頭賞好春。遠望蘇門許長嘯，喚來風雨信能神。

馬來太平山晴日可遠望

蘇門答臘余嘗就賓館游宴乍來風雨景物奇變亦一異境下為太湖連漪可愛

斷崖片石留殘字，高踞雄關李鳳碑。我欲登封徵往事，宏文琬琰屬伊誰？

余過居庸關口見李鳳姐

墓嘗徵人修建衆意僉同而事隨年廢深恐陵遷谷變此絕代佳人終歸淪沒無可考也

我生一日後潮神，親賞潮頭出海濱。不信乘潮終去國，從茲報賽廢良辰。

潮生日八月十八日余生

日後之一日暴輒于是日去海濱觀潮裙屐畢集爭看銀鑲當海排山而來茲久廢矣

六扇潼關鐵甕堅，班師競擁相公先。庸知玩寇終貽患，待整金甌二十年。

余嘗往觀潼關城作圓形

仍極堅固

桐江春水暖于煙，處士祠堂尚水邊。直去東西台上望，釣痕淚影兩茫然！

登嚴灘二台東為釣台西

為謝舉羽痛哭處均淪墓草矣

丹荔叢中卓一庵，藍江風味遜芳甘。來時正值香初綻，不負詩人到嶺南。

余以五月赴粵游荔子灣

餽咬暢游自謂樂比東坡

靜宜新居九龍濱海氣象道賦示

遠山叢綠九龍開，近海涼風四牖來。把膝當前吟斗室，東南氣象自崔巍。  
鯉魚門正對新居，雲起龍翔日卷舒。不祇詩情供領略，詩中有畫更誰如？

履川疊均長古七詩見示爲述往事和答

吾衰久廢歌古風，浮生蛾蝨真渾中。滄溟碧落縱無外，魯連虬髯誰爲雄？  
積年子身竄荒服，日長苦對雲峯紅。蠻陬豈比羽淵出，爲能爲羆爲黃熊？  
憶昔半江剪淞水，委蛇賓退食自公。逍遙三徑信可樂，濃陰合暝遮郊空。當階百葢移穉菊，  
接天雙秀圖園松。亦曾壯舉出關徼，從容瀚海超崆峒。河冰徑失雪擁岸，  
鋒車凍合甑爲幪。終見天驕斂身手，遙尊可汗戢兵戎。誠當長嘯沽一醉，  
左倚利劍右旌弓。興來何忽涉天姥，赤城萬仞扣碧翁。乘流麗水下吳越，  
小蠻針線雨濛濛。雨中武林訪遺跡，六和高塔龍翔宮。流連旬月不輕發，  
雜記細字詳城東。穿崑絕壑度章貢，拔地初見五老峯。曉行霧宿豹同隱，  
白雲蒼狗摩心胸。繼茲有游迫京雒，上林花鳥景陽鐘。盈庭肉食何足數？  
一語破的驚瞶蒙。頤年堂前踏清月，森嚴壁壘方千重。惜哉哥舒終敗走，  
坐俟妖異徵白虹。中原萬井棄不顧，雪涕父老悲耕農。振衣南粵去嶺嶠，  
舊游夢裏驚

重逢。與子十載別顏色，斷梗何意尋飛蓬？重逢意氣感似昔，流光獨恨頭垂童。商量文字聚飲笑，自訶每謂百足蟲。今茲背土更遠適，琴筑差幸遙相通。出茲七詩疊舊韻，七發七啓俱文宗。鐙窗展卷誦往復，瓣香鑄佛矜雕龍。試爲述往賡雅令，長慶合集傳無窮。

潮陽蕭遙天通劇事任講授別三年矣來星數枉過不及晤寄四韻舊嘗同局行博故詩末及之

候而不見儘踟躕，搔首三年海一隅。綠綺應添新樂令，絳堂益肆舊規模。當門花木無童僕，望眼江山入畫圖。莫怨剡溪空泛棹，明朝重約牧豬奴。

西域舊製罽賓毳織著王帳，飲歌舞圖方廣逾。尋丈將卒俳倡胡天胡帝不可方，物余落南五載僅乃得見，因用履川寄示古風三十均，易製排律咏之。蠻夷大長間一恃強，每萌異志而卒無所成，則漢家德業千古隆，感有以遏止之也。南夷近亦蠢蠢思動，咏此不無諷辭排律近鮮作者，斯咏竊欲追步中唐，苦無成就，惟吾履川有以正之耳。

東南堂角鬱金風，初展蕃圖進一中。曙破烽烟迷撲朔，紗裁裙褶亂雌雄。舒衫澤送



沉檀郁，把扇殷同勒革紅。歌畢念奴纔換羽，舞疑婕妤衍當熊。嚙喉入破偷車子，促節循聲試惱公。張角漸移徐漸下，參商長夜隔長空。挑紅琴斲頭施馬，著人多用貼地兒工坐偃松。問族當年鍾突厥，卜基此地接崆峒。渴斟馬乳爲潼飲，倦卸駝毳作幪幪。微遣腥風侵上國，最教霸氣壓諸戎。蕃王域外專戈壁，鶻子天遙肆大弓。璠瑊擁肩男共婦，鬢髭連鬢壯猶翁。晴添錦嶂春潛動，黛剪靈旂宿解濛。簇列房星誇禁埽，排吹蘆管繞行宮。常爛教戰輕奔北，未必開疆不欲東。穆滿雄圖曾萬里，可汗蓄意越千峯。鐵衣結束鷹韉臂，鎖甲郎當鏡抵胸。草檄清宵劓蠹簡，坐更拂曉警霜鐘。霜鐘處處相和應，雪月山山合冥蒙。忽奉傳班傾四野，乍瞻隊舞又三重。嬌娥遞合圍成陣，仗勒騰驤氣奪虹。壓寨揚矛咸貴介，引渠荷棘雜氓農。誰知前夕營頭別，猶許今朝帳底逢。羞訴心期諧竹馬，密憐眉語慰萍蓬。此行耀武花門虜，此際開顏釐面童。西笑誠宜戡鳥鼠，南征詎不化沙蟲。山川斗柄渾如昔，星宿河源信可通。終惜謬期崧效祝，豈容逆取海朝宗。中原濟濟仍多士，寶祚年年馭六龍。寄語天驕應戢羽，丹青收拾夢餘窮。

得如山大隱之耗旬日始奉遺書益增涕淚題詩志挽寄哲嗣乙哥瑛哥

驗封滴滴墨痕新，雪涕天涯已古人。著作平生戡僞體，多能一藝重斯文。舊游深巷投門客，細字潛聲去國身。知更誰能昌絕學，不堪滄海幾揚塵！

大召風雲萬里遮，賀蘭馳驛記同車。盤鈴不廢搜天寶，人地差能共永嘉。乍讀新篇通韎鞞，舊題小序付麻沙。定文見屬吾何讓，遺稿應求向秀家。

余同游賀蘭君在盤連小市購得盤鈴樂具

城東寂寞負初暄，就晚從容綴玉軒。孤詣別裁千古事，著書迥勝一家言。從茲聲教開瀛海，最憶清芬侍後昆。藕孔避兵昨日事，相望隔海忍招魂。

日寇盛時君杜門七年不出以避亂

馮列山載車同游波德申海濱留一晚歸途記十絕句距觀瀑已易歲矣歲紀

壬寅三月初十日

清游忽忽隔年逢，瘴海童山又一重。解我羈愁長落漠，共君逸興好從容。不聽潮音已十年，膏肓泉石負華顛。落迦光景粗能記，法雨宵參最上禪。坐痺五百里鋒車，詰曲尋途出市墟。最是麻坡風味好，盤餐饗午獲鯧魚。依違官道叩柴扃，投轄欣然占一櫺。臥看東南雲氣上，潛蛟真欲舞滄溟。疏疏籬落映斜陽，淡淡雲霞透月光。深淺林陰徐掩抑，有無山色半迷藏。銀波滌出露華寒，輕送羣鷗上淺灘。不待因風微作勢，已教鏡面起迴瀾。

腰脚新來不自由，幾回砥柱試中流。弄潮終已非吾事，爲跼徒師馬少游。

雲中一點是蘇門，遙想三軍漸入屯。虞芮朝周終讓畔，槐根蝸角更無論。

印尼備戰  
甚甚

陣雨催歸雪噴珠，游人逐隊笑相呼。遲行獨愛看空外，要攝江山入版圖。  
中宵絃管夜紛陳，燈火迷離酒十巡。辜負一庭良夜永，月華如水露如銀。

### 海南林生徐典約游雙林寺拈玳北吉兼有同游金馬之約

暇日從君一散襟，偶參勝迹謁雙林。承盤杯玳知神意，卜午鐘魚隔院深。入海泥牛終望返，藏舟金馬待重尋。辭家窮子峒蠻客，禁得天涯百感侵。

### 錢山君寄詩索和

萬里猶能掬肺肝，無多四韻話辛酸。久羈異域垂垂老，許作吾鄉處處安。海國林深多瘴癘，中原地迥夢高寒。傳經料理兒曹事，三絕韋編午枕看。

王定國遊海  
東坡云云

### 彌厂來詩謂其友夜歸得閣中解半臂禦寒此伉儷之至情也爲進一解調之

尙書紅杏敞前廳，官燭雙行削汗青。寒到中宵辭半臂，輸君舉案沐溫馨。  
人道清輝玉臂寒，君嫌瑟縮袂衣單。千秋莫漫輕齊贅，一石臣心自最歡。  
十年入表終孤旅，一日三秋祇夢歸。差幸四時都是夏，蠻陬不待九張機。

其博  
士體

送尤生光敏就學香江

移檄官書待削青，西南夷好作藩屏。老夫薄具文翁識，遣子鴻都受七經。  
頗有才人集海隅，南金東箭溢明珠。珊瑚入網休輕放，博取多師氣自腴。  
揮手臨歧道已東，好憑冊府鬯宗風。出吾頭地尋常事，拔幟登壇第一功。  
三年漸已涉津途，韓柳名家足自娛。更有麟經諸子在，達材成德試涵濡。

客臘辛丑十二月二十七夜夢不知何徵欲記一詩久始得句且半歲矣

朱鳥窗前許再銜，通明緩降遞瑤函。七襄貝錦承前席，萬里鯨岐壓去帆。未忘同心  
貽玉佩，更商新樣剪春衫。碧桃信有重開日，日坐紅雲倚翠岵。

蔣抱一自耶加達來訪友索詩賦此酬之用其元均

天風海雨見襟期，老負聲名乍得知。廢酒張顛猶作草，狂吟賀監自生姿。論交不少  
懷歸客，鎮庫偏多感舊詞。更出吳箋三百箇，投門排日索新詩。

李西浪自香江歸來置酒醉客分貽名楮記謝

甫從珠海卸歸裝，旅雁翩翩又著行。彩筆新題收腕底，花唇舊醞出家藏。錦江繭楮  
番番豔，閩芥龍團細細香。我愛平生鷄黍約，不辭投轄一千場。

再以前韻送蔣抱一

瀛寰浪迹卅年期，腰脚崢嶸不自知。日課黃庭娛晚景，曉從霜鬢見英姿。久同林下疏寮客，尙愛花間小晏詞。爲問蔣山老居士，海天歸棹可無詩？

九日置觴約客爲蔣抱一餞別翌晨飛返耶加達矣

亦知小別卽歸來，祖帳猶爲發舊醅。展翼垂雲滄海闊，招人叢桂小山開。壓裝此去多新句，作草從今進別裁。不許茱萸閒負卻，明年重九更相陪。

壬寅重九約客是日晴曠逾恆

殊鄉獨客罷登臨，夕照迴瀾入望深。餘幾蟲沙催劇劫，無多風雨托騷心。懷歸計菊應初放，怯病因人試淺斟。攜得萸囊無處去，待聽街鼓夜沉沉。

重九觴座迴憶中秋夜胡浪漫作賞月勝會占此示之

從容重九溯中秋，坐對珠燈綴市樓。月縱因人有圓缺，花尤傲晚見深幽。清言不廢矜才氣，嘉侶依然事拍浮。何日龍山同攬勝，浩歌萬里托歸舟？

壬寅九月常凱上人供齋索和

同自家山得得來，泥牛入海鬱風雷。花移蝶至千人石，雪北香南一剪梅。偶和坡仙

慚秀句，夙憐島佛是詩才。供齋今更耽禪悅，灌頂醍醐勝舊醅。

李西浪詩贈蔣抱一和作

何事恩恩便賦歸？相洵相沫正相依。十旬勝侶真乘興，百歲佳辰不浪違。鐙火崇樓消北顧，鷗鵬奮翼總南飛。錦鱗卅六憑傳語，莫遣紅箋小字稀。

西浪約游小九華報恩寺常凱師再供清齋客有攜酒至者爲占絕句答西浪

莫問當年拜九華，早嫌窮子已無家。莊嚴法海真方輿，許又今朝現鏡花。  
游履長干舊報恩，難尋廢井與頽垣。幾時移錫南瞻部，火宅同開不二門。  
一壑沉吟送夕陽，坡陀山道似羊腸。林梢初見琳宮現，便濯塵襟禮法王。  
面海看山最上層，碧天月勝九蓮燈。山河大地于中現，老卻蒲團一個僧。  
勝侶尋詩又一回，中庭良夜與徘徊。拈花不辨花名種，些子禪心未盡灰。  
五福持齋夙自諳，誅茆卓拂恨無庵。勝緣增上隨功德，少懺平生七不堪。  
清齋料理玉東西，緜眼慵看孤鷺飛。恰似淵明出蓮社，虎溪溪畔拾清輝。  
清能比聖濁如賢，蘇晉風流信有然。不待傾杯渾欲醉，中人山色壓吟肩。  
蒔花闌磴蓋茆頭，彈指華嚴十度秋。歷歷蒼山終遠拱，沉沉碧海尙橫流。

此下和  
西浪元均

轉經幾輩是潛夫？跡遠情疏格義粗。慚愧人天隨喜到，頓開香積奉清廚。  
掃澈一輪明，坐到中宵第幾更？花漸欲暝人薄醉，澄懷端自抑心兵。  
真有桃源亦足奇，南船北馬更何之？此行不祇尋幽賞，尚擘雲箋試覓詩。

壬寅十月十四日太陰歷九月十六日舜兒病歿津沽五虞齋日作悼詩

痼疾必致命，天意胡太酷？遽奪吾子去，經歲困沉篤。緬憶十年前，櫻肺喪家督。龍蛇  
邁厄運，乃又肆荼毒。連摧蘭與蕙，直斷我嗣續。老懷何以堪？斗室夜躑躅。  
十年不相見，方喜展驥足。北國每來書，辭字溫如玉。間亦記掌故，祖德能述錄。衰宗  
慶強衍，官事困繁促。留影寄海南，英爽裹頭樸。猶留几案間，燈下忍凝矚。  
客歲報櫻疾，瘡痛審不起。手足情最深，犯境往慰視。聊延殘喘在，一歲差後死。終驚  
露電影，流光去如駛。伯姊又遠適，料量備衾梓。歸來銜哀訊，空灑淚盈眦。  
阿母愛少子，聞病且北去。促裝未成行，天奪何太遽？彌留不及見，含恨誰可語？孑然  
遺嬌女，幼不解傷楚。老人當責學，姨氏善教處。魂兮或歸來？莫作身後慮。  
滄海復關山，兒病不及視。慰汝篤仁孝，好語強喻指。亦知終無濟，揮淚每盈紙。又爲  
讀精誠日課，依釋氏。聞兒嘗自證，頭陀落塵紀。人天許感通？緣盡愛不止。

隨葬北倉園，相隔六千里。魂魄不相依，聲咳不相抵。兒亡逾兼旬，望眼尙遷迤。一旦得噩耗，堅信又疑似。豈謂父子恩，果此旦夕止。猶期有來生，再至奉甘旨。

胡浪漫寄詩卻和

夢餘呼酒酌長庚，枕倦拋書廢縱橫。萬里凝眸傷去國，幾回負手厭言兵。壺觴來日當高會，絃管鄰家出細聲。未許風懷消遽盡，猶邀殘客踏歌行。

和錢山一律

山靈敢怨我來遲，蠹瘴窮荒際水涯。九死大蘇曾不悔，三生小杜舊難知。沉沉蟻穴封侯了，寂寂訶林課易疲。屈指剪淞來歲事，錢春堂畔賦將離。

題陳一峯初曦樓圖卷

破暝倚高閣，凝眸若有神。晴暉開兩戒，麗景乍三春。待擁卿雲出，猶餘殘日親。詩人尋秀句，負手幾逡巡。

彌厂招飲座次馬武仲出示中唐大中二年李楚望手寫詩卷見示又海藏樓七十生日謝壽詩墨彌厂用海藏原均作兩首余亦奉和彌厂失妻余喪子俱遺不幸詩中及之



迅羽速萬里，誠不類遠行。故人屬高會，燈火夜通明。酒酣玩詩札，一老矢堅貞。更獲  
覩瓌寶，唐人寫秋聲。文字信有靈，片楮傳令名。

交期溯奕葉，避世同南行。相隔猶萬里，月色迷空明。何況遭喪禍，斗室各自貞。微吟  
縱有作，滿紙斷腸聲。吁嗟天地邈，忘情且忘名。

何焯賢屬爲雷基磐題所著莘園詩草

少年綠鬢擅風騷，萬里遐思托素毫。更讀書燈餘味好，白雲親舍念劬勞。

和答錢山

陰移椰影不嫌遲，坐憇團蕉水一涯。日日看雲山亦老，花花壓檻蝶初知。偶然呼酒  
慳微醉，幾度拋書惜漸疲。破寂恰宜驚駟使，風塵門韻笑支離。

彌厂與余同歲癸卯初春方北歸觴我新居甫匝月而恒化遺詩六句在襟懷

間益增同聲之慟遺命荼毗知金粟證前身矣聞耗雪涕追和其移居人字  
韻悼之又嘗以杜鵑詩屬酬因並及之

同宮磨羯更無人，燈火華堂迹尙新。辟世圍城愁玉貌，斷吟懷袖賸珠塵。猶迎水驛  
歸來客，乍捨風輪壞劫身。寂寞九龍山翠外，杜鵑花底孰酬春。

余少颿以所和劉孝綽均詩見示屬和蓋記彌尸與余朋尊間事彌翁大隱閱之喟歎不已答賦

佯狂走萬里，草萊未盡闢。窮子偶思歸，展翼海天碧。翰藻驚少有，勝侶猶宿昔。故人更殷勤，酬接共凡席。惓惓返瘴鄉，餘夢漑醇醪。何期鼓風輪，奪境祇旦夕。成連去不還，餘韻冷金石。

和孤桐癸卯上巳詩

孽龍瘴海狎波來，冷眼雲帆百疊開。修禊壺觴徒念往，登樓筋力未全衰。何當露布傳荒服，坐振戎衣待異才。事了昇仙橋上返，江亭重訪好樓臺。

孤桐激賞前詩答句有倏從邱壑見夔龍論事堂堂迥不同語庶同與脾肉之

感復和一首

瞻部終教駐六龍，炎荒朔雪九垓同。先聲吐谷方歸款，後至防風莫自雄。此際官山兼賦海，十年人力奪天工。頽幡許與藏蠡管，卜日題襟咏太空。

懷亡友

天風海雨自東來，折戟沉沙鎖已開。鶻泣蜀人知祚廢，龍滌夏后識時衰。不妨夾谷

歸吾土，竟罪防風忌異才。回首成塵青史事，殞星莫更數三台。

黃伯權久役中國銀行謝事客星加坡八十雙壽

京華五十年前客，斗柄南移駐壽星。坐見曾懷行會子，夙知張特樹儀型。賞音瓦舍尊同泛，課易書堂草自青。更喜嬋媯徵黻佩，白頭對語祝遐齡。

丁卯七月盛暑口號自娛

謝事厭聞天下事，罪言未盡一家言。閉門長日親花鳥，此地真成獨樂園。

怯暑偏教謫海南，藤床紙扇勝幽探。憑將聲樂娛清睡，持國風情久未諳。韓持國道署使署

促睡

玉局招人來說鬼，定林策蹇去尋幽。此間無客無山水，片席隨宜祇臥游。

太平山亦小平山，海氣穿林曉入關。獨少荷花傳飲客，始知畢竟在南蠻。六一在揚州平山堂事

提魚往過聖俞家，前輩風流信足誇。今日正無人斫鱸，街頭空遇送鮓車。以無人治鮓故雖見中原

鮓魚亦不買

焚香端不爲熏衣，清獻宗風久式微。釵釧聲聞同破戒，禪心終逐綵雲飛。宗賢情獻公好焚香

聽歌已罷尙填詞，料理泉蔬強命卮。呈藝後先傷獨客，九泉元獻亦吾師。晏殊玉事

白快近來逢素髮，吾鄉敏叔信詩人。開簾霜雪盈雙鬢，轉覺斯言尙失真。宋張景修吾鄉人字敏叔

工俗詩借  
用首句

生平不慣作真書，春蚓秋蛇自卷舒。差比祁公行判牘，魯魚辨認付鈔胥。杜祁公事

中書君老不中書，繭紙番番擲屋除。偏有潮陽好事客，賺人燭下幾行疏。潮陽蔡石門求書作小軸

之付

婢女生日寄口號祝之東坡稱次女爲小二娘見致吳婿函殊雅今因襲用之  
繼我生朝再舉觴，遙瞻海上樂康彊。憑將口號殷勤祝，寄與吾家小二娘。

三和錢山韻亦自見矍鑠之致

坐併提封莫更遲，扶搖六載隱瀛涯。陬隅番語粗能解，僕遠蠻餐已習知。猺洞鯉溪甯自卻，鹽車駑馬敢言疲。明朝傳檄勾當了，再奉金卮訴別離。

癸卯靜宜壽日賦寄

看山面海據崇樓，俯仰年華又一秋。終日沉吟把卷，書叢清福幾生修！

聞倅虛和尚示寂感事

疏影扶溪夜別時，月明如水浣胭脂。鶯聲漸逐年光散，任取霜風入鬢絲。

老僧已化殿基存，許再清宵一扣門。殘劫空華消逝盡，祇餘衰病負深恩。  
風情筋力兩消沉，碧醞雙巡便不禁。斜揭綉簾花徑去，泥人猶勝少年心。

八十八翁陳半丁繪菊扇貽陳一峯行嚴題二絕句爲報一峯刊夏午貽遺書  
之勞故行嚴以查運波與厲太鴻事擬之入詩余與半丁別四十年相聞相  
思而已頃焯賢述一峯意屬咏讚之初曦一峯齋榜也

鳳城別久付尋思，二老風流海內知。舊共春衫趨小市，新開壽菊迓初曦。傳書差繼  
查樓盛，雅咏猶當栗里師。何日尊羹償宿願，落英同乞泛瓊卮。

聚眉頭長聯見于著  
錄夙爲春明掌故

查樓即京師廣德樓查氏  
舊業所懸梅村大千春色

雄白記往事兼述不佞少年心性戲題截句示之

碧海青天卅七年，豔奴踪跡渺如煙。扶衰猶賸雞籠罩，念說當時尙惘然。

焯賢以前半丁畫菊詩示潘伯鷹索得和章再邀同作卽和潘韻伯鷹惓惓春

明風物情見于詞

老去追歡廢貝多，空桑萬里似重過。聚頭著墨珍秋士，負手題詩感逝波。霜節彌堅  
矜野菊，絹痕淺研濯溪鵝。書燈芸篋相輝映，待引醇醪滿叵羅。



# 高梧軒詩卷十三

武進 趙尊嶽 叔雍

吳子深遍游南藩返港將以近作畫幅來賦寄

諸蕃職貢待君圖，足跡應教遍海隅。方馭神風引水擊，又時上藥澤苑枯。丹青點綴傳千里，烟樹清娛乍五湖。舊夢無端重省記，蠻陬月夜兩狂奴。

用友人前詩韻賦閑情四韻

閒情別後漸無多，曲徑沉沉幾度過。向午好花開似醉，夜深圓月淡猶波。莫誇金屋曾栖鳳，縱寫黃庭未換鵝。百緒千端難自己，仍拈斑竹剪輕羅。

行巖八十四歲復作南游詩以迓之

方瞳白哲髮鬢鬢，得得千山一擔簦。父老中原尊洛社，大夫稷下侍蘭陵。遐荒蠻貊初通款，殘朔荆舒正待懲。餘事陰符囊底智，更期出手拂霜棱。

蘭泉湖海詩傳謂隨園更招仕女之能詩畫者十三人繪爲教授之圖燕釵蟬鬢傍柳隨花問業于前而子才白鬢紅舄流眄旁觀悠然自得云余授經南

服簪花請益何止十倍于斯獨愧尙未製行看耳

燕釵蟬鬢日隨花，流眄旁觀亦自誇。尙惜雲烟無粉本，空辜紅鳥老生涯。

孤桐一夕製四律見貽次和代答東

報書日日守山隈，苦鑄危辭急足來。欲待南疆徵佚史，未遑北國接羣才。囊中一幟雄爭長，旬外諸蕃載必隳。房杜不輕當世用，汾陰志業幾追廻。

漫耦溪蠻作遠人，團蕉歷碌夢猶新。仲翔真待青蠅集，湘子誰尋瘴海濱。篔簹竹夙知千劫換，桃符驚見七年春。此情破涕難爲笑，窮子思家不待陳。

大荒料理古來今，空谷愁教竚足音。畢竟詩郵通肺腑，更從題識托身心。革除共仰

千秋永，康濟同浮一盞深。玷璧無端勞史削，齋賓試叩惜分陰。

先父書屋榜  
惜分陰齋

倚樓頻和大江東，俯視林皋毒霧籠。丁卯浣花徒賸稿，甲辰占歲若爲雄。猿啼菁峽淒尤厲，鬼趣囚山出不窮。一枕翩然京洛好，幾時狐貉換輕容。

港中嘉集行嚴首唱七古遠道寄示和答之

負鰲獨面滄溟住，鶴唳猿啼聞已罕。讀詩真似夢鈞天，描刻嘉筵稱銖兩。團團賓主可十人，膾炙載荐猩脣。清談笑語間雜作，更拈秀句壓南濱。洞溪魑魅攫人久，此



樂從容非我有。洛鐘但許應銅山，差慰聞聲一袖手。謀篇骨秀調更高，情深句促薄風騷。飲中八仙不足道，徒狀醉態嗤同曹。山徑陂陀涉岑樓，地僻盛夏如涼秋。苦茶朱李相繼出，勝侶應同投轄留。長繩繫日必可以，得預追陪尤自喜。及瓜屈指方翻歷，酒香先透鼻觀矣。

焯賢以海外梁祝平宣教師回憶錄屬題漫書廿八字

夙傳域外有尊師，名理精淵海嶽姿。頗欲因君尋格義，先從叢稿覓新詩。

病榻甲辰八月十四日入院作

夜氣高初散，腥潮靜可聞。窗雲疑絮積，林露綴苔茵。差了平生願，猶爲獨客人。真圖逃劇劫，神馬御尻輪。

醫樓與同安傅无悶對室傅七十二高齡割治腸癌亦漸告愈舊爲京師大學馬通伯高弟素以能飲名過從間余輒謂有酒德而酒量不及此遭各施刀圭均酒病也

支牀擁枕各無言，毒霧驕陽日滿軒。已悔豪情矜酒聖，幸蠲殘渴解文園。伯倫一錘猶多事，貞白層樓且避喧。病起相從應笑憶，滌腸鉤胃對屏垣。

縱使相逢訴斷腸，終逃九死客蠻荒。寥寥每自慚皮服，削迹應教別醉鄉。忍見空尊甘廢置，尙餘殘釀待珍藏。來年正朔南頒日，猶欲相從舉一觴。

醫樓以馬來服供御故詩中及之

甲辰仲秋養疴口號

已教萬事不關心，鎮日胡牀坐綠陰。猶有幽花能伴我，紅蕉繞砌一叢深。咫尺沙隄碾畫輪，夕陽紅處黯生塵。倏教細雨輕雷動，不礙扶頭倚枕身。明窗十二縱雙眸，綽約圓蟾上樹頭。眼底清光特皎潔，方知今夕是中秋。結束纖腰自往來，青裙不襪踏莓苔。簪花獠女饒風致，知是長街趕集回。拋卷沉吟坐晚晴，彩霞穿透綠雲明。一回輕夢都吹散，微覺涼風拂面生。渾忘此日是生朝，消領清娛坐寂寥。不待臨流知面皴，吳山許我再觀潮。綠衣人至遞蠻書，阿女天涯問起居。細字密行徐寫就，海東珍重答雙魚。

行嚴題何焯賢園居行看四韻酬之

舊聞鞭石不成橋，今待陽烏拂袖招。萬里中原供作客，一枝老父漫營巢。沉沉君據岑樓上，瑟瑟吾安罍井拗。水擊三千彌異所，幾回酬簡和風謠。

甲辰歲暮倦游庠校改應星洲約治舊業書示友生

傳習河汾與已闌，門牆房杜盡彈冠。餘生市井聽輟議，逐客無因事諫官。

移家檢得篋稿補錄當是病起戲筆時寫吾廬

支離病榻已經旬，難證金剛不壞身。差喜神游衆香國，天花法乳護濃春。

何焯兄以中原給水香港喜賦屬和

不聞驟雨不驚雷，輕遣哀黎脫稜蓄。致力遠勝羅刹使，虛從雲外月邊來。能遺又放太  
空人國浮太

空爲探月先容  
使者故及之

激雪長隄挾浪翻，五丁一夕蝕江痕。蒼生甘澤三年望，終信中原是峽源。

胡浪漫且卜築金馬崙有作次韻

丈夫何取積籛金？？經野誅茆足快心。自有浮雲供意匠，便開繡谷作園林。期君一棟  
依山築，許我明朝策杖尋。難得炎荒寒夜醉，推衾笙磬證同音。

再和

朋簪嘯樂抵兼金，更覓幽居話素心。糸曲繞屏疏粉黛，逶迤疊嶽壓雲林。月泉酬句  
應堪繼，潁水遺風儻可尋？？千萬買鄰吾不吝，寒蛩隔院和商音。

希穎寄四絕句感逝懷人讀之悵觸不能自己次答代緘

哀時詞賦不曾休，歲共鶻花作唱酬。今日祇餘殘客在，一簾燈火映離愁。憂歲留港鶻花盛日輒與

解尸希頹詠實不輟比者彌逝希別此事遂成絕響

剪綠裁紅負品題，詞人辜負玉東西。一從鉞腹劊腸後，無復清思咏畫溪。胃疾戒飲艱于構思每藉

妙繪不克再詠為之悵然

釀酒東南事渺茫，無多消息報殊方。圖經汗簡渾拋擲，道是龍威不許藏。近去上庫廢書累月

酒痕浣盡舊青衫，一舸支離落海南。十萬蠻花花似錦，薊門春柳正初穠。薊門苦憶

絕筆

病魔鬪藥事何如？萬苦千辛備一茹！夜擁重衾猶覈竦，晨看疎雨待朝蘇。危時擲命尋常事，垂老珍生是至愚。大好頭顱吾付汝，此中頗有未完書。

# 跋

乙巳仲夏得 先父手諭云患黃疸病住星洲中央醫院並誠切勿似去年胃疾時飛往探視因黃疸非險症醫言二十日即可出院等但字跡怯弱幾不能辨料病情匪淺卽洽辦去星證件不數日 先父摯友施寅佐先生函電疊至促漪就道迨七月三日上午始得證件當日午後成行傍晚抵星始悉 先父已於當日丑時仙去遠隔重洋旣未能侍疾又未及一面嗚呼痛哉旣卜葬於星洲蔡厝港漪在遺篋中檢得高梧軒詩全集及珍重閣詞全集高梧軒詩至第十三未終卷而止最後絕筆乃 先父自知不起擬捐眼睛頭顱贈醫院所作於易簣前猶以蒼生爲念 先父真仁人矣詩詞稿俱經親自檢訂有註明刻時刪去似預知不能及身付梓者然先父初學詞於臨桂况蕙風先生當時所作得小山之神髓方飲水之華貴環境相同也後則頗經憂患尤當垂暮之年連遭喪明之痛以中流之砥柱作海外之東坡故所作詩頗多語識及衰颯之句讀之泫然每憶南陽路西樓夜課恍如昨日於今

手澤雖存人天頓隔重違 父意未正首邱卜葬南荒魂兮寂寞不孝之罪漪復何  
辭茲校訂竣事克日付梓謹誌數語用致哀思乙巳季秋兒文漪敬跋